



6

20-5

B.B.

Ex Bibliotheca
majori Coll. Rom.
Societ. Jesu

6-20-b-7-

21.3.54.

21

2

63

~~21-a-61~~





Donat. Prof. Rom. ha. con. cat. conscript. lib. Col.

CYNTHII IOANNIS BAPTISTAE

GYRALDI FERRARIENSIS

Poematia, quorum catalogum se-
quenti pagina reperies.


ITEM ANTONII

GERALDINI POETAE

LAVREATI BVCOLICA,

antehac paucis uisa,

Bibliotheca Ser. Col. Rom. Soc. Reg.



PER ROBERTVM WINTER, BASIDAE,
ANNO M. D. XLIII.

CATALOGVS EORVM QVAE
in hisce Cynthij Ioannis Baptistæ
Gyraldi Poematijs continentur.

DE Obitu Diui Alfonsi Estensis
Principis inuictissimi Epicedion.
Hercules Estensis Dux salutatus.
Sylvarum liber unus, cum Cœlij Cal
cagnini Hymno ad Diuum Hiero
nymum.

Aeglogæ aliquot.

Elegiarum liber unus.

Epigrammaton libri duo.

De corporis humani partib. nonnulla.

Eiusdem super Imitatione Epistola.

Cœlij Calcagnini ad eundẽ super Imi
tatione Commentatio.

Lilij Gregorij Gyraldi Epistola
bonæ frugis refertissima.

LILIVS GREG. GYRALDVVS
CYNTHIO GYRALDO.

Editæ cum nondum fuerint tua carmina Cynthi,
Cur tamen è populo quilibet illa canit?
Omen habe, nam Fama solet prædicere verum,
Hoc signum longæ posteritatis erit.

IN DETRECTATOREM

VT suaue est, puppim spectare in littore ventis
Commisam, & septam uorticibus rapidis:
Sic aliena quidem suaue est reprehendere, Mome,
Nec quicquam populi credere iudicio.
Tu quoq;, si edideris, disces compescere linguam,
Et tandem alterius carpere dicta fines.
Edere cum trepides, uirosos comprime morsus,
Et taceas, tua si, liuide, Musa tacet.

CYNTHIVS IOANNES
BAP. GYRALDVS COELIO
CALCAGNINO SVO

S. P. D.



Vm seuis Fortunæ flu-
ctib. et aduersariorum
meorum inuidia, plus
quàm credi possit, ini-
què uexarer, ego (licet
nunquam animum desponderim) in
otium & solitudinem me recepi, ratus
mihi longe conducibilius esse, urbere
licta, uitam ruri degere, & à reb. pub.
publicisq; officijs eò usque desistere,
quò sedaretur conflata in me aduersa-
riorum meorum inuidia, odiumq; mi
tesceret, & tandem ponentibus uentis,
tranquillo mari perueherer. Et quoni-
am præclarorū uirorum sententiā est,
& ab optimo quoque recepta, nobis
non minus otij quàm negotij rationē
red-

AD COELIVM CALCAG:

reddendam esse, ne totū id temporis,
quo mecum eram, frustra absumere-
tur, & ut animi mei languores mitio-
res redderem, hocq̃ in otio nō sine ho-
nesto negotio uersarer, Philosophiæ
Medicinæq̃ studia non deserens, qui-
bus à Ioanne Manardo, quem hono-
ris causa nomino, iam pridem initiatus
fueram, ad artem poëticam animū ap-
puli, cuius adolescens adhuc miro de-
siderio flagrabam: licet in ea uersandi,
nec facultas, nec otium fuerit. Quare
nostris hisce in angustijs id boni asse-
cuti sumus, quod in tranquillis tempo-
ribus nunquam euenit, ut in ea scilicet
studia uersari nobis integrū fuerit, ad
quæ iam pridem natura, & tua aman-
tissima, fidelissimaq̃ consilia me uoca-
rant: nec quicquā unquam magis pro-
sentētia euenit. Nam ut mihi, qui nun-
quam, aliquid carmine cōposueram,



EPISTOLA

honestissima pararetur occasio, qua totum hoc temporis, quo mecum eram, cum Apolline & Musis esse possem, ea uotis meis materia oblata est, qua nec maiorem aliquam, nec clariorem desiderare potuissem: Diui scilicet ALFONSI Principis mei, Ducis inuictiss. & omnium quos unquam Sol uidit, clarissimi (cuius adhuc desiderium nos uexat, ac propemodum angit) immaturus interitus: & imperij HERCVLLIS nostri in hoc ætatis flore, nec patri, nec principum cuiquam prudentia, nec animi magnitudine secundi, fecelicissima auspicia. Ego uero, Cœli, uellem, quod his tantum temporis dare mihi fas fuisset, quantum & rei magnitudo, & mea in utrosque hos Principes propensa uoluntas postulabat. Nam & clariora forsan in lucem prodissent, & animi mei desiderium feliciter

licius expleuissent, & omnium expectationi magis respōdissent. Sed postquam ab Antonio Musa Brasauolo, uiro clariss. singulariq; & eximia uirtute prædito, cui gymnasij nostri summa cōmissa est, eahabita est & auctoritatis & dignitatis meæ ratio, ut ad solita officia summa cum laude mereuocauerit, ne ipse in hoc munere in me conferendo parum prudens uideretur, aut ego in eo negligendo non modò officij immemor, sed uiri honoris mei studiosissimi benignitatem paruifacerem, ab otio ad demandatum mihi ab ipso negotium, studium mentemq; conuertere coactus fui. Cum igitur hæ tantū temporis et operæ, quantum opus erat, impēdere nequiuerim, mecum statueram, ut ea in scrinijs meis perpetuò delitescerent. Cæterum ab Amicorum plerisque persuasi, ut

EPISTOLA

D. HERCVLI, Principi nostros
gereretur, hæc, quæ dum nobis hone
sto in otio esse licuit confecimus, in lu
cem edere cōstituimus: tum ut hoc otij
nostri opus, solitudinisq; munus, qua
lecunq; est, extaret: tum etiam, ut ami
cis obsequeremur, & hac cura soluti,
uegetiores, promptioresq; ad obeun
dum institutū tandem reuerteremur.
Hæc autem priusquam in omniū ocu
los exeant, tibi homini eruditissimo, et
præ ceteris oculatissimo submittimus.
Teq; per communia studia, & per mu
tuam inter nos necessitudinē rogati
uolumus, ut quicquid in his reprehen
deris, quod minus approbes, id omne
expūgas, immutes, & pro arbitrio de
leas, ita ut uel prorsus in spongiam (si
id res postulauerit) incumbant uel tu
is luminibus illustrata, quas ipis tene
bras maleuolorū improbitas offude
rit,

AD COELIVM CALCAG.

rit, quod suapte natura facere non pos-
sent, superare ualeant. Tu uero Coeli, in
his corrigendis tantum & studiij & di-
ligentiae impende (si ea penitus non
damnaueris) quantum ad horum situm,
& rubiginem tergendam sat erit. Nam
cum haec tuo iudicio munita, & indu-
stria exculta fuerint, maledicis hisce
Coelij calculum, ueluti septemPLICEM
illum Aiakis clypeum (loquar more
poëtico) intrepide obijciam. Quanquam
ut nostris hisce primitijs aliqua & au-
thoritatis & gratiae, tum apud illustris-
simum Principem nostrum, cui primum
placere studeo, & cui primum debentur,
tum apud reliquos omnes fieret
accessio, quam olim ad me dedisti de Imita-
tionē cōmentationem, luculentissi-
mam illam quidem, & Coelio autho-
re dignam, à literatisque omnibus pridem
expetitam, ijs ceu thesaurum quandam

EPISTOLA.

superaddidi: ut si tenuia hæc legenti fastidio erunt, habeat saltem ipse aliquid egregij, unde animum reficere ualeat, & summa cum uoluptate, summam sibi utilitatem comparare. Vale, ex:

Cynthiano meo ad IIII.

Calen. Nouembris.

M. D. XXXVI.

COELIVS

COELIVS CALCAGNINVS
CYNTH. IO. BAP. GYRALDO
Suo S. P. D.



AB EO tibi gratiam, mi
Cynthi, quod tuas delict
as, id est lepidissimos tu
os uersiculos, ad me dede
ris, quos ipsis planè Mu
sis distantibus te excepis
se credimus. Hoc scilicet illorum Genius,
& incredibilis quædam suauitas, uel ipsi
Midæ potest persuadere. Me certe ita ille
xerunt, tenueruntq; dum legerē, ut expe
rirer non frustra Homerum scripsisse, V
lyssis socios gustata semel loto, à Lotopha
gis non potuisse diuellī. Quod uero mecum
etiam pacisceris, ut tuas Musas ad censurā
uocem, & cum ijs inuerso stylo depugnē,
neq; æquum postulas, neq; conditionem
accipio. Phœbum iratum habeam, si quid
est ijs dulcius, amœnius, elegantius, ut ne
que oculatus ille undecūq; Momus, uel in
crepida quicquam possit arguere. Blandē
itaq; ac delicatē, ut par fuit, à me exceptæ
sunt:

EPISTOLA

sunt; & quom ad te redire festinarent, uix
 à metandem potuerunt missionem impe-
 trare. Quod ni crimē plagij mihi abs te ob-
 trudi reformidasssem, in eas uel Cupidinis
 uincula coniecisssem, uel Sirenum gremio
 conclusisssem tantisper, dum te parentē ob-
 liuiscerētur, & uolentes nolentes apud me
 adsuescerent. Nam, ut uerum fatear, ego
 mearum deformitatem Camœnarū peritæ
 sus, magno ambitu unum hoc procurauī,
 ut tuæ tamdiu apud me forent, donec illa-
 rum consuetudine expolitæ nostræ melio-
 res elegantioresq; fierent, uel (quod postre-
 mum fuit in uoto) ex earū saltem pigmen-
 tis, ac narthecijs cognatam fœdita-
 rem corrigerent.

Vale.

CYNTHIVS

AD D. HERC. ESTEN.
 CYNTHIVS IOANNES. BAP.
 GYRALDVS D. HERCVLI
 Estensi Duci inuictiss.
 S. P. D.



Si tantum carminibus hisce, quæ de obitu Diui ALFONSI, & tibi & patriæ parentis optimi, quem nuper immatura mors (pro dolor) nobis eripuit, & de tua in patrium & auitum regnum felicissima successione à me cõposita sunt, & Veneris inesset, & grauitatis, quantum res ipsa postularet, ea intrepide ad te uenirent. Verum cum hæc rei magnitudini nõ respondeant, uix mihi digna uisa sunt, ut abs te Principum omniũ & doctissimo, & grauißimo legantur. Quid enim decoris aut gratiæ habere possunt, quæ ab homine Dialecticam publicè profitente, dum is prælegēdi muneri uacaret, composita sunt? Vicit tamen pudorem meum, penè subrusticum, mea in te fides ac obseruantia, & tua in uniuersum populum

EPISTOLA.

lum, nedum in eos qui laudum tuarum
 sunt cupidī, tum liberalitas, tum benigni-
 tas, Veniūt igitur ad te, Dux inuictissime,
 carmina mea, inculta illa quidem, quid e-
 nim uerum dissimulem, sed animi mei, nu-
 mini tuo deditissimi, certissima pignora.
 Tu hæc ea fronte suscipe, ut quod materię
 dignitati ingenij mei culpa detractum est,
 id omne tuo fauore tam abunde sarciatur,
 ut Gyraldum laboris non pœniteat. Et si
 quis apud te uacat locus, meusq; hic tibi
 addictissimus animus haud ingratus est;
 me pro tua innata humanitate, inter tui stu-
 diosos benigne repone. Vale decus meū,

& hoc qualecunq; est muneris tui

Gyraldi, boni consule.

M. D. XXXVI.

D. ALFONSI ESTEN?

D. M.

ALFONSO ESTEN, FERRARIEN. PRIM. DVCI
INVICTISS. IVSTITIAE AC PIETAT. OBSER-
VANTISS. SAPIEN. PRVDEN. BELLI PACISQ.
PERITIA ET OMNIBVS TANDEM CORPORIS
ET ANIMI DOTIBVS NVLLI PRIM. SECVNDO.

QVI PLANTIS AC REFLANT.

FORTVNÆ VICES ALTERNA VELIFICATIONE
IN HOC VITAE PELAGO ADEO EGREGIE MO-
DERATVS EST VT IN ADVERSIS CONSTAN-
TIOR NE FVERIT AN IN SECVNDIS MODEST.

DIFFICILE SIT COGNITV.

ET QVEM ANN. NATVM LIX. IMPERII ANN.
XXX. P. M. PACE POST INFINIT. PROPOMO-
DVM BELLORVM TVMVLTVS ET SIBI ET PA-
TRIAE PARTA QVASI EIVS FELICITATI INI-
QVISS. INVIDERINT FATA IMPROBA MÔRE
(PRÔ DOLOR) NOBIS ERIPVIT. CYNTH.
IOANN. BAPT. GYRALD. EIVS NVMINI DE-
VOTVS PATRONO AC PRINCIPI INTEGERRI-
MO ATQVE INCOMPARAB. PATRIAEQ. PA-
RENTI OPT. MOESTISS. ATQVE INFELICISS.

B. M. P.

H. H. M. N. S.

*Hic ALFONSE iaces, sed non iacet inclyta virtus
Hic tua: nam celebrat te mare, terra, polus.*

CYNTH.

CYNTHIVS IOANNES BAP.
GYRALDVS D. HERCVLI
Estensi II. Duci illustris.

SI quando tristes luctus lux improba nobis
Attulit, & miseras compulit ad lachrymas:
Nunc illa illuxit, qua nunquam tristior ulla
Est uisa, aut miseris luctibus atra magis.
Occidit ille etenim, decus ingens urbis, & orbis,
ALFONSVS, Latij gloria prima soli.
Heu nostrum cecidit columen, spes maxima regni,
Sospite quo nobis paxq; quiesq; fuit.
Hinc orbis mceret, squallent hinc omnia luctu,
Et nunc urbs omnis nil nisi triste sonat.
Quare ego funerea redimitus tempora fronde,
ALFONSO has miseras persoluo inferias.
Quæ tibi do ALCIDE tristissima munera mortis,
Munera sed cineri persoluenda patris.

CYNTHII

CYNTHII IOANNIS

BAPTISTAE GYRALDI INO.

BITV D. ALFONSI E.

stens. Ducis inuictis,

Epicedion.

AD D. HERCVLEM II. FERRARIEN.

SIVM PRINCIPEM EXCEL-

LENTISS.



NDE mihi lachrymas, gemitus, su-
spira, & unde,
Heu, querulas sumam voces? æqua-
re dolorem

Quis valeam infelix, sæuum quæ
vulnus adegit

In pectus miserum? linquunt me in funere vires,

Atq; oculos haurit pietas, rumpitq; uigorem

Vis immensa mali. Nam non modò gloria prima

Gentis Atestinæ, sed gloria concidit orbis,

ALFONSVS, Dux ille ducum, satus Hercule magnò,

Ausonia specimèn, patriæ dominusq; paterq;

Præsidium nostriq; decus, quo sospite nobis

Pax fuit, & lætos felices duximus annos.

Tu mihi præbe animos, viresq; & carmina dicta

Summe ducum, siue Elysium, seu lucida cœli

Sidera nunc calcas, fragili compage solutus.

*Atesta, op-
pidum est.
quod vulgò
Est.*

A

Nam

Nam chorus Aonidum perculsus funere tanto,
Indulget solum lachrymis : & doctus Apollo,
Fila negat citharæ tristis pulsare sonoræ.

ALCIDES q; tuus, patrias qui tendit in artes,
Mauortis, Phœbiq; decus, qui sceptrâ paterna
Iam tenet, atq; amplas regni moderatur habenas,
Mæstitia pressus, solitum præbere fauorem
Abnuuit, ora rigans largo regalia fletu.

Ergo meis adsis, præsens q; illabere cœptis,
Tu rege defessas vires, animamq; labantem,
Et uirtute tua numeros nunc dirige nostros.

Non tamen hic referam præconia maxima laudis
Ipse tuæ, aut magnos tibi qui debentur honores :
Obstat enim uis magna mali, uoxq; ægra relinquit
Heu, miserum pectus, fractum singultibus imis :
Forte aliâs maiora canam. nunc funera dicam,
Funera, quæ tantos nobis peperere dolores.

Interea Phœbus, Mauors, & bellica Pallas,
Astræa, & sociæ, tundentes pectora palmis,
Astabunt tumulo, simul & solennia soluent
Iusta tibi, inuidit quem terris improba Clotho.

Iam pater omnipotens felici lumine terras
Spectarat præsens, & dulcem uiuere uitam
Præstiterat nobis, hoste inclemente perempto,
Iamq; omnes sacros diuis adolemus honores,
Atq; damus pia thura focis, & munera templis.

Et pater

Et pater ALFONSVS, nostri noua gloria secli,
 Demissum cœlo numen ueneratur amicum,
 Farnesium, qui orbi requiem, nobisq; perennem
 Concessit pacem, felicesq; annuit annos :
 Et lætis totam complent clamoribus urbem
 ALCIDES, fratresq; simul, populusq; patresq;.

Paulū III.
 qui prius
 erat Alexā-
 der de Far-
 nesijs.

Rupit at inuisum nobis data gaudia fatum,
 (Sic cesset quisquam spem rebus ponere lætis,
 Nam nulla est terris unquam sincera uoluptas)
 Namq; iocos inter, magna inter gaudia nobis
 ALFONSE, heu, raperis, dum febris lethifer æstus
 Te exurit, totosq; ardens depascitur artus.

Sic quem non hostes, non mille pericula belli,
 Non structæ insidiæ potuerunt uincere, uicit
 Febris, & ante diem demersit funere acerbo.

Non tantum ingemuit Marcello Roma perempto,
 Nec tantum chari Theseus post fata parentis,
 Quantum morte tua Ferraria luxit, & omnes
 Ausoniæ populi. totus te fleuit & orbis,
 ALCIDES q; tuus : qui uicesto è pectore largos
 Effundit gemitus, lamentisq; æthera complet.
 Hic etenim subita perculsus morte parentis,
 Imperio haud lætus tanto, solio ue superbo,
 Longum hæsit busto infelix, lachrymansq; gemensq;.
 Utq; animam potuit tristis deducere ab imo
 Pectore, & immenso uoci laxata dolore

Est uia singultanti, hos fudit pectore questus.

Te ne, ô chare pater, te ne impia fata tulere ?

Te inuidit fortuna mihi ? cum læta uenirent

Tempora, quæ fuerant longo quæ sita labore ?

Aeterno tibi sic clausit mors lumina somno ?

Et me nunc tanto fecit superesse dolori ?

Quid iuuat armatas toties struxisse phalanges ?

Quid ferro fudisse acies ? hostesq; superbos

Strauisse ? & templis uexilla locasse deorum,

Alme parens ? si cum pacem morte attulit hostis

Inclemens, rapuit quem nunc clementia diuûm,

Occidis, & moriens solatia parta relinquis ?

(Me miserum, humanis quæ stat fiducia rebus ?)

Te pater extinctum uideo, quem uiuere secla

Nestoris optabam : quis te mihi casus ademit ?

Hoc erat, hoc ipsum, quod pridem dire Comete

Prædixti nobis radijs, & crine minaci.

Anno enim Hoc ipsum ingenti consumpta & regia ab igne

1533. con- Signarat quondam, (si mens non læua fuisset)

fla grarat Pro dolor, ô nati miseri insanabile uulnus,

aula. O sæua, ô nimium, nimium crudelia fata,

Exaturata meis damnis. quæ uita futura est

Nunc mihi ? quis ue meos casus solabitur ? heu, heu,

Gaudia nostra tulit secum mors atra parentis.

O te felicem, nostro qui ex orbe remotus

Frater agis, tantum & crudeli à funere distas.

Nam

Non tibi sit quamuis iustissima causa dolendi,
 Attamen id poterit sæuo dare frena dolori,
 Quod tibi non rapuit Clotho te dira uidente
 Egregium patrem, tenebris nec mersit opacis.
 Pressi equidem (fateor) languentia lumina, pressi
 Extremamq; animam legi morientis ab ore.

Ast oculis, his inquam oculis, mala funera uidi,
 Et tot sæua mihi fixerunt spicula pectus,
 Quot patris in letho tristis pia munera obiui.

Heu uitam uiuo inuisam, nec regia sceptras
 Extincto me patre iuuant, nec reddere iura
 Pacatis populis: mihi purpura sordet, & aurum.

O mors inuisa, & rebus contraria nostris,
 Quid te (me miserum) quid te, crudelis, adegit
 Eripere (heu) nato miserando funere patrem?

O saltem liceat simili mihi sorte dolorem
 Finire, & simili tecum me occumbere fato,
 Chære parens, tecumq; animam hanc effundere in auras,
 Ut liceat solitas audire ac reddere uoces.

Ast immota manet, lachrymis nec flectitur ullis
 Sors sæua, & surdo iacto mea uerba sepulchro,
 Et mutos queror ad cineres. ô cura, dolorq;
 Languentis nati, quondam mea magna uoluptas.

O satis inuise parens: en accipe honores
 Extremos, tibi quos deflens in funere soluo.
 Aeternum sælixq; uale, certissima nostri

Spes quondam, patriæq; & gentis gloria nostræ,
Extremumq; ualé genitor, decus addite diuis.

Spargite humum folijs, gelidos dum condimus artus,
Manibus & pia uota damus. Tu cinnama funde,
Purpureos frater flores : ego balsama, amomum,
Cumq; his æternos gemitus, miseranda dolentis
Munera, chare pater, nati & miserabile pignus.

Talia dicentem mœstissima regia coniux,
Fœmineum specimen, lachrymis comitatur obortis :
Frater & Hippolytus, patriæ spes altera nostræ,
Egregiumq; decus, cui gloria magna galeri est
Debita purpurei, (quod Iuppiter anuat ipse.)

Et populus, patresq; simul, iuuenesq; senesq;
Lamentis urbem complent, atq; æthera fletu.
Nunc cœlum, nunc fata uocant crudelia, & ipsum
Sæpe Iouem damnant, prisca quod commoda uitæ
Abstulerit miseris, & ruperit otia parta,
Nec lachrymis finem, magnis nec questibus unquam
Fecissent, subito ni summo à uertice cœli hæc
Vox audita foret, luctus quæ pressit inanes.

O tandem grauib; requiem præstate querelis,
Inuiçte ALCIDES, fratresq; & DiA RENATA,
Inuiçti ALCIDAE coniux rarissima, coniux
Tanto digna uiro, magnis uirtutibus auçta.

Nam pater omnipotens, nutu qui temperat orbem,
Magnanimũ ALFONSV M sublimem uexit ad astra,
(Posce-

(Poscebat matura polum nam regia uirtus)
 Postq̃ obitum æternos ipsi est largitus honores.

Hicq̃ inter latas animas, cœtusq̃ beatos,
 Felix morte sua, magna comitante caterua
 Heroun, ætherias lætissimus incolit arces,
 Nil mortale tenens, & lucida sidera calcat:
 Immixtusq̃ deis, suprema in sede locatus,
 Et lunæ solisq̃ iubar miratur, & orbis
 Arcana inspectat, rerumq̃ elementa recenset:
 Illarum uentus uarios, seriemq̃ futuri,
 Quid natura queat, qua sidera lege mouentur,
 Vnde hominum, pecudumq̃ genus, unde imber, & ignes,
 Vnde mare, & tellus, & fulmina, uentus, & aër,
 Miraturq̃ genus, famamq̃, & fata nepotum.
 Felicesq̃ annos uobis, felicia poscit
 Secula, & optatam per tempora longa quietem,
 Et lætus felixq̃ alto de uertice cœli
 Te spectans, nati factis sua cedere gaudet.

Nec enī passus fastidia longa, nec annis
 Occubui primis, nec dum crudelia bella,
 Bella per laliam multum grassata pararent
 Imperio exidium uestro: sed pacis ubiq̃
 Semina conspexit, fructus paritura beatos.

Te egregium forma iuuenem, & præstantibus ausis
 Insignem A. CIDE, patrias iuisse per artes,
 Et belli, paci q̃ simul iam munera obisse.

Hippolytumq; tibi iunctum pietate, fideq;
Iunxit Amyclæos ut quondam gratia fratres.

Franciscumq; sibi uidit nomenq; decusq;
Quæreret, & æternis famam protendere factis.

Adde, quod uxorem, qua nulla uenustior usquã est,
Virtute aut maior, aut sanguine maior auito,
Deiunctam sancti uidit tibi fœdere lecti,
Nec non & pulchra factum te prole parentem.

Namq; est Anna tibi, cuius de lumine lumen
Sidereum fulget, cui regia splendet in ore
Forma puellari, blandum cui gratia ridet,
Quæ tibi magnanimos sublimi è stirpe nepotes
Gignet, & egregios ingenti munere laudum.
Quid memorẽ Alfonso? gestis qui, ut nomine, magnũ
ALFONSVM referet, famamq; æquabit olym̃o.

Tu quoq; nunc tristes luctus, Ferraria, pelle,
Et plausu magno, magnum uenerare parentem,
Quem tibi demisit cœlo pater ipse decorum,
Huius ut auspicijs inter caput inclyta tollas
Vrbes Italiæ felix, longumq; quieta,
Et regni fines extendas solis ad ortum,
Solis ad occasum, necnon Aquilonis ad oras,
Australesq; plagas, summo & potiaris honore.

En redit illa dies tibi, qua Saturnia secla
Prouenient cœlo. ueterum nam damna malorum
ALCIDES, magnus uirtute, insignis & armis,

Iustitiaq;

Iustitiâq; potens, soboles certissima diuûm,
 Sarciet, & longa soluet formidine terras,
 Bellorumq; faces, monstros ex orbe fugatis
 Extinguet, tribuetq; tibi per secula pacem.

En iam candidior Phœbus caput exerit undis,
 Clarius & solito splendescunt lumina olympi,
 Et blandum heroi rident cœlestia fata,
 Atq; ipsi dignos cœlo largitur honores
 Iuppiter, & terras superis Astræa relictis
 Iam colit, atq; Fides, sceleris uestigia nulla
 Apparent terris, uiget undiq; & undiq; Virtus.

Farnesiusq; pater, lacero præfectus ouili,
 Romanæ sedis præses, atq; arbiter orbis,
 Qui cupit Italia lethale auertere bellum,
 Et Marti præferre togam, placidamq; quietem,
 Egregij iuuenis miratus pectoris artes
 Hunc fouet, & magnæ persolvere præmia laudi
 Iam parat, hunc merito iam iam dignatur honore.

Et Cæsar rerum dominus, quem Iuppiter ipse
 Concessit terris, lata ut per secula mundum
 Possideat, Latioq; decus uictoricibus armis
 Restituat, felix super & Mæotica regna,
 Et Babylona feram, & septemgemini hostia Nili
 Proferat imperium, & populos, gentesq; superbas
 Excindat uirtute sua, pellatq; rebellem
 Regnatorem Asiæ, simul & cunabula ueri

Numinis (heu facinus) tantos uiolata per annos,
Vltus agat uictor, spolijs Orientis onustus,
Miratur iuuenem inuictum, qui nomine magnum
Reddit auum, patrem reddit qui ingentibus ausis:
Huncq; cupit patrium pacata per otia regnum
Perpetuis regere imperijs, & pace perenni.

Hinc pater Eridanus, cubito qui innixus, & urnæ
Defleuit longum, nymphasq; ad tristia ciuit
Munera, & amissum decus est conquestus in undis,
Iam lætus, uultum placido nunc tollit ab amne,
Et te felicem tanto Ferraria rege,
Seq; uocat, tanto & felix se iactat alumno,
Quem pietas, quem rara fides, quem gloria belli,
Marcello similem reddet, similemq; Camillo.

F I N I S .

HERCV-

HERCVLES ESTENSIS

DVX SALVTATVS.

LILIVS GREGORIVS GYRAL-
dus ad Cynthium Ioan. Bapti-
stam Gyraldum.

Quid dudum lepidum nouum libellum
Cessas edere, mi diserte Cynthi,
Quem leui modò pumice expolisti?
Nil est quod uereare, nil timendum
A sannis tibi sellulariorum,
Quando his primitijs tibi parasti
Insignem capiti tuo coronam,
Quam frustra cupiant senes habere.
Ergo ne tibi gloriam inuideto,
Nec quicquam dubites, diserte Cynthi,
Musis, & sacer Herculi est libellus.

D. HERCVLI ESTENSI
Duci inuictissimo.

ALCEDE patriæ rector, dominusq; paterq;
Sub quo læta quies, et bona cuncta uigent.
Cum tua sceptræ leges, tenui quæ carmine dixi,
Conueniens regi pone supercilium.
Nec licet æqua tuis referant mea carmina factis,
Tu tamen hæc ueri pignus amoris habe.
Mens mihi maior erat: sed cum sim uiribus impar,
Deficiantq; humeri, sit uoluisse satis.

AD

AD ILLVSTREM GALEATIVM
Estens. Tassonum Comitem
clarissimum.

TAssone Aonidum decus et memorabile Martis,
In quo uerus honos, gloria uera nitet :
HERCVLIS absolui tandem felicia sceptrā,
Ut tulit angusti temporis hora breuis.
Tu modò fac, quæso, uotis ut leniter adsit
Dux nostris, placidoq; hæc simul ore legat.
Sic tua Mars semper felicia uota secundet,
Sicq; canat Phœbus fortia facta tua.
Hoc mihi si dederis, si Dux arripserit ausis,
Tu mihi Mœcenās, is mihi Cæsar erit.

CYNTHII

13

DVX SALVTATVS.
 CYNTHII IOANNIS BAPTISTAE GYRALDI
 HERCVLES ESTENSIS
 DVX SALVTATVS.



Hactenus ALFONSI defleui funus
 acerbum,
 iam satis indultum est lachrymis, inter-
 xere chartis

Maiores est animus. Nunc o nunc Phœbe canenti
 Suffice plectra precor, cœptisq; illabere nostris,
 Tuq; adsis decus Aonidum, fortissime regum
 ALCIDE, Marti simul & gratissime Phœbo,
 Gloria Atestinae, decus & memorabile genis,
 Fama ingens, uirtute ingens, ingentior armis,
 Quo gaudet rege, & gaudet quo patria patre,
 Spes regni, spes fida mei, spes fida meorum.
 Te sine nil nostræ possunt audere Camœnæ,
 Summe ducum, famæ tu pars es maxima nostræ,
 iam fletus, iam siste graues, sat lumina, sat iam
 Regales maduere genæ: te gaudia poscunt,
 Quæ nunc pertentant totam feliciter urbem.
 Huc oculos, huc uerte animum: Nunc respice uatem,
 Qui tua sceptrâ canit, cœpto & succurre labori.
 Maius opus moueo, quàm possim uiribus ipse
 Ferre, etenim uirtus tanta sub mole fatiscit.

CON-

VT uox è cælo nostras demissa per aures
 Indixit lachrymis finem, sæuq; dolori,
 Et nobis, patriæq; nouos promisit honores:
 Incensi patres dictis, omnisq; Senatus
 Te regem, ALCIDE, statuunt, ipsamq; iuuentæ
 Aetatem ad tantos regni perferre labores
 Haud dubitant aptam, certi grauitate, fideq;
 Quid possis, quantum & ualeat tua uiuida uirtus,
 Iustitia, & pietas, nec non & conscia recti
 Mens, qua nunc totum nomen diffundit in orbem
 Fama tuum, priscis & te iam regibus æquat.

Hinc desiderium minuunt genitoris adempti,
 Et fletus sistunt, simul & lachrymantia tergunt
 Lumina, & Herculeum nomen super æthera tollunt.
 Fit strepitus tectis, resonant clamoribus auræ.

Tum iuuenū glomerata manus, procerumq; caterua,
 Diuerso insistunt operi. nam uestit amictu
 Pars niueo regem: capiti pars altera celsum
 Dat decus, auratum lateriq; accommodat enssem.

HECTOR SACRATVS

Plebis Tribunus.

MOX

MOX sceptrū insigne, & gemmis fulgentib, aptū
 Hec̃tor sacratus, plebis qui iura tuetur,
 Heroum lux alma, ingens, meritisq; uerendus,
 Vt bene cōmendat transactæ gloria uitæ,
 Et pacis studium, & pietas, & publica cura,
 Inuictō ALCIDE tradens: En accipe, dixit,
 Quæ tibi dant pridem uirtuti debita tantæ
 Vnanimi cum plebe patres, felicia sceptra,
 Ad quæ fata uocant te, Princeps: cura tuorum
 Sit tibi, tuq; precor, propius res aspice nostras.

Dixit, at ALCIDES regali indutus amictu
 His gaudens donis, & tanto lætus honore,
 Regia sceptra capit, placidus dehinc talia fatur:
 Non erimus regno indecores, urbs ipsa parentem,
 Non regem accipiet, sic Di pia uota secudent.

Nec plura his: manibus gestans uenerabile donum,
 Ad fora descendit, magna comitante cæterua.

ALCIDEN gaudent certatim cernere cuncti,
 Regali insignem sceptro, cui fulget in ore
 Fortunæ maioris honos, lumenq; iuuentæ
 Purpureum, & quicquid clari tribuisse uerenda
 Maestas potuit, uirtutum & lumina late
 Luminibus fundit, iam sese illustrior ipso.

Sic sol cum cæcas discussit lumine nubes,
 Auricomumq; iubar spargens, caligine densa
 Obsessum pridem, radijs fulgentior ardet.

TVM Geticum alipedem niueo candore nitentem,
 Cervicem tollentem altam, flammâq; cicientem
 Naribus igniuomis, quo non præstantior alter
 Aut cursu superare alios, aut sternere pugna,
 Conspicuum forma, mandentem dentibus aurum,
 Ornatu tectum niueo, phalerisq; superbum,
 Et cono præsignem albo, cui plurima collo
 Gemmarum pendet series adamante corusco,
 Adducit Regi ALCIDAE fortissimus armis
 Et pace Alfonsus clarus, lux inclyta secli
 Huius, & egregijs æquans sua nomina factis,
 Religiosus eques. Dum regi adducitur, ipse
 Telluri insultat sonipes, gressusq; superbos
 Adglomerat, fremituq; forum simul implet acuto:
 Ac uelut inuicti Regis cognoscat honores,
 Ardet inexpletum domino supponere tergus,
 Exultans, tunditq; solum, & auribus acer,
 Et domino haud segnis sese letissimus offert.

HERCVLES ESTEN. DVX

equo inuectus.

HVnc agilis sumptis Heros conscendit habenis,
 Perq; urbem graditur sceptro decoratus auito,
 Non clypeo armatus, galea tectus ne comanti,

Non

Non hasta, non ense ferox, ut sæpe solebat
 Quando ante ora patris pugnae simulachra ciebat
 Terribilis, Martemq; ipsum referebat in armis:
 Siue hastam manibus caperet, seu stringeret ensen
 Fulmineum, peteret ue feras magno impete turmas,
 Alipidem ue citum ferratis calcibus acer
 Ad cursum urgeret, premeret ue sonantia frena,
 Aut læua in gyrum facili uersaret habena,
 Siue hunc calcari stimulans se attollere in altum
 Cogeret, & saltu liquidas assurgere in auras:
 Sed grauis aspectu, clemens, placidusq; serena
 Ora gerit, placidam cunctis spondentia pacem.

HERCVLES TVRCVS BER-

lingierius Neopolita-
 nus comes.

H Vic hæres læuo lateri pedes, optime bello
 Turce, ducis nostri claro qui nomine gaudes,
 Ore grauis, forma insignis, præstantibus ausis,
 Gentis honor Turcæ: dextro, non indecor armis,
 Belliger Enceladon, ferrugine clarus Hibera,
 Parthenopeq; satus, tenerorum assertor amorum,
 Eximium cui fama decus, nomenq; parauit.

GALEATIVS ESTEN. TAS-
 sonus comes.

B lstonius quem portat equus, fortissimus anteit
 Hippodamus, cura egregij certissima Regis,

B Et Marti

Et Marti, & Musis gratus, pulcherrima Iuli
 Tassoni soboles, haud inficianda parenti,
 Diuinum spirans oculis, cui pectore fulget
 Tortile distinctum baccis fulgentibus aurum,
 Auratum indutus sagulum, mirabile textum
 Palladis, atq; artis diuinæ pignus. honorum
 Muneris hic hæres patris, quem robur in armis,
 Et pæce incorrupta fides, & clara sub alta
 Sidera fama tulit, præsignem grandibus ausis
 Ensem, insigne decus, gemmis, auroq; superbum,
 Inuictæ ALCIDAE præfert, mirabile uisu,
 Quantam hic ostendet speciem, quantusq; serenæ
 Frontis honos niteat, quanta & sit gratia formæ.

Talis erat Mauors, cum se fulgentibus armis
 Exuerat, galeaq; ignem flammæq; uolente
 Nudarat sacram faciem, campumq; patentem,
 Vectus equo, & pressis gressum moderatus habenis
 Lustrabat gestans dextra memorabile ferrum.

AVGVSTINVS MEDIO-
 lanensium legatus.

C Andenti ast inuectus equo doctissimus ille
 Augustus senior, magni qui hic munia Regis
 Insubrum prudenter obit, lux addita nobis,
 Cui geminam tribuit puero Tritonia linguam,
 ALCIDEM iuxta graditur, pars maxima pompæ.

D V X S A L V T A T V S. 19
HIPPOLYTUS ESTENSIS AR-
chiepiscopus Medio-
lanensis.

IT comes Hippolytus, sacro uelatus honore,
Flos ueterum, uirtusq; uirum, spes altera regni,
Purpurei quem certa manent decora alta galeri.
Hunc Musæ, Phœbusq; iuuant, cultusq; deorum,
Et pacis studium: sed ubi Mauortia signum
Dat tuba terribilis, poscitq; in bella phalanges,
Belli æstu flagrat, Mauortis concitus cestro,
Atq; ardens feruet circum præcordia uirtus,
Nec dubitat uitam uera pro laude pacisci.
Et si forte ferox nitidis sese induat armis,
Et galeam capiti imponat fuluo ære coruscant,
Terribilem & cristis galeam, flammisq; minacem,
Fulmineumq; ensen lateri succingat habendum,
Hunc credas bello Graduum uincere patrem,
Siue pedes stricto moueat fera prælia ferro,
Siue inuectus equo concurrat fortibus hastis,
Aut inflectat equum, campo seu currere aperto,
Et uolucres rapido cursu præuertere uentos
Cogat: siue arctis currentem sistat habenis,
Hinc aut hinc agitet, uel paruum uerset in orbem,
Seu glomerare gradus, librare aut corpora saltu
In tenues auras stimulis compellat acerbis.
Maeste animo, Hippolyte, & proles dignissima patre,

B 2 Et fratre

20 HERCVLES ESTEN.

Et fratre ALCIDA dignus, tibi numina diuū
Aspirent, uotisq; tuis feliciter adsint.

ALFONSI DVO ESTENSES.

His sese comites addunt Alfonsus uterq;
Patre ambo digni, pariter claræ indolis ambo,
Virtutisq; ambo atq; animi monumenta paterni:
Quos olim, non iam Penei ad fluminis undam,
Sed magni Eridani ad ripas pulcherrima Daphne,
Illa tuos Daphne, Pæan, quæ spreuerat ignes,
Non laurus, sed iam propria sub imagine formæ,
Edidit ALFONSO dias sub luminis auras,
Sorte sua Daphne felix, & prole beata.

GVRONVS ESTENSIS.

Cumq; his incedit consanguinitate propinquus
Antiphates regi, multo pellucidus auro,
Acer equo, fortisq; pede, & memorabilis armis,
Atq; ingens belli fulmen cum prælia miscet.

IACOBVS ALVAROTVS
& Francinus Ducis à
consilijs.

ET tu magne Solon, magnum qui Nestora uincis
Consilio, pietate Numam, grauitate Catonem,
Summus honos Pataui, populos cui sæpe regendos
Credidit ALFONSVS, Regem comitaris euntem.
Teq; Dracon sequitur, toto celeberrimus orbe:
Ille Dracon scelerum terror, uindexq; bonorum,

Fasq;

Fasq; piūq; colens, miseris noua gloria seclis.

MARCVS ANT. BEGAT-
tus prætor.

INsequitur Prætor, quem nulla æquauerit ætas,
Iuris honos gemini, titulisq; ingentibus auctus.
Iustitiāq; potens, nomen qua inuexit olympto.

LVDOVICVS CATO I.V.
consultus.

ET tu magne Cato, legum decus, urbis & ingens
Gloria prima tuæ, qui latè diuite fama
Aeternum fundis tua nomina clarus in æuum,
Mente potens, quamuis sit morbo debile corpus,
Is comes, & magnum sequeris, tua gaudia, Regem.

OPIZZO REMVS ET ALEXAN-
xander Guarinus à secretis.

Affuit & nomen tribuit cui fama perenne
Pace Remus clarus, cui mens imperuia fraudis:
ALCIDAE tantum lætus qui gaudet honore,
Extincti quantum fleuit mala funera Regis.

Tu quoq; qui fueras ALFONSI fidus Achates,
Et nunc ALCIDAE seruas consulta, Varine,
Nomine Alexandri clarus, cui nomen auita
Nobilitas tribuit, cui lactea copia fandi est,
Et Phæbo ante alios gratus, doctæq; Minervæ,
Pegasidumq; choro addictus, cui pectus Apollo
Numine cœlesti complet, cui carmina dictant

B

3

Pegasides



Pegafides, tribuit Pallas cui munera mentis,
 Egregium referens patrem, magnumq; Varinum
 Exuperans uirtute tua, licet inclitus ille
 Eloquio fuerit, geminae & lux unica linguae,
 Qui Florentinam felix orator ad urbem.
 Missus ab ALFONSO, perfunctus munere quantum
 Consilium ualeat, grauis & facundia quantum,
 Monstrasti latè rerum ad tua uota potitus,
 ALCIDAE multum pompæ superaddis honoris.

IACOBVS ACTIAIOLVS.

ACTius, & regi inuicto gratissimus, ille
 Actius, Aonides cui carmina docta dedere,
 Cum puerum abluerent manibus Pimpleide lympba,
 Aeternisq; darent sua nomina tradere chartis,
 Siue elegos caneret, seu Martia gesta cothurno
 Diceret ille graui, Phœbeo concitus œstro.
 Aspice quàm magno reboet caua buccina cantu,
 Hic ubi is Amphimachumq;, & fulmineum Celadunta
 Concinit, ardentesq; uocat in bella phalanges
 Magnanimùm Heroùm, pugnae simulachra cientum,
 Huic meritò adserpunt hederæ, huic pia numina uatum
 Intexunt meritò sacra de fronde coronam:
 Et pater Eridanus tam raro exultat alumno.

ANTONIVS ROMEVS.

ET tu qui Hippolyti curas, arcanaq; seruas
 Pectore sub tacito, primo qui in flore iuuentæ

Et uarios

Et uarios hominum mores, uariosq; locorum
 Nouisti, hos inter uirtutum lumine fulges.

BARTHOLOMEVS FERRINVS.

Indictus Ferrine meo nec carmine abibis,
 Urbis deliciae, primis quem iunxit ab annis
 Docta Erato nobis, praesigni uinculo amoris,
 Cum canerem Daphnem, caneres tu Cypridis arma,
 Ardentesq; faces, saeuosq; Cupidinis ignes,
 Virginis os, habitumq; tuæ, moresq; pudicos,
 Ambo florentes aetatibus, & simul ambo
 Hetrusca Veneri meditantes carmina Musa.

HERCVLES BENTIVOLVS.

Ibas insignis plectro, citharâq; decorus,
 Alcida illustris, gemina cui tempora lauro
 Praecinxit Phœbus, cum te fecere poëtam
 Pierides, sacroq; afflarunt numine pectus.
 Tu felix uates, tibi se dicenda reseruant
 Fortia facta ducis, tibi stat, mihi crede, laborum
 Certus honos, & certa manent te præmia laudis.

ANTONIVS MVSA BRASAVOLVS
 Archiatus.

Istis is mixtus socijs, non indecor arte
 Pæonia, atq; potens rerum cognoscere causas,
 Nec non herbarum uires, usumq; medendi,
 Antoni, gaudes prisca qui nomine Musæ.
 Non tamen immerito: arridet nam Gratia blandum

Ipsatibi, fauet & uotis fortuna secundis,
 Concessitq; tibi puero sua munera Phœbus,
 Pœonia quo fretus ope, & deducere ab Orco
 Extinctos posses manes, spemq; addere uitæ
 Aegro hominum generi, & lethi depellere causas.

ALEXANDER PHARVPHINVS.

PArte alia graderis, caput in superabile bello
 Fortis Alexander, canos qui uertice toto
 Ostentas latè, maiestatemq; uerendam.
 Tu præstans animo, medios irrumpere in hostes
 Ausus es ante alios, densasq; inuadere turmas,
 Acer equo, & pulchram per uulnera quærere famam,
 Vix prima teneras tectus lanugine malas,
 Dum nostra Adriacæ uastarent arua phalanges,
 Et patriam sæua simul obsidione tenerent:
 Afflavitq; tuis tum sors palcidißimæ uotis.
 Namq; acies ferro uictrici rumpere dextra
 Ipsa dedit, lætos & uicto ex hoste triumphos,
 Et quercu & uiridi redimitum tempora lauro
 In patriam ferre, & templis imponere diuûm.
 Dum quoq; Bondinum uastaret sæuior hostis,
 Quid poscat sincera fides, quid uiuida uirtus,
 Monstrasti, immani senior non territus hoste.

MESINVS FURNIVS.

QViste prætereat, tanto decus addite honori,
 Armipotens Furni: Martis generosa propago?

Te nemo

Te nemo aspicijs egit melioribus agmen,
 Hostiles seu tu classes inuadere ferro,
 Siue altos scalis uelles conscendere muros,
 Obsessas ue urbes dubio non Marte tueri.

PAVLVS CONSTABILIS COMES.

Additur huic pompæ Paulus Mauortius Heros,
 Indutus chlamyde aurata, gemmisq; micante,
 Solerti quondam dextra quam Dædala Dirce
 Arte laborarat, non parui pignus amoris.
 Paulus bellipotens, gladio præsignis, & hasta,
 Turpiter haud tergo, sed forti pectore notus,
 Cum fera bella mouet succensus laudis amore.

ALFONSVS TVRCVS.

Hosce sequebatur clarus fulgentibus armis,
 Et clarus forma, satus alto à sanguine regum
 Turcius armipotens: quem dudum (ut fama locuta est)
 Aspiciens Cypri galea & thorace decorum,
 Accinctumq; ense, & minitantem prælia dextra,
 Esse suum dixit Martem. sed cassisse dempra, ut
 Purpureas uiditq; genas, frontemq; decoram,
 Sideribus similes oculos, & labra rubore
 Picta nouo, obstupuit, correptaq; imagine formæ
 Credidit ipsa iterum ploratum uiuere Adonin,
 Pubentes tectum molli lanugine malas.
 Sic gemino, hoc uno, sensit se exurier igni
 Alma Venus, secumq; ait: Hac si pectora flamma

B 5 Vsta forent,

Vsta forent, poterat nobis hic reddere utrumq;
Tantus in ore decor, tanta est uis pectore in isto.

ANDREAS ARCHICOMES.

NEc te præteream, proles clarissima Martis,
Alipede inuictum spiranti naribus ignem,
Euriale, inuicto regi qui pocula misces,
Oppida quicq; regis, quibus indita nomina ab arce,
Sarcæ quam nitidæ decurrens alluit unda:
Vnde fluis, fluctu assurgens, Benace marino.
Tu bello præstans, tu cunctis pulchrior unus,
Excepto ALCIDAE præstanti corpore Regis.

HIPPOLYTUS MALCHIAVELLVS.

NEc Virbi hic deeras, animi plenissima magni
Pectora qui gestas, ueræ non indiga laudis,
Hippolyti pia cura tui, quem Martius ardor
Excitat, atq; ardens generoso in pectore uirtus,
Insignis genere, & magnis insignior ausis,
Diues opum, & pariter bello metuendus & armis.

HIERONYMVS BRASAVOLVS.

Proximus his ibat, dignus melioribus astris
Acer Abas, quem belli olim generosa cupido
Incessit, facie insignem, & florente iuuenta:
Et ni fata forent magnis contraria cæptis,
Hic poterat famam clavis extendere factis,
Siue hastam manibus medios ruiturus in hostes
Stringeret, aut duro pugnaret comminus ense.

ANTON. GALLVS DOMINVS PONTI.

ET dominus ponti, quo non generosius alter,
 Cornipedes agitare manu, cire agmina pugna
 Audet, siue unctæ sese nudare palestræ,
 Exertum ue ensem dextra uibrare potenti,
 Scindere uel densas ingenti robore turmas,
 Cum fera tela iacit, furit & sub pectore Mauors.

CAMILVS TASSONVS COMES.

QUiq; diu nimium properata, heu, funera fleuit
 Coniugis egregiæ, prisca de gente Camillus,
 Vir pietate grauis, meritisq; ac prole superbus,
 Tunc primum iusus risisse, & prima dedisse
 Latitiæ signa, & finem imposuisse dolori.

HERC. TROTVS.

ET qui fulmineos uenientes fortiter apros
 Aggreditur, quoties minitatur prælia syluis,
 Horridus in iaculis, arcuq; insignis eburno
 Venator, celeresq; ciet per inhospita ceruos.

SCIPIO BONLEVS.

NEc te transferim, Tyrio spectabilis ostro
 Scipiades, uitæ illustris, mentisq; nitore
 Conspicuum, multa pariter grauitate uerendum,
 Quem natale decus, claræ quem stirpis honores
 Nobilitant, & rara fides, & uiuida uirtus.
 Tu Ducis in uultum, cognoscens ora parentis,
 Lumina desigis, pendesq; à lumine Regis

Totus inexpletum, & tanto percussus honore
 Nescio quid maius credis tunc HERCVLE magno
 Cernere: sceptrigeri tanta est reuerentia regis,
 Atq; decus summum regali à lumine fulgens.

QVALINVS.

HOS inter lectos procures supereminet alto
 Conspiciendus equo, placido gratissimus ore
 Marcellus, regi ante alios charissimus unus,
 Viq; animoq; potens, nec Martia segnis ad arma
 Marcellus, pulcher Marcellus, Mantua tantum
 Quo gaudet, nullo ut tantum se iactet alumno.

Hos equitum, simul & peditum lectissimus ordo
 Et præit, & sequitur. Vulgus tum lata viarum
 Strata petit, tectisq; effunditur ipsa iuuentus.
 Undiq; uisendi studio, uocesq; per auras
 Immittunt, clamantq; ALCIDAE nomina magni,
 ALCIDEM ingeminant, strepit altis plausibus æther.

Interea strepitu resonat perterrita tellus,
 Tinnitum ex altis dum turribus æra frequentant,
 Et tuba terribilis resonat procul ære canoro,
 Et buxi biformes mulcent dulcedine cantus
 Aetherias auras, & multifono modulatu
 Incurui litui, collucent compita flammis,
 Nullaq; mœstitiæ cernuntur signa per urbem.

Sic ego crediderim quondam duxisse triumphos
 Acres Romulidas, cristatis undiq; turmis

Septos,

Septos, & sacra redimitos tempora lauro,
 Aurato inuectos curru, cum Martia bella
 Gessiſſent fortes, Italisq; hostilia ſigna
 Afferrent diuis, inimico & ſanguine rhædas
 Perfuſas, galeas, enſes, ſæuasq; ſecures,
 Et uictas ſecum traherent longo ordine gentes,
 Et captos reges, oneratos colla catenis,
 Lætitia, plauſuq; uijs ſtridentibus ipſis.

ILLVSTRIS FRANCISCVS

Eſten, Frater Ducis. (ab iſto

AT quantum hic demptū eſt decoris, dum munere
 Frater abeſt, abſens externasq; incolit oras,
 Et parat egregium, nullum quod deleat æuum,
 Ipſe tibi nomen, uirtute incenſus auxita,
 Ante annos animum indutus, curasq; uiriles.
 O felix princeps, ſtellis felicibus orſe,
 Quem Mars bellipotens, & quem Tritonia uirgo
 Excitat, ut magnum genitorem grandibus auſis
 Aequas, & totum factis audacibus orbem
 Sic complere queas, famamq; augere tuorum,
 I, precor, i felix quò te felicia ducunt
 Numina, & egregijs ne quaſo defice cœptis.

FRANCISCVS VILLA

& Marcus Pius.

Multum etiã hinc dempsit præclari abſentia Villæ,
 Atq; Pij, pariter pietate inſignis & armis.

Afforet

Afforet ô utinam tantæ, Dux maxime, uterq;
 Ipsorum pompæ, tantum tua gloria, tantum
 Cresceret, inuictus quantum uirtute palæstræ
 Villa alios superat, quanta & ui fulminat hastam
 In clypeum assurgens, turmis cum se arduus infert.

Et quantum grauitate Pius, probitate, fideq;
 Ingenio, & uirtute potest, & munere fandi,
 Leniat aut dictis animos, aut suscitet iras.

MATTHEVS CASSELLIVS.

NEc tu, Casselli, magnas ad Thybridis arces
 Orator missus, nunc Regis cernere pompam
 Hanc poteris, tanto & præsens gaudere triumpho.
 Sed tibi sat fuerit, si ut Martis sæpe furores,
 Atq; faces belli nostris in finibus unus
 Extincti, in prædam Latias dum uerteret oras
 Inclemens hostis, turbaretq; omnia luctu,
 Nunc quoq; successu componas cætera læto,
 Et nos iam parta semper des pace potiri.
 Sed quid ego hoc moneo? quādo id pia numina spondent,
 Farnesij & pietas, (cui summa est credita rerum,
 Romani imperijq; decus, mundi q; potestas)
 Et fas, atq; pium, nec non & maxima Regis
 Ergo illum sincera fides, & cognita uirtus
 Iam tua Casselli: Tu contra audentior ito,
 Quò tua te fortuna uocat: tu numen amicum
 Deuenerare precor, tibi nam maiora petitis

Farnesius dederit, iustisq; affulserit orsis.
 Hinc uoti compos nostras remeabis ad oras
 Felix, & læto tua te Ferraria uultu
 Accipiet reducem, & tanto pro munere digna
 Præmia persoluet, summoq; ornabit honore.
 Fortunatè senex, semper tua gloria uiuet,
 Viuet, & æterno semper celebraberis æuo.

AD PAVLVM III. PONTI-
 ficem Maximum.

AT tu, Paule pater, diuûm certissima proles,
 Numine sub cuius Saturniâ secula terris
 E cœlo rediere, & ueræ laudis honores,
 Postquam præsidium miseris mortalibus ipse
 Te summus superûmq; sator, pariterq; hominum Rex,
 Demisit cœlo, quò tu pia munera patris
 Aeterni larga dispenses, Maxime, dextra,
 Et placidam terris fausto des numine pacem,
 Respice præclarum iuuenem belloq; togaq;
 Respice, quo tandem felix sub numine tanto
 In patriam longùm regnet felicibus astris.
 Ne quæso, ne uana, Pater, me mitte precari,
 Iusta peto, precibus clemens precor annue iustis.
 Sic ô sic cuncti reges, discordibus armis
 Compositis, ultro pedibus dent oscula sacris.
 Sed mea Farnesij dum magnas dicere laudes
 Mens agitat, cœpti penè est oblita laboris,

Et sinuosa

Et sinuosa dedit sæuis prope carbasa uentis,
 Ausa maris magni campos tranare liquentes.
 Ast ipsam Phœbus suetos intendere cursus,
 Et solitos fulcare sinus, & littora nota,
 Atq; iter inceptum iam iam percurrere cogit.
 Tempus erit, uictor cum diro Oriente subacto,
 Excindet Babylona ferox, latosq; triumphos
 In patriam referet, spolijs insignis opimis,
 Alta triumphali scandens Capitolia curru.
 Nunc cceptum me poscit opus, me regia poscunt
 ALCIDAE Sceptra, ALCIDEN mea carmina dicant.

Templum augustum, ingens, diuis custodibus olim
 Quod patres struxere, foro consurgit ab alto
 Sublime; argentoq; nitens, auroq; superbum,
 Hostili ornatum spolio, centumq; columnis
 Fultum, in quo centum surgunt altaria diuis,
 Aeratis lucens trabibus, cui fornice summo
 Scintillant stellæ, similes cœlestibus illis,
 Queis cœlum rutilat, mediaq; in nocte nitescit.

Est ipsis locus in templi penetralibus altus,
 Quò longis itur gradibus de marmore structis,
 Religione sacer, maiora altaria diuis.
 Hic surgunt magnis, magni hic adolentur honores,
 Regibus hicq; omen regale est sumere sceptrum.

Hic auro stratum solium lectissimus ordo
 Composuit iuuenum, quo Dis præsentibus ipse

Dux ca

Dux caperet regale decus, regnumq; paternum.

Ergo ubi totam urbem, tanto comitatus honore
Lustrauit, Princepsq; forum regressus ad altum,
Ex celeri descendit equo, mox inclytus alta
Templa pedes petijt: Patrum sacer ordo, Senatus,
Nebride contactus, candenti tegmine regem
Exceptum, placido gressu deducit in ædem,
Et celso locat in solio, dominumq; salutat.

COELIVS CALCAGNINVS.

HIC mihi nūc liceat, quādo id sua munera poscūt,
Et locus, & pietas, Cœli pertingere laudes,
Qua potis ille suo tantum est compræhendere uersu.
Eminet hos inter, nullo non carmine maior,
Cœlius, à claro ducit qui nomina cœlo.
Nec sine mente deūm: namq; ipsi lumina cœli
Noscere, & obscuras rerum cognoscere causas,
Iuppiter ipse dedit, nobisq; arcana deorum
Pandere, & erectas ad sidera tollere mentes.
Cœlius hic ille est, qui siue soluta reponat,
Prouocat Arpinum: seu pectine pulset eburno,
Andiadas æquat felici carmine Musas.
Pectore sub cuius (fas sit mihi uera referre) est
Quicquid Graia dedit, quicquid Romana uetustas,
Verius immò loquar, (quid enim manifesta tacerem?)
Huic decus omne suum cessit stupefacta uetustas.

C Hic me,

Hic me, quum primum potuit componere uerba
 Lingua rudis, numerosq; leui connectere cantu,
 Tunc ignota mihi, docuit percurrere Cynihi
 Summa iuga, & lucos lustrare biuerticis umbræ,
 Et fessum Aonio dulci recubare sub antro.
 Hicq; dedit molles per carmina ducere ludos,
 Et tandem Heroum Mauortia dicere gesta.
 Quoq; forent sectanda gradu uestigia Tulli,
 Ostendit latè, duxitq; ad florida casti
 Sermonis prata, & uarios tentare recessus
 Edocuit, simul & lectos hinc carpere flores,
 Et non fucato contexere serita colore.
 Qualiacunq; igitur sunt hæc, quæ carmina pango,
 Quæq; soluta loquor, tibi tandem, maxime COELI,
 Debeo. Nam sine te quid nunc mea carmina possent?
 Sed quamuis laudes, queis nomen ad æthera tollis,
 Solæ opus hoc peterent, tamen ipsum dicere Regem
 Nunc sequar, incepto deducens ordine pompam.
 Hic igitur socijs, læto hoc simul ordine septus,
 Sceptra tenens, folioq; paterno maximus Heros
 Augusta grauitate sedens, & uertice toto
 Exuperans cunctos, radianti lumine fulget,
 Diuinum sibi irans oculis, numenq; repostum,
 Mortali maior forma, tantum instar in ipso est.
 Talis erat (liceat nobis mortalia rebus

Affimilare

*A*ssimilare deūm) qualis cum iura ministrat,
*E*st pater omnipotens, superūm cingente corona.

BARTHOLOMAEVS PROSPER

Ducis à secretis.

ECce improuisus ueluti per nubila uectus
 Præpetibus pennis, qualis Cyllenius alis
 Sese infert terris, Zephyris per inane uocatis,
 Ocyor alitibus, medijs in milibus astat
 Magni ante ora Ducis, cunctis mirantibus, ille
 Prosper, læta ferens Romano à præfule, Prosper
 Scandit ouans bijugi qui celsa cacumina montis,
 Dignaꝫ Musæo meditatur carmina uate,
 Et patrum egregias laudes imitatur, & altos
 Virtutis sequitur calles, loca per uia paucis.
 Curarum Ducis hic custos, fidissimus unus
 A teneris hucusꝫ fuit, semperꝫ erit idem,
 Candida dum Parcæ fusis sua stamina ducent.
 Hic ut erat multo perfusus corpora limo,
 Crura ocreis tectus paribus, crinesꝫ galero,
 Calcarꝫ pedes uinctus, contendit ad ipsum
 ALCIDEN, fidamꝫ illi tunc fatur ad aurem.
 Dein spectans ipsum tantis insignibus auctum,
 Et celso in solio residentem, Maior imago
 Hæc, ait, est hominis. risit Dux optimus olli,
 Tunc Ducis è uultu cumularunt gaudia cuncti.

INterea sacra uelatus ueste sacerdos,
 Religionem deum, & multo uenerabilis æuo,
 Imprimis doctus ritus, moresq; sacrorum,
 Et summo assuetus pia sacra litare Tonanti,
 Et precibus castis iras mulcere deorum,
 Diuinis comptus tænis, Phrygiaq; tiara,
 Et geminas cum uoce manus ad sidera tollens,
 Sacra canens, tales effudit pectore uoces.

Summe deum genitor, rerum cui summa potestas,
 Sidera cui parent, cui tellus paret, & unda,
 Et quodcunq; uiget, cui sunt mortalia curæ:
 Et tu uirginei flos illibate pudoris,
 Numinis æterni genitrix, spes maxima nobis,
 Intemerata parens, nulliq; obnoxia culpa,
 Quam celebrant homines, celebrant quam numina diu:
 Et uos Dij patrij, quorum sub nomine floret
 Vrbs hæc clara uiris, belloq; & scæta triumphis,
 Atq; opibus pollens, & pondere diuitis auri,
 Quis centum fumant aræ, quis lumina centum
 Ignibus assiduis ardent, quis nota feruntur,
 Aspicite hunc iuuenem, patriæ cui cura tuendæ
 Commissa est, regni magna & moderamina auiti:
 Absint urbe doli, fraudes, cædesq; cruentæ,
 Irarum euentus tristes, Martisq; furores,

Ingenti

Ingeni Europam qui concussere tumultu.
 Hic, ô, hic superi, patrij spes unica regni,
 Egregiusq; toga iuuenis, belloq; superbus,
 Felices annos uiuat, longumq; quietus
 Imperium sine fine gerat. iam pellite casus
 Infandos, seruate pium. de marmore templa
 Maiora his ponet, ueterum de more parentum,
 Et pia thura focis, sacrosq; adolebit honores.
 Nos uota & templis dabimus, stata sacra quotannis
 Soluemus, firmate preces pia numina nostras.

Talibus orabat senior, simul ore fauebant
 Astantes cuncti. Tum Iuppiter æthere summo
 Demisit signum, quo non præstantius ullum
 Vota uirum firmare potest, spemq; addere rebus.
 Clarior ipse etenim medio sol fulsit Olympo,
 Vllaq; nec uisa est tum cælo turbida nubes,
 Signa salutiferam nobis spondentia pacem.

Tum solio ALCIDES lætus consurgit ab alto,
 Et placido repetit gressu regalia tecta.

Huic læto occurrit uultu castissima coniux,
 Virginibus stipata suis: ut candida Phœbe,
 Nympharum comitata choro, nemora auia lustrat.

DIA RENATA ET

sociæ.

C 31 Vosô

VOs, ô Calliope, fesso succurrite uati,
 Pandite nunc Heliconæ Deæ, uos numine sacro
 Inspirare animum. Rerum mihi nascitur ordo.
 Namq; nouus Dux ipsa mihi nunc carmine digno est
 Dicenda, & sociæ, uobis dignissima diuæ
 Materies, tantis libeat succurrere cœptis.
 Tu quoq; fida comes Pimplæis addita Musis,
 Dia RENATA meis felix allabere uotis,
 Tu facilis, mitisq; ueni. Tu quæso canenti
 (Namq; tuus te poscit honos, comitumq; tuarum)
 Dia faue, atq; libens numeros nunc dirige nostros.
 Sic tibi, sicq; uiro longum feliciter unâ
 Viuere contingat, regnoq; & pace potiri.

ANNA PARTHENIA

Domina Ponti.

HAs inter comites, nullo fucata colore,
 Læta oculis, auro fuluos redimita capillos,
 Pendula cui medijs splendet gemma papillis,
 Nobilis Anna nites, cun Etis præstantior una
 Parthenia, es tædas quæ sola experta iugales,
 Digno iuncta uiro, nondum perpeffa labores
 Lucinæ, nec facta parens, dignissima cœlo
 Progenies, castis specimen uenerabile amoris,
 Cui doctæ assurgunt modulanti carmine Musæ.

O felix

O felix nimium, Nymphaq; beatior omni,
 Non te donauit frustra Parnaside lauro
 Phœbus, nec frustra afflauit tibi numine pectus.
 Tu cantu syluasq; trahis, tu flumina sistis,
 Et tua perpetuæ commendans nomina famæ,
 Demulces dulci radiantia sidera cantu,
 Dulcia felici concordans carmina plectro.

LEONARDA ESTEN.

E Valieq; Duci consanguinitate propinquas,
 Cui lætos oculis afflauit Cypris honores,
 Deliciæ Charitum, cuius per lumina blandus
 Perq; genas lasciuit Amor, noua cura Minervæ,
 Quam decus omne iuuat, castæ & reuerentia famæ,
 Autollit lætos oculos, faciemq; serenam,
 Et Regis mirata decus, numenq; repostum,
 Tum demum gaudet se tanto è sanguine natam.

RENATA PARTHENIA.

His aderat, Gallæ decus admirabile gentis,
 Par Veneri specie, et tenero maturior æuo,
 Parthenia, à dominæ ducit quæ nomine nomen,
 Crinibus auratis præstans, quos aurea circum
 Fibula subnectit, radiantibus aspera hyacinthis:
 Pingere acu doctas inter doctissima matres,
 Marmoreaq; manu uiuas animare figuras,

40 HERCVLES ESTEN.

Dum varias fingit deducto in stamine formas,
Et tenues telas distinguit murice & auro:
Aonium tentare nemus, lymphasq; fluentes
Permessi haurire, & magna cum laude sueta,
Et Phœbo dare uota libens, & tangere plectrum,
Et dulcem captare chelym, citharamq; sonoram,
Et tenues docto percurrere pollice chordas,
Casta renidenti circumdata tempora lauro.

MARIA NOIANDA.

ET Galatea, nouo uincit quæ lumine Phœbum,
Quæ potis est oculis cœlo deducere diuos,
Digna Iouis thalamo, pulchram quam sæpe Cupido
Esse putat Cyprin, præbet cui sæpe pharetram,
Tela facesq; simul, sinuatum & cornibus arcum,
Queis ferit illa uiros, queis urit saucia corda.
O fortunatus nimium, quem iungere tæda
Deliget ipsa sibi, lectiq; in parte locabit.

HIPPOLYTA MVTI
nensis.

Guidus
Vbaldus

Affuit Hippolyte, præstanti munere diues,
Quod dux Urbinas, correptus imagine formæ,
Esse dedit nymphæ monumentum, & pignus amoris.
Hoc dux cum ualidis pridem concurreret hastis,
Atq; duces inter primos meruisset honores,

Donari

Donari meruit sublimi munere uictor.

ISSABELLA MVTINEN.

PONè sequebatur Tritonidos arte superba,
Candida Leucothoë, casto quæ è pectore spirat
Blanditias, Veneresq; omnes, pariterq; liquorem
Afflat Acidalium, quo flammæ temperat acres,
Quas oculis iacit, & cupidos queis urit amantes.

DIANA ARIOSTA.

NEC tu carminibus nostris indicta Diana,
Pectore sub tenero cui mens est uirgine maior,
Clara parente tuo, & casta clarissima matre,
Cura deum uirgo, innuptæq; simillima Phœbæ,
Inter formosas nymphas pulcherrima, abires:
Quam tot diuino celebrarunt ore poeta,
Vt te iam fama Bætis cognoscat, & Indus,
Quos inter tenuis tenui te carmine dixi,
Ni decus immensum, laudum seriesq; tuarum,
Longius à cœpto traherent: te carmina nostra
Forte aliàs, mea cura, canent. nunc dicere uersu
Reginam propero, uellens quæ leniter aurem
Me uocat, atq; monet cœptum deducere carmen.

Nanq; ego si tentem cunctarum dicere formam
Reginæ comitum, laudesq; æquare canendo,
Non opus hoc sat erit. Quis enim tot munera mentis,

Tot raras animi dotes, tot lumina clara
 Explicet, & breuibus speret comprehendere dictis?

DIA RENATA

Princeps.

SIC igitur Regina choro comitata pudico,
 Clara oculis, clara ingenio, clarissima forma,
 Quam dextra comitatur Amor, Cyprisq; sinistra,
 Et Decor, & Charites, rarus cui fulget ab ore
 Maiestatis honos, atq; altæ mentis imago,
 Et Pudor, & placido comitata Modestia fastu,
 Hac inter socias fulgenti luce coruscat,
 Emicat ut stellas cælo inter Luna minores.

Hæc tereti gestans baccata monilia collo,
 Fulua auro, & varijs late radiantia gemmis,
 Ambrosia perfusa comas, & rore Sabæo,
 Regali induta ornatu (quem Palladis arte
 Ambitiosa manus, uel Pallade doctior ipsa,
 Textilibus filis, fuluoq; intexerat auro,
 Ductaq; Erythræis uariarat fila lapillis,
 Tethyos è gremio lectis, uiridiq; smaragdo)
 Non lachrymans, tristi ue irrorans pectora fletu,
 Ut soceri in letho. Sed talis læta sereno
 Excipit ore uirum, qualis cum Phosphorus atras
 Euicit nubes, cælo scintillat aperto,
 Vel quali amplexu luno Saturnia magnum

Est com-

Est complexa louem, cœlestia sceptrâ gerentem,
 Tali diuino splendens pulcherrima honore,
 Excepit Dux ipsa Ducem. Tum gaudia pectus
 Amborum tentant, figuntq; in pectore uultus,
 Lumina luminibusq; hærent, atq; alter ab ore
 Alterius pendet, tacito & sermone loquuntur,
 Et dextræ iungunt dextram. Tum maximus Heros
 Regalem ad thalamum tendit, præeuntibus ipsi,

ANNA ET ALFONSVS
 Ducis filij.

Alfonso atq; Anna, natis. hanc esse putares
 Auroram, cœlo rosea ceruice nitentem,
 Illum Luciferum, claro qui lumine cœlum
 Irradiat, nondum præbente crepuscula Phœbo,
 Amborum egregio tantum decus enitet ore.

Vt uero ad Pario constructa è marmore lecta
 Est uentum, argentoq; auroq; nitentia late,
 Regificis compta aulaïs, ostroq; rubenti,
 Atq; omnes pariter regali basia dextræ
 Fixerunt thalamo in medio, mirabile dictu,
 Cunctorum quæ facta trahunt uentura sorores
 Concordi hæc una cecinerunt carmina uoce.

Salue cura deûm, salue fortissime regum,
 Scipiadas referens factis, & laude Camillos,

Quam bene conueniunt, Princeps, tibi nomina magni
Alcidae, qui monstra fugas, scelerumq; ministros.
O lux Ausoniae, spes o fidissima gentis
Salus, & praesidium regni, columeq; paterni,
Gentis Aetestinae specimen. Tibi candida semper
Pax aderit, magnorum aderunt pia numina diuum.
Nec belli terrere minis: namq; ira deorum
Concessit procul, & colubris implexa Megara,
Bella manu pridem intentans, caedesq; cruentas,
Iam loca senta situ, Lethaeasq; incolit oras,
Clausaq; bifrontis sunt ferrea limina Iani.
Hic centum uincti nodis, centumq; catenis
Et Furor, & Lethum simul, & furialis Enyo,
Ore fremunt, oculos suffecti sanguine, & igni.
Otia semper erunt, patrijsq; uigebit in oris
Lata quies, aberuntq; doli, fraudesq; nocentum.
Hicq; dies populo felix, patribusq; beatus
Semper erit, nulloq; unquam delebitur aeo:
Sidere quo fausto subiisti pondera regni,
Tu felix uiues: tibi seruiet ultima telus,
Haec eademq; manent uenturos fata nepotes.
Te circumfiliet gemmae Gloria pennis,
Astabunt Charitesq; tibi, Pallasq; Venusq;,
Gradivusq; pater, simul & crinitus Apollo,
Iuppiter atq; tuis afflabit leniter ausis,

Aeternumq;

Aeternumq; tibi tradet post funera nomen
 Candida fama, tuæ uiuent per secula laudes.
 Et pia sacra, quibus semper celebrere quotannis,
 Vrbs hæc instituet, diuū & decorabis honore.
 Eridanusq; tuus supra septemplex ora
 Vndantis latè Nili, lateq; fluentes
 Indumq; & Gangen, fontemq; binominis Istri,
 Attollet sese, redimitus tempora fronde
 Populeæ, Duce te nomenq; ad fidera tollet.
 O fortunatos nimium, nimiumq; beatos,
 Quis pater ipse deū, quis & pia fata dedere
 Imperijs parère tuis, Rex optime Regum,
 Quem miræ exemplum uirtutis misit ab alto
 Rex superūm cælo, mundum ut caligine densa
 Obsessum eriperes tandem crudelibus umbris.
 Te Duce cana Fides, Pietas, & quicquid honoris
 Esse potest, terris aderit, fugientq; malorum
 Flagitia, & sceleris fugient contagia prisca,
 Reddetur Latio imperium, rediuiua resurget
 Ausoniæ penè exanguis iam gloria gentis.

Hæc ubi concordî cecinerunt numine Parcæ,
 Egressæ thalamo, tenues abiire per auras,
 Ambrosio & tecta implerunt regalia odore.

Ergo age summe Ducū, postq; hæc tibi fata benigna
 Omnia portendunt, placido & tibi Gratiæ uultu
 Arridet,

46 HERCVLES ESTEN.

Aridet, uotisq; tuis Fortuna secunda est,
 Fac, precor, hæc nobis firmet tua maxima uirtus;
 Virtus, quæ iugi faciet te uiuere fama.
 Sis bonus ô felixq; tuis, regniq; paterni
 Commoda defendas, & quæ facis, otia serues.
 Omnis spes in te nostra inclinata recumbit,
 Tuq; salus nobis, columen, tu gaudia nostri,
 Tu dominus patriæq; pater, requiesq; laborum.
 Virtutes namq; in te omnes splendescere cuncti
 Cernimus, & magnos tua facta imitantia patres
 Hoc fore promittunt, hoc spondent numina diuam,
 Numina, quæ euentus lætos, atq; aurea ducunt
 Secula magna tibi, tanto post tempore uisa.

Et si quid de te merui, si pectora quicquam
 Fida tibi possunt, & mens sibi conscia recti,
 Magnaq; si insontes respectant numina regum,
 Nunc me, quem toties fortuna inimica secuta est,
 Et toties tantis iactauit dira procellis,
 Respice, & immerito finem concede labori,
 Quo tandem sub te uita meliore quiescam.

PERORATIO.

HOS tibi summe Ducum numeros, hæc sceptræ ca
 Cū tua te aspiceret lato Ferraria uultu, (nebā,
 Gēstantem dextra magni moderamina regni,
 Forte aliàs tua facta canam grauiore cothurno.

Nunc 8

Nunc ò, nunc tantum, tibi quæ prælusimus, ore
Accipias placido, et uatis, precor, annue ceptis.
Vatis, qui iam te, ceu magnum numen adorat.

FINIS.

IN LIVOREM.

Luor tabifico qui mordet carmina morfu,
Quæ magni ALCIDAE sceptrâ uerenda canit,
Iam dentes, iam conde miser, nihil hic tua possunt
Vulnera, nam ALCIDA uindice tutus eo.

COELIVS CALCAGNIVS:

Quod cultum carmen, quod doctas impleat aures,
Quod secum multum numinis esse probet,
HERCVLEI auspiciâ imperij quod flumine largo
Explicet, & plebis mixtaq; uota patrum,
Laus Gyalde tua est. Tibi enim fas prodere, quantum
Lætitiæ populus attulit una dies.
At mihi adhuc dubium est, hæc an tibi debita laus sit,
An potius raræ debita materia.

LIL. GREG. GYRALDVS.

Desine mirari Pisandri carmina Lector,
Qui clauam Alcida, fictaq; monstra dedit,
Cynthius en nostri canit HERCVLIS aurea sceptrâ,
I modo, quàm ueris ficta minora uide.

FLAVIVS

FLAVIVS ANTONIVS GYRAL-
dus ad D. Herculem Esten.

QVEM fueris nactus uatem, tibi quilibet alter,
Me de fratre uetat dicere plura pudor.
Conijce tu tamen, ipsi quàm sit largus Apollo,
Hunc est dignatus nomen habere suum.
Materiam præbet numeris Tirynthius Heros,
Sed tu materia carmina digna facis.
Ulli tu debes, tibi debet nec minus ille,
Altera in alterius gloria maior inest.

L. G. G. IN D. A. DE
tractorem.

MAEONIDÆ oblitus, carpit dum carmina Cynthi
Zoilus, elinguis sidere factus abit.

LILIVS GREGORIVS
Gyraldus.

ILiuor procul, i' procul, monemus,
Prædico laqueum tibi paratum:
Non unum Genium hic habet libellus,
Victurus Pylios beatus annos:
Cantor Cynthius, Herculesq; carmen,
Et Phœbi est lyra temperata nervis.
Prædixi, laqueus tibi paratus, . .

CYN.

CYNTHIVS GYRALDVS
candido Lectori.



NON eram nescius, Lector opti-
me, cum D. ALFONSI ESTEN-
obitum, bonis sanè omnibus
acerbum, deplorarem, & HER-
CVLEI imperij auspicia carminibus can-
rem, fore ut hic noster labor multorum re-
prehensiones incurreret. Quidam enim, qui
omnia quæ ipsi nesciunt, impudenter dam-
nant, id mihi uitio uertūt, quod ego iam pri-
dem inter altiores disciplinas ascitus, nunc
demum poëticæ penè nunquam aliàs à me
tentatæ animū apulerim: hocq; homine phy-
sico, si Dis placet, indignum ducunt. Qui-
dam autem non hoc tantū, sed meam in Re-
gis proceribus enumerandis diligentiam dam-
nant. Nonnulli ob id nos arguunt, quod
linguæ Latinae rationē non habuerim, cum
horū aliquos barbaris nominibus, ipsis indi-
tis, nominarim. Nec desunt, qui operis lon-
gitudinem accusent, dicantq; nos longè pau-
ciorib. Regis nostri scepra potuisse comple-
cti. Et licet me non lateat, apud integrū iudi-
D cij

cij uiros (non enim sciolis hisce, qui uno aut altero epigrammate, & illo quidem insulso, ab ipsis composito, se summum artis poëticae apicem attigisse sibi persuadent, hæc scriptissimus) me nullam ob hoc notam subijisse: tamen his omnibus respondere, operæ precium fore iudicaui. Hi ergo qui me à poëtica studio, quia Medicinam profitear, deterere conantur, parum nouisse uidentur cur Phœbo & medendi peritiam, & poëtices artem antiquitas dederit. Nam si rem hanc maturius inspexissent, mihi sanè longè æquiores fuissent, ipsis enim palàm esset, nihil esse quod hominem medicum magis deceat, quàm in sacris Musarum penetralibus assidue uersari: & medicinam, unà cum poëtices arte, quas isti aduersis frontibus pugnare existimant, cōiungere. In quam sententiam diuinus ille propemodum artis medicæ professor Galenus, manib. pedibusq; descendisse uisus est, qui pharmacorum compositiones, ut errores magis præcauerentur, carminibus describendas præcepit. quod à medico artis poëticae prorsus ignaro haud fieri poterit. Illud & ipsum artis poëticae studio ualde delectatum

statum ostendit, quod nonnullorum ille
uersus & commemorat, & interdum expo-
nit. Nec defunt temporibus nostris, ut anti-
quis etiam non defuerunt, qui & poëticam
& medendi rationem adeò egregiè coniun-
xerunt, ut in utra præstent difficile sit cogni-
tu. Quorū nomina recensere, ut facillimum,
ita superuacuum esset. Non sim mortalium
omniū insanissimus, si eam artem, quā sum-
mi omnes omnium seculorum artis medicæ
professores tanti fecerūt, ego despiciam. Sed
de his hætenus. Iis uero, qui diligentiam meā
incusant, facile credere, ni illam ipsam à ple-
risq; desiderari cognoscerem. Non enim pa-
rum multi sunt, qui sese prætermittos ægerri-
me ferant. Quid enim mihi in hisce angustijs
constituto faciundum erat, quo culpa uaca-
rem? si ab ijs incusor, quia quosdam recen-
sui, ab istis uero inceptor, quia ipsos prætermi-
misi. Verū (ut cunq; res cesserit) ego louem
lapidem iurarim, me si id res tulisset, longè
plures recensurū fuisse, ut omnibus factum
esset satis. Sed postquam hoc mihi integrum
non fuit, nō ob id tamen alicuius gloriæ tan-
tum inuideo, quod cuiquam prohibeā, quin

eum se arbitretur, quem laudibus extulerim
 (modo ex rudibus hisce carminibus meis ali
 cui facta sit aliqua laudis accessio) & eas pro
 arbitrio laudes sibi arroget, quas magis o
 ptarit. Non enim illos tantum, quos comme
 moravi sed nobiles omnes, sub illorū nomi
 nibus cōplecti mihi animus fuit. Quod uero
 me à linguę Latinę penetralib. arceāt, quòd
 quosdam barbaro nomine ipsorū proprio
 uocarim, iniquè agūt. nam si aliquis hanc no
 tam subire debet, non ego sanè, sed qui ipsis
 ea nomina indiderūt, accusandi sunt. Potuiss
 sem planè illos, ut reliquos etiam, fictis nomi
 nib. appellare: erat enim id mihi factu prom
 ptissimum. Sed quando à barbaris nomini
 bus, cū id res postulauit, Vergilius poëtarum
 omnium parens non abstinuit, quid ego ue
 reri debueram Maronis nostri uestigia secta
 ri? cum quo planè aberrare, quàm cum his re
 ctè sentire, satius ducerem. Euoluant hi Ver
 gilianę Aeneidos monumenta, & ni peni
 tus conuiueant, mihi longè æquiores erunt.
 Qui uero me prolixitatis arguūt, his facile di
 xerim, me nemini occupato, sed ociosis hæc
 scripsisse, neq; nolentem quempiã ad hæc le
 ctitan-

ſtitanda uocare. Quanquã cur hi hanc eandem notam Vergilio inurendam non cenſeant, non agnoſco, qui rem, quam duodecim carminibus nõnulli complexi ſunt, duodecim ipſe uoluminibus explicauerit. Sed iam tempus eſt ut receptui canamus. Tuæ partes erunt Lector optime, & his & cæteris omnibus, quæ mihi detractores obiecerint, occurrere: quo & Gyraldi tui famę conſultum ſit, & ipſi ad alia edenda uires animumq; ſuppedites. Vale, quiſquis eſ, diu felix.

CYNTHIVS IOANNES BAP.

Gyraldus D. Herculi Eſten. II.

Duci illuſtriſſ.

B Alſama, thura, crocum, tradant & grandia dona,
 Queis nitet Attalica conditione domus.

Do tibi populeas frondes, ſyluasq; uirentes,

ALCIDE, inculti munera parua ſoli.

Parua tamen magni non ſpernunt munera Reges,

Parua etiam magno munera grata Ioui.

Tu cape dona libens, dantis ſimul accipe mentem,

Sic tibi erunt parua hæc baſama, thura, crocum.

CYNTHII IOANNIS

BAP. GYRALDI SYL-
uarum Liber.DE LILII GREGORII GYRAL-
di in patriam reditu.N Tandem precibus tantis, uotisq; pe-
titusLilius, & multos pridem exoptatus in
annos,Post terræ pelagiq; minas, post fu-
nera amicū,Et uarios casus, patriæ regressus ad oras
In proprios redijtq; lares, urbiq; decorem
Reddidit amissum, magnis uirtutibus auctus.

Quare agite ô iuuenes, uobis si gloria cordi est,
Si Phœbi sacris haurire è fontibus undas,
Huc properate citi, gressus huc uertite uestros,
Languentemq; senem, confectum & uiribus, omnes
Excipite unanimes læti, fessumq; locate
Sedibus in notis, pariterq; assurgite cuncti
Egregio uati, Musæ cui lilia plenis
Dant calathis, uiridi cui cingunt tempora lauro:
Hic uos ô iuuenes, ducet per amœna locorum
Aonij nemoris, Cynthi & secreta docebit

Florida prata sequi, uatum delubra priorum.
 Ipsi nam puero sua munera Phœbus Apollo
 Tradidit, ut tandem ueteri squallore situq;
 Deterso, obsessas scabra rubigine mentes
 Tergeret, & uates sublimi ornaret honore.
 Edixit omniū felix, cui numen amicū
 Fauerit, ut tanti uatis uestigia firmo
 Sectari sedeat gressu, uirtutis amore
 Siccensus, sociosq; omnes iuga ad alta uocare.

O mihi si liceat Lili, certissima Phœbi
 Cura, decus uatum, geminæ & lux unica linguæ,
 Cyraldæ & gentis specimen, super ardua rupis.
 T: loca sectari sacra, syluasq; repostas
 Ingressi, & Aonias in carmina ducere Musas,
 Qua te uoce canam? Nam quamuis gloria Lili,
 Nil tua me crescat, nostræ non indiga laudis,
 (E: quis tot speret dotes æquare canendo,
 Carminibus ue tibi quicquam superaddere honoris?)
 Ipse tamen (tenues ni dedignere camœnas)
 Insignem uirtute animum, laudesq; repostas
 Tentabo, nomenq; tuum contexere chartis.

Te uero, uenerande senex, si pectore toto
 Accepi, tua si colui uestigia semper,
 Respice me quæso, pater optime, respice, iamq;
 Pierios duc me ad latices, Phœbiq; recessus,

Vt tandem sacris immixtus & ipse poëtis
 Me quoq; tollere humo, claræ & mea nomina famæ
 Commendare queam, nullum quæ deleat æuum.

ARTVS II, HERCVLIS

Esten. uenatoriꝝ ca-
 nis funus.

TV'ne Artuse ferox, post funera mille luporum,
 Post tot confectos ursos, post cæsa ferarum
 Corpora, sic ô sic tu funere concidis atro?
 Demisere neci sic te crudelia fata,
 Delicias domini, & nemorum memorabile fulmen.

Tu tamē ipse cadens mōstras quāmaximā uirtis,
 Quæ tibi uis animi fuerit, quāq; ora tremenda,
 Et uirtute tua morti te subtrahis atræ.
 Sic non te indecorem, non te uirtutis egentem
 Sors inuisa mihi rapuit, nec uulnere turpi
 Pectus hiat, sanguis uē fluit de corpore inultus.
 Nam tecum fera sæua cadit, & sanguine lethum
 Cæsa piat, moriensq; suo dat funere pœnas.

Chare Artuse uale, quo non præstantior alter,
 Aut cursu superare alios, aut sternere dente,
 Blandior haud unquam domino uē fidelior ullus:
 Tu decus ipse canum, te gloria magna sequetur,
 Te eripient letho uates, tibi nomina tradent
 Aeterna, & referent omnes tua nomina saltus,

Venantesq;

Venantesq; tuo ponent pia iusta sepulchro,
 Ipse ego quod uiridi pono sub tegmine quercus.
 Quin tibi sublimi hac pendeat ab arbore millus,
 Fasciaq; & uincla, & ceruix, & tergora sæui
 Hac dextra tandem cæsi crudeliter hostis,
 Mœrentis domini & ueri monumenta doloris,
 Virtutisq; tuæ, nullo delebilis æuo.

Sed si qua est syluis pietas, si gratia fido
 Est referenda cani, nec campis gloria defit,
 Vos Nymphæ nemorum, uos & pia numina Fauni,
 Huc properate precor, funusq; ornatè corollis,
 Aeterna & ueræ concedite præmia laudi.

EIVSDEM EPICEDION.

Ille ingens nemorum fulmen, stragesq; ferarum,
 Occidit Artusus, uulnere cæsus apri.
 Namq; is degeneres dum spernit sternere damas,
 Vimq; suam gestit prodere Marte fero,
 Ut primum uidit frendentem dentibus aprum,
 Indo æquum Barro dentibus, ore trucem,
 Extulit ipse caput, lætusq; ad prælia tendit,
 Quæ formidabat cætera turba canum.
 Atq; prior uastum uelox se immittit in hostem,
 Circuit huncq; sagax, hunc petit ore leui.
 Hinc aper excitus, sese collegit in arma,
 Et frendet nullo uulnere fossus adhuc.

D

5

At simul

At simul Artusus transfixit tergora morfu,
 Exilijsq; cruor, preßit & ossa dolor,
 Falcatos acuit dentes, & fertur in hostem
 Acrior, & flammæ naribus, ore uomit.
 Fulmineumq; rotat rictum: sed fida Molosso
 Addit uim uirtus, nec timet ora suis.
 Quoq; hostem cernit maiora in bella ruentem,
 Hoc magis ipse instat, hoc magis urget aprum.
 Nec mora, iam læuum saliens se immitit in armum,
 Dentibus aduersum ne premat ira suis.
 Acer & ipse feram nunc huc, nunc uoluit & illuc,
 Hinc mordet tergo, mordet & inde latus.
 Sæuus aper resides uiolentior excitat iras,
 Sæuq; lethali prælia dente parat.
 Dumq; ferox sæuit, dum corpora uersat in orbem,
 Excutere & tergo quæritat usq; canem.
 Heu, heu fulmineo rupit præcordia dente
 Artuso, atq; solo uiscera lapsa fluunt.
 Herculeamq; miser prospexit lumine dextram,
 Conscius hic quantum polleat illa manus.
 Ut uero ALIDES, fulmen memorabile Martis,
 Exanguis uidit tristia fata canis,
 Ingemuit, casuq; simul percussus iniquo,
 Alipedem stimulis terq; quaterq; premit.
 Nunquam fide canis, dixit, morieris inulte,

Solut.

Soluet & inferias iam tibi cæsus aper.
 Horrendamq; gemens ualido subit impete molem,
 Transadigitq; hasta uiscera magna suis.
 Infrendet tum toruus aper, spumasq; cruentas
 Euomit, & fædo sanguine turpat humum.
 Intorquetq; caput, præsansq; hastile remordet,
 Instantem satagens ui superare necem.
 Sed pius ALCIDES geminatis ictibus instat,
 Et monstrum forti conficit ipse manu.
 Mugitu nemus omne replet, uastamq; ruinam
 Dat moriens iam iam bellua strata solo.
 Ast aprum ut cernit multa tellure iacentem
 ALCIDES, celeri desilit acer equo.
 Horrificumq; feræ fuluo caput amputat ense,
 Abcissumq; tibi fide Molosse dicat.
 Teq; sua attrectat dextra, mortiq; sua 'ne
 Exanguem possit demere tentat ope.
 Ast ubi te uidit tendentem ad limina mortis,
 Præsidjsq; nihil iam superesse loci,
 Siccine te, dixit, sylua celeberrime in omni,
 Atq; mei custos, abstulit hora breuis?
 Et longum ingemuit: sed postquam uincere fata
 Non possum, dixit, sit tibi terra leuis.
 Spargat odorato uenator flore sepulchrum,
 Crescat & ad tumulos spica Ciliissa tuos.

Quæ de-

Quæ deerunt uitæ, præstabunt tempora famæ
Vates carminibus, chare Molosse, suis.

Tum canis assultans uictori applaudit, & hoste
Iam cæso, lætus fata suprema subit.

Nec secus ac domino uellet persolvere grates,
Soluiſſet buſto quod pia iuſta ſuo.

Qua licet uſq; oculis moriens languentibus illum
Conſpicit, & placida morte quieuit humi.

DE PAVLO III. PONT. MAX.

SI quando curæ ingentes, & ſæua nocentum
Flagitia, heu, miſeros preſſere, atq; horrida bella,
Bella tot egregias Latij graſſata per urbes,
Concuſſere animos nobis, atq; omnia luctu
Impleuere nouo, turbaruntq; otia noſtra,
Nunc quando omnipotens, ſummi regnator olympi,
FARNESIO magnas orbis conceſſit habenas,
FARNESIO, ſacro fultus qui nomine Pauli,
Vel ſolus reſerare fores, uel claudere ſolus
Aeternas cœli poſſet, uel parcere ſonti,
Complectiq; pios, & ſæuos tradere pœnis:
Sumamus uires, lætum Pæana canentes,
Atq; omnes læti numen ueneremur amicū.
Iam nobis pax alma redit, totumq; per orbem
Cernere iuſtitiam eſt, uirtutum & ſemina late
FARNESIVS fundit, magnas qui Thybridis arces
Poſſidet,

Posidet, incursusq; feros, & tristia bella
Italia expellit, famam qui terminat astris,
Fasq; piūq; colit, monstra & crudelia uincit,
Et fœdas pestes sacris detrudit ab aris
Numinis æterni, fœdo quæ crimine tantas
Infecere animas, & CHRISTI nomina seruat
Intacta, & sceleris delet monumenta profani.

Iam uenit illa dies, qua cœlo mittitur alto
Aurea seclorum series, uiget ecce per orbem
Criminibus longè lateq; Astræa fugatis,
Et sociæ, demum tanto pòst tempore uisæ.

Salue summe Pater, mundi spes unica salue,
Atq; gregis nostri custos, decus addite terris,
Maçte animo, maçte & uirtute, & munere laudum,
Cura deūm, cui pax ridet, cui gloria plaudit,
Pontificale decus : ueras tu numinis aras,
Tu cape diuinos, tibi quos largitur honores
Regnator superūm, celsa tu in sede locatus
Tergeminūq; decus cœlestis sume iaræ:
Accipe, quæ tibi dat sacræ moderamina puppis,
Disiectamq; ratem, tantis, heu, fluctibus actam,
Duc Pater ad portus, & densas disijce nubes,
Quæ ueras pelagi stellas, quæ lumina cœli
Occuluere diu, & densa caligine mentes
Implerunt nostras, iam mille erroribus actas,

Da pacem

Da pacem terris, propius res aspice nostras,
Namq; potes, grata & nobis pater otia serua.

Inuictumq; Ducem, cuius sub numine læti
Viuius, ALFONSVM, fama super æthera notum,
Auspicijs tutare tuis, tibi seq; suosq;
Hic offert natos, ipsa & moderamina regni.

ALCIDEN uero iuuenem, cui pectus Apollo
Numine compleuit, Pallas cui tradidit artes
Ipsa suas, belli atq; togæ cui gloria summa est,
Dine fove, & iustis clemens, precor, annue uotis.

AD ILLVST. VICTORI-
am Piscariæ Domīnam.

QVÆ modò deflesti longum lachrymabile funus
Coniugis egregij, quo non generosius ullus
Duxit cristatas in Martia bella phalanges,
Nunc ubi nulla ualent reuocare ad limina uitæ
Amissum DAVALVM lugubria carmina, & ipsum
Sidereos inter cœtus, animasq; beatas
Nouisti æternam cœlo traducere uitam,
Et cinctum radijs, & multa luce coruscum,
Ad superos post se te clara uoce uocantem:
Tu te oblita hominem, diuini numinis haustu,
Despexti mundi (uitæ melioris amore)
Leihales nimium fastus, & diuitis auri
Pondera, fortunasq; & regni sceptrâ mariti:

Aspernata

Aspernata procos omnes, omnesq; hymenæos,
Firma uiro pactum semper seruate pudorem
Supremos usq; ad cineres, & uiuere paruo.

Exuis & Tyrio saturatas murtice uestes,
Intextasq; auro, gemmasq; sinusq; crepantes,
Arte laboratos, non uilia dona Mineruæ.

Nec non & tereti baccata monilia collo
Detrahis : inq; uices horum uelamina nigra
Induis, & nigros habitus, cultusq; seueros,
Queis præclara tegis neglectæ munera formæ,
Cordis certa tui atq; animi monumenta pudici.

Et claros demissa oculos, frontemq; serenam,
Mente colis, totoq; gemens nunc pectore poscis
Affixumq; cruci, & traiectum pectora ferro
Aeternum natum, magnum ætheris incrementum.

Quem grauidam uirgo felix excepit in aluum,
Et peperit (mirum) sine ui, sine labe pudoris.

Huncq; Deum pariterq; canis, fortemq; piūq;
Euersorem Erebi, qui æternæ limina uitæ
Reclusit nobis, & sæui colla draconis
Squamigeri, horrendi, informis, capita alta ferentis,
(Qui quondam pulchræ mentitus uirginis ora,
Decepit primos pellaci uoce parentes :
Impulit & miseros pactas infringere leges :
Quorum nos feri li. imus commissæ nepotes.)

Pressit

Pressit ouans, superas tandemq; euexit ad auras
Illustres animas imis de faucibus orci.

Et mortem uicit, pendens dum stipite ab alto
Exanimis clausit tristis nigra limina lethi,
Inferni uictor populatus regna tyranni.

Dein canis & matrem, tam raro pignore dignam,
Felicem nimium matrem, dum pectore fouit
Virgineo natum: sed qua non tristior ulla
Tunc fuit, ut uidit nati miserabile funus:
Indignum, heu, nimium, nimium miserabile funus,
Transfixosq; pedes clauis, & pectora ferro
Traiecta (heu facinus) nigro & rorantia tabo
Ora, manusq; ambas. cui tu, miserata dolentem,
Te te addis sociam, crudeli in funere nati,
Luminibus lachrymas fundens, & pectore questus.
Moxq; amplexa crucem, duro das oscula ligno,
Vtq; tuo figat cordi sua uulnera poscis
Omnipotens natus, summi mens certa parentis.

Felix, quæ blandos uitæ mortalis honores,
Et mundi illecebras potuisti linquere inanes,
Et cæcas hominum curas, & mentis ab arce
Despicere errantes, quantumq; in rebus inane est:
Deliciasq; æui, simul & cognoscere uera
Dona Dei, atq; uiam palantis quærere uitæ,
Has inter tenebras, cœli & penetrare recessus

Mente

Mente pia, atq; animo superûm commercia habere,
Sorte tua maior, iam te sublimior ipsa.

O utinam talis tecum me exureret ardor.
Sed paucis datur hoc: neq; enim sine numine cœli hæc
Eueniunt nobis. Tu sacri flaminis igne
Acta diu, tu plena Deo, VICTORIA, gressus
I sequere incceptos, ut mors cum soluerit artus
Informi è limo genitos, moribundaq; membra,
Eumenidum fugias thalamos, regna inuia luci,
Pallentes Erebiq; domos, & numine septa
Tartareas uincas pestes, & robore firmo
Vltrices pellas Furias, fera numina Auerni,
Et Sphingas superes, & terribiles Harpyias,
Tergeminumq; canem, tortosq; Ixionis orbes,
Victrix, & parto deuicto ex hoste triumpho,
Immortalem animam mundam omni à crimine culpæ
Des summo genitori, ipsoq; & coniuge tandem
Aeternum ualeas æterna in pace potiri,
Qua dudum coniux fruitor, semperq; fruatur.

ORAT DEVM OPT. MAX. VT SE
ab imminente huius uitæ naufragio
incolumem seruet.

ERgò procellosi semper uis effera ponti
Lactabit cinctam tenebris, & nocte profunda,
E Obsessam

Obseſſam puppim, tot ſæuis fluctibus actam?

Ergo mihi nunquam radiantia ſidera cœli
Cernere erit, tuto'ue unquam conſiſtere portu?
An blando cantu Sirenum, gurgite in alto
Infames trahar ad ſcopulos? ubi nauſraga puppis
Lethalem accipiat laxis compagibus undam?

An me Scylla uorax latrantibus horrida monſtris
Hauriet? aut nauim rapiet metuenda Charybdis?

An medio forſan paſcent mea membra profundo
Et phocæ horribiles, & fluctuagæ balenæ,
Neptuni armenta, & pelagi crudelia monſtra?

Hei mihi, quis dederit ſæuas ſuperare procellas?
Turbida ſunt fluctu uada ſalſa, & nubibus aër
Turbidus, horreſcunt cæcis ſalis æquora nimbis,
Inq; ratem magni montes uoluntur aquarum,
Iamq; notus ſpirat, ſpirat uiolentior Eurys,
Et Zephyrus pelago inſultat ſtridentibus alis,
Irruit & Boreas, fretaq; indignantia uertit
Acrius, increpitat crebrisq; tonitribus æther,
Dum micat igne polus, denſa in caligine noctis:
Concitaq; unda Noto, nunc alta ad ſidera tollit,
Nunc prærupta ruens fert ima ad tartara puppim.
Et fera ſæuit hyems: nec iam ſubducere uela
Prodeſt, uel tumidos remis impellere fluctus.
Iamq; ratis regimen nutat, diuulſaq; tranſſra

Franguntur,

Franguntur, crebroq; labat iam turbine malus.
 Plurima præq; oculis uersatur mortis imago:
 Nec spes ulla artis superest. Non si quoq; Typhis
 Quassatum subeat clauum, reliqua ulla salutis
 Spes erit, hei misero. Tu sacra uirgine nate,

Tu mens certa patris, rerumq; immensa potestas,
 (Quandoquidem libuit nostræ sub imagine formæ
 Versari in terris, cœliq; relinquere sedes,
 Felices nimium sedes, mortemq; subire,
 Quo morte ablueres sceleris contagia nostri,
 Nosq; polo extorres ueheres super aurea tectâ
 Stellantis cœli, regniq; in parte locares)

Tu, tu, qui sanctos duxti per cœrula gressus,
 Nec sacra tumido maduerunt æquore plantæ:
 Et fractos ponto, & uersantes turbine lethi
 Protexti lectos fratres, quos turbidus æstus
 Ceperat, & medio iactabant æquore fluctus,
 Dum traherent fessi captos ad littora pisces,
 Innixi tenui remo, paruq; phasello.

Nunc mihi nunc misero, quando tibi nubila parent,
 Horribilesq; tibi uenti famulantur, & undæ,
 Et maris undisoni fluctus tua iussa capeffunt,
 Sterne iter ô placidum, ut læto uada cœrula cursu
 Peruolitem, atq; grauis non obstrepat unda carinæ:
 Iam ponat Boreas, pelago dominantur aperto

Pacati Zephyri, ducant qui marmora flatu.

Adnent Nereides, & mitis Cymodocea,
 Diua potens ponti, glaucarum prima sororum:
 Infensos pellat fluctus, sæuūq; tridentem
 Neptunus ponat, Tritonq; coërceat undas,
 Cæruleus Triton, curua & uocet æquora concha:
 Armatusq; ensem ponat nimbosus Orion:
 Iam cælo niteat radijs felicibus illa
 Illa maris stella, ingens illa & gloria Olympi,
 Immensumq; iubar, qua non felicius ulla,
 Mitius aut splendet sulcantibus æquora nautis.
 Tu subeas placidus nostræ moderamina puppis,
 Heu propè submersæ, quo uasti murmura ponti,
 Terribilesq; minas superem, te præside, inanes.
 Atq; lupos, atq; ora canum, tranquilla per alta
 Effugiam tutus, blandum spirantibus auris.
 Victor ouans pelagi, optatoq; in littore sistam
 Te duce iactatam, discussa nube, carinam.

EXCITATIO SVI IPSIVS.

IAm satis erratum est, sat iam per deuia lustra
 Iuimus immemores, falsa sub imagine ueri
 Allecti: & cæcis iam pridem erroribus actos
 Tartareus Reçtor, cunctis mortalibus hostis
 Ingens, assiduus (uinctos quo ad Tartara uictor
 Nos traheret) sæuis oneratos colla cathenis

Duxit

Duxit ouans miseros, & ueræ lucis egentes.

Nunc postq̃ illuxit, postquàm nos summus Olympi
Arbiter ad superũm sedes, sanctosq; recessus
Allexit toties, toties & uoce uocauit,
Mutemus mores, & regis iussa sequamur
Aeterni, qui nos pridem de carcere cæco
Morte sua exemit, stimulo perculsus amoris.

Propositum sectemur iter, iam luce recepta.
Nec mundi illecebræ, nec nos male sana uoluptas
Eludat rursus, nec amor sceleratus habendi
Nos aliò flectat, firma hæc sententia menti
Insideat, curis & iam tangamur honestis.
Cælestes ignes & mente & pectore toto est
Nunc opus excipere, exceptos sub corde fouere.
Oremus ueniamq; Deum, puroq; litemus
Pectore, & oblitos scelerum, uitæq; peractæ
Nos nostri pigeat, hæc nostra piacula sunt.

Non myrrham Deus à nobis, non thuris acervos,
Balsama, nec casias, nec nardi mollis aristas,
Non pecudum fibras, non exta tremementia poscit,
Ipse Deus: sat nostra illi si pectora demus,
Abluta à labe immunda, culpisq; nefandis.
Hoc petit, hoc uno stellis florentia regna,
Felices superũm sedes, & tecta beata,
Sponte dabit, summo donabit munere lucis.

Hoc uno Deus, ille Deus, cui regia cœli
Paret, qui terras nutu, camposq; liquentes,
Et genus omne hominum, pariter genus omne ferarum
Aeternis regit imperijs, tot ferre labores
Pro nobis ultro uoluit, mortemq; subire :
Tantus amor nostri, clementia tanta Tonantis.

Sed postquam sine te uirtus humana fatiscit,
Vera Dei soboles, proprio nec robore possunt
Humanæ nati uires super ardua Olympi,
Respice nos quæso, & nostros miserate labores
Dilue rore pio nostræ contagia culpæ,
Si qua manent, pectusq; tuo iam numine comple.

Non sic quippe lupi, rabies quos improba uentris
Exagitat, gregibus miseris in nocte silenti
Insidias tendunt tacitas, mortemq; minantur,
Vt ferus ille hostis, sæui dominator Auerni,
Hortator scelerum, scelerumq; inuentor iniquus,
Heu, niniuum infensus, facies se uertit in omnes,
Et tacitum uirus, stimulosq; ad crimina subdit,
Quo nos præcipites, miserosq; Acheronte sub imo,
Cum nos atra dies demet uitalibus auris,
Perpetuas trahat ad tenebras, mortemq; perennem :
Aeternum & fontes damnet pallentibus umbris :
Hic ubi Tisiphone insultans accincta flagello,
Languentes animas, & multo crimine scædas

Urget

Urget atrox, subditq; faces, nigramq; fauillam
 Ultrici dextra, & late feruentibus undis
 Aeternum exercet, picea in caligine fumi.
 Adsis tu nobis, audumq; inhibeto rapinis
 Omnipotens, uirtute tua, ut fiducia uicto
 Concidat, & patrio clemens nos affere caelo.
 Quandoquidem hinc fragiles anima est demissa per artus,
 Huc sese demum extollat pernicious alis
 Te duce, nil ultra exoptet, nil deniq; poscat,
 Te summo contenta Deo, uitaq; perenni.

DE COELIICALCAGNINI Hymno.

AN 'ne tuorupes etiam de carmine surgunt?
 Promit & arenti de nuce Musa nemus?
 Aura Parætonias colubris præmiscet arenas,
 Marmaricusq; leo seruat herile latus:
 Illyricus pater in media perlustrat eremo
 Cælum, & cælicolas, tergeminumq; patrem.
 Idem animo, idem oculis nostræ uexilla salutis
 Spectat, & inclusum pectore numen alit.
 Si nux tantarum monstrat spectacula rerum,
 De nuce quis promptam perneget Iliada?

Nam tecum adsurgit saxis imperuia rupes
 Horrida, & attollens ad cælum immane cacumen.

En etiam nemus umbriferum grauis aura fatigat,
 Atq; huc atq; illuc steriles prouoluit arenas,
 Cumq; ipsis angues sinuosos miscet arenis.

Parte alia pendet sacrati ex more trophæi,
 Ostro insignis apex, duplici quem tænia nodo
 Alligat, atq; abiuratos testatur honores.

Hinc uidetur ut totam longe procumbat in aluum,
 Et defendat herile latus, uastosq; recessus
 Occupet ille leo, timor ille Libystidis oræ,
 Nunc iacet, atq; intra thesauros colligit ungues,
 Illos olim ungues manantes cæde frequenti.
 Aspicias ut posita nunc se ceruice reclinat?
 Exertaq; senis lambat uestigia lingua?

At te sancte pater, nec saxa, nec horrida rupes,
 Nec fera, nec nemoris fragor auocat: omnis Olyn: pum
 Mens inhiat, totum pectus suspirat I E S V M.
 Illum animo, illum oculis, illum omni concipis ore,
 Illum unum aspectas pendentem è robore celso,
 Suffixasq; manus, perfossaq; pectora, & heu, heu,
 Omne caput lacerum crudeliter ostentantem,
 Atq; hæc perpeßsum, nostras ut sanguine noxas
 Eluat, & miseros Genijs cœlestibus addat.
 Nunc pietas, nunc summa mouet clementia patris,

Muneraq; & promissi animo obuersantur honores.

Scilicet æthereas præclarum est scandere sedes,
Et tandem numerum magnorum augere deorum.

Sic bene habet, tua cana fides, tuaq; inclyta uirtus
Me iuuat, & sanctis mens sancta exercita factis.

Hoc piget, ipse insons, atq; omnis criminis expers,
Hei mihi, te nimium exemplis crudelibus urges.

Tu ne adeo pius erga omnes, in te impius unum?

Quid male mulctatum tergo, quid liuida ceruix
Commeruere? quid in superos committere tantum

Hæ potuere genæ, flagris, fletuq; rigentes?

Quid latera hæc cilicum crudeliter obsita setis,
Et spinis implexa? quid enthea pectora tantum

Admisere nefas? quid mens cœlestibus hausta
Ignibus, atq; olim cœli pars magna futura,

Nunc quoq; nil spirans nisi cœlum in carcere tetro,

Ausa quid est? tantis quæ digna piacula pœnis?

Quam lachrymis & sollicitis singultibus usq;
Nocte die crucias. En uix cutis arida membris

Nititur, attritaq; hærent compagine costæ.

Nec iam ille es, gelidum qui quondam natus ad Istrum,

Arua Palæstino petijsti torrida cancro:

Illius tenuis nunc uix agnoscitur umbra.

Cur tantum licuit de te tibi? Non ferus hostis

Hæc ausit, non monstra istis errantia syluis.

Tuñ mon

Tun' monst'ris sæuorūq; in te crudelior hoste ?

Parce pater, tibi parce pater: Nos uerbera, nos hæc
Flagra decent, quos mille modis rapit impetus amens,
Dum cælum toties, superosq; laceſsimus ultro.
Hinc uocat ambitio, trahit hinc ueſana libido,
Hinc mouet ira ſuos ſtimulos, timor inde coërcet,
Hinc præmit illa animo ſemper rediuiua uoluptas.

Nos ergo exultantem, atq; in diuerſa trahentem
Caſtigemus equum, ut ſpacijs incluſus iniquis,
Et mores ferat, & leges patiatur heriles.

Sed quoniam ſine præſidio, ſine numine diuū
Nitimur incassum, quom uis humana fathiscat,
Heus age, & infandos animo miſerate labores
Huc ades ô pater, & propius res aſpice noſtras :
Atq; tuæ nobis plagæ, tua uerbera proſint.

Hæc ego, quom Bernarde tuum admirabile munus
Aſpicerem, mecum meditabar, & omnia circum
Luſtrabam exili calyci nucis addita : quamuis
Nec labor exilis, tenuis nec gloria. Quondam
Sic Callicratidæ Graij, & Myrmecidis artem
Mirati, & magnum parua ſub imagine mundum.

FINIS.

CYN-

CYNTHII IOANNIS

BAPT. GYRAL.

IN NVPTIAS IOANN. SINAPII

Germani, & Franciscæ Bucy-
ronæ Gallæ,

EPITHALAMION.

ERGO cum celebrent tot uates læta Si-
napiConnubia, ut resonet lætos urbs tota
Hymenæos,

Nos Erato indiēctos huius linquemus amores?

Quin iucunda cane, & myrto præcincta uirenti
Huc propera, atq; animis facilis tete infere nostris.

Nuncq; Sinapij ambo dulces referamus amores.

Nec te Phœbe pater teneat nunc Delphica Pytho,

Quin huc accedas, redimitus tempora lauro,

Et plectro insignis. nobis nam carmina uati

Sunt danda, & medico insigni. Tu carminis author,

Tuq; artis Medicæ inuentor. nunc gloria poscit

Te tua, nunc citharæ uocales tangere chordas

Est opus, & dulci modulari carmina uoce.

Viderat è summa cœli Venus aurea sede

Te puerum genuisse tibi Germania felix,

Qualem

Qualem nulla unquam uiderunt secula, qualem
 Non tulit ulla unquam regio. quem matre cadentem
 Mnemosyne excepitq; ulnis, undaq; Aganippes
 Abluit, & paruum Musis mandauit alendum.
 Quem docta Vranie, quo pauerat Orphea lacte,
 Mæonidem, Ascreumq; senem, magnumq; Maronem,
 Nutriuit, docuitq; omnes tentare recessus
 Aonij nemoris, dulcesq; intendere nervos,
 Et doctos numeros uocalibus addere neruis.

Hunc ergo ut uidit uolitantis mater Amoris,
 Tu charus formose mihi placidissima dixit,
 Tu mihi miles eris, sic te fata aspera nunquam
 Sollicitent, iubeantq; æuo pubescere læto:
 Aeternos pueriq; oculis afflauit honores.
 Ast ipsum firmata uirum cum reddidit ætas,
 Cumq; annis flos formæ ingens, & gratia creuit,
 Obstupuit magis atq; magis formosa Dione,
 Et secum: Nunc quando tenent me numina Martis,
 Nec mihi nunc fas est illius relinquere flammæ,
 Mecum erit iste labor, compar quod iuncta puella
 Sit tibi, quæ pulchra faciat te prole parentem,
 Et felix tecum felices exigit annos.

Hæc ubi dicta dedit, Paphias frenare uolucres
 Iussit, & aurato deuecta per aëra curru
 Dilectam liquitq; Gnidon, Cyprumq; Paphumq;

Et qua

Et qua sol oriens cælo se immittit aperto,
Carpfit iter longum, & Rhodanus qua defluit undis
Fessa stetit, multisq; hic tandem è millibus unam
Seligit, eximia præstantem munere formæ,
Florentemq; annis, Bucyrono è sanguine cretam,
Quam possis facile formosam dicere Cyprim,
E medijs exortam undis, quod Gratia spiret
Huic blandum, atq; adsit semper bene suada Voluptas.

Diua igitur secum hanc liquidum per inane columbis
Italiam inuexit, tenues & lapsa per auras
Hanc tibi concessit felix Ferraria habendam.
Et dubitamus adhuc terris magis omnibus unam
Te coluisse Cyprim, nunc quando uirgine tali
Te dea donauit, qua non formosior ulla?

Interea iuuenis Phœbeis altus in antris,
Egregius forma iuuenis, quem dicere Phœbum
Iure queas, citharam si pulset pectine eburno,
Italiam petijt, medicas quo disceret artes,
Et morbis adhibere manus. duce Cypride gressus
Huc etiam flexit, rapido qua labitur amne
Eridanus, lambitq; tuos Ferraria muros.

Tum Venus exultans successu læta secundo,
Atq; artes meditata nouas. Dum forte puellis
Immixti pueri, manibus per mutua iunctis
Exercent choreas, sinuoso in crura reflexu,

Regali

Regali in tecto Alcidae, dum tibia cantus
 Dat mollis, sonituq; aures demulcet amœno,
 Aduolat ad natum, atq; illi sic farier orsa est.

Nate decus summum matris, mea summa potestas,
 Nunc opus arte tua est, tua nunc mihi numina prosint.
 Est locus, Alcides qua rerum flectit habenas,
 Magnus Atestinus, soboles dignissima patre :
 Illuc nunc properes celeri per inane uolatu
 Nate uelim, iuuenemq; mihi Germania quondam
 Quem genuit, figas telis, teneramq; puellam,
 Gallia quam diues Latias transmisit ad oras,
 Atq; ambos (quamuis illos discreuerit orbis
 Ultimus) ipse tuis coniungas ignibus opto.
 Et ne te fallat species, est proxima forma
 Virgo mihi, usq; adeo, quod tu me credere posses,
 Ni faceret certa insignis discrimina cultus.
 Est Baccho iuuenis, Phœboq; simillimus ore.
 Quare age nate, celer regali te insere tecto,
 Rumpe moras, facilis nostro patet exitus igni,
 Implicitis pariter manibus dum ducere festas
 Lætantur choreas, & saltu corpora librant.

Vix bene finierat, gemmatis aëra pennis
 Tranat Amor, charæ & peragit mandata parentis.
 Nanq; ipse aurata dempsit duo tela pharetra,
 Quis erat ex auro fulgens sub arundine cuspis,

Et neruo

Et neruo imposuit ualido penetrabile ferrum.
 Curuati duxitq; arcus mox cornua longè,
 Et tandem multa ui adducto ad tempora neruo,
 Aurata incautis transfixit corda sagitta.

Accepere ambo cæcum sub pectore uulnus,
 Vruntur pariterq; ambo, pariterq; calores
 Ambo fouent, mollisq; utriq; est flama medullas.
 Ex illo est formosa magis pulcherrima uirgo
 Visa uiro, teneraq; etiam uir uisus amanti
 Pulchrior. illa genas grato suffusa rubore,
 Hæret in obtutu iuuenis, nunc sedula laudat
 Lumina digna polo, primæ floremq; iuuentæ,
 Ora manusq; ambas, niueo & candore ruborem
 Immixtum uultu, ceu lilia candida uernis
 Mixta rosis, hauritq; oculis sitientibus ignem,
 Singula dum spectat, secum dum singula laudat,
 Externiq; thoros ardens desiderat orbis.

Nec minus ipse etiam iuuenis sua gaudia uersat,
 Lumina dum spectat, flagrantis pabula amoris,
 Lumina, & illustris miratur frontis honores,
 Virginis os, habitumq; suæ, faciemq; serenam,
 Quam liuor, licet id cupiat, non carpere possit.
 Vsq; adeò inuidiam superat: nigrosq; capillos,
 Quos simul in nodum fuluo collegerat auro
 Docta manus, Parium & superantia pectora marmor
 Laudat,

Laudat, & in tenero turgentes pectore mammas.
 Hic hæretq; amens, immoto hic lumine perstat.
 Iam cupit amplexus, iamq; oscula figere labris
 Murice depictis, titubantem & sugere linguam,
 Atq; animam miscere animæ conserta per ora,
 Gaudia iamq; thori tacitus sub pectore uoluit.
 Nulla quies animo: namq; altè est uulnus adactum,
 Nulla ope Pæonia, nullis medicabile succis,
 Sola potest Cypris longos finire labores,
 Et grauib; curis optatum imponere finem.

Hinc non passa Venus curis grauioribus uri
 Egregios iuuenes, longos miserata labores,
 Coniugis Alcidae regalia tecta subiuit,
 Hisq; illam alloquitur, dictisq; inspirat amorem.

O digno coniuncta uiro, iam numine nostro
 Facta parens, dulces Lucinæ experta labores,
 Et felix una ante alias, quæ cæcibus extas
 Tantum fœmineis, quantum Latonia uirgo est
 Virginibus prælata suis, Nereidas una
 Quantum exto: si grata tibi sunt munera nostra
 Ne pigeat quos nostra diu iunxere uolentes
 Numina, iam tandem tæda sociare iugali.
 Quos loquar, ipsa tenes: nouit namq; ultima tellus
 Horum ignes, quibus & uotis connubia poscant,
 Nedum tu, assiduè cuius coluere penates.

F Iam

Iam uirgo matura uiro est, iam flore iuuentæ
 Fulget amans iuuenis, parq; est in utroq; uoluntas,
 Alteriusq; alter placido respondet amori.
 Ante igitur tacito ueniat quàm serior ætas
 Vecta pede, & membris irrepit cana senectus,
 Non satis apta thoro, soboli non utilis ætas,
 Legitimo incumbant thalamo, natisq; creandis.
 En Hymenæus adest, dextra iam lampada quassans,
 Flammeolo intectus croceo, cui iungere tæda
 Corda simul licuit: ne non felicia credas
 Connubia, & superùm summo fore grata parenti.
 Quin infensa mihi luno nunc exuit iras,
 Et mecum delapsa polo nunc dona ministrat
 Aptæ thoris, optatq; æterno hos iungere nexu.
 Tu quoq; Diua mihi faueas, & perfice munus
 Optatum à superis, nec amantum gaudia differ.

His dictis rosea Cypris ceruice refulsit:
 Agnouit Regina deam, nec plura morata
 Huc iubet acciri charam de more puellam,
 Oscula libauitq; illi, dehinc talia fatur.

O uirgo dilecta mihi, dilecta Dionæ,
 Illa dies uenit, qua tu potiere cupito
 Nupta uiro: gratare tibi tunc gaudia pectus
 Tentarunt Nymphæ, quamuis sua gaudia celet,
 Et roseus tegat ora rubor, pudeatq; fateri.

Huc

Huc autem pallam gemmis auroq; rigentem
 Regina afferrī iussit, charaq; puellæ
 Exultans, placidis manibus concessit habendam.

Tum sociæ huc sese agglomerat: pars ducere crines
 Latatur comiti nardo: pars pectine eburno
 Multifidum discrimen arat: parsq; ordine ponit,
 Et uarios nectit flexus, uariosq; reflexus.
 Hæc capiti crinale aptat, radiantibus ardens
 Gemmis, distinctumq; auro, quod fœmina Coa
 Arte laborarat, preciosæ munera dextræ,
 Ornatus Reginae olim, dignusq; Minerua.
 Virgineis aliæ ex humeris demittere uestem
 Gaudent, atq; aurum tereti circumdare collo
 Tortile, nexilibus nodis baccisq; decorum.
 Mox multo comptam cingit Regina smaragdo,
 Et quamuis maior, gestit minor ire marita.

Talis erat uirgo gemmis redimita coruscis,
 Qualis per uarios terra est depicta colores
 Verè nouo, Zephyri flatu: uel qualis ad astra
 Luit ouans tygres leuibus moderata capistris
 Lenæi coniux, radianti compta corona.

Huc etiam accitus iuuenis se feruidus infert,
 Cui rosæ cervicis honos, tacitusq; moratur
 Tot uotis optata diu connubia amanti.

Ecce autem cœlo missus Cyllenius ales,

Improvisus adest, hilarans tecta omnia uultu,
 Et patris mandata refert, monstratq; fuisse
 Cœlitibus curæ hoc, ut lecti fœdera iungant:
 Et capiens dextra iuuenem, læuâq; puellam,
 Optatis tandem sanxit connubia uerbis.

Signa dedit luno facti, tunc mollis Amorum
 Insultat pubes thalamis, & lilia nectit
 Alba rosis, largosq; effundit nectaris imbres.
 Præcinit & faustum uati quoq; Cynthia omen,
 Huc pedibus uectus, turba comitante sororum,
 Dulce canunt Charites, canit & Semeleius Euan.
 Visus Amor agitare faces, & ducere lusus.

Tunc tectis mensas famuli longo ordine ponunt,
 Regifico instructas luxu, pars liba parauit,
 Parsq; dapes alias, pars Massica uina coronat.
 Ergo multa omnes cum ultro citroq; dedere,
 Et tecta ingenti complerunt regia plausu,
 Discubuerunt simul. Sed ubi laticumq; dapumq;
 Est exempta fames, & amor compressus edendi,
 Actutum forma insignis, cultuq; uerendo,
 Et genere illustris, felix tua Gallia proles,
 Parthenia, Aonijs dudum comes addita Musis,
 Luneta uiro, nec non præclara prole superba
 Obloquitur numeris, festa hisq; Hymenæa frequentat,
 Percurrens citharæ uocalia fila canoræ.

Lungitur

Iungitur optato iuueni dum pulchra puella,
 Iungitur optatæ iuuenis dum pulcher amanti,
 Huc ades ô Hymenæe Hymen, ades ô Hymenæe.

Tempora præcingat mollis tibi amaracus, atq;
 Flammeolus te ornet croccus, croceisq; cothurnis
 Indue diue pedes, felices concute tædas.

Huc ades ô Hymenæe Hymen, ades ô Hymenæe.

Nil sine te Cypris potuit, nil regia Iuno,
 Quamuis illa urat, quamuis hæc iungat amantes.

Non natis unquam poterit domus ulla potiri,

Legitima è tæda genitis, ni numine præsens

Ipsæ ades, & sanctis iungatur nexibus una

Te duce uterq; parens, proli te incumbat uterq;.

Huc ades ô Hymenæe Hymen, ades ô Hymenæe.

Niq; tuo primæ libentur munere noctes,

Coniugibus faustum nil est, nil deniq; felix.

Pronuba quin furia infelix his concinit omen

Connubijs, tua quæ penitus pia numina temnuunt.

Numinis ergo tui ne desit gratia nobis.

Huc ades ô Hymenæe Hymen, ades ô Hymenæe.

Namq; bonæ Veneris tu dax, tu solus amoris

Esq; author sancti, tibi debet quicquid in orbe

Progeniuit licito gens omnis munere lecti.

Huc ades ô Hymenæe Hymen, ades ô Hymenæe.

Te poscit uirgo uotis, teq; ipse maritus,

86 CYNTH. I. B. GYRAL.

Et nos te petimus, precibus bonus annue nostris.
 Incusat iam uirq; moras, iam pacta puella
 Te manet, & cupido sese optat iungere amanti,
 Flexipedes iunctæ ut uites frondentibus ulmis,
 Bracchia uel quercus cingunt nodosa corymbi.
 Huc ades ô Hymenæe Hymen, ades ô Hymenæe.

Vesper adest, Veneri gratissimus: en age segnes
 Rumpe moras, ueloxq; pedes huc flecte beatos,
 Ne rogo, ne differ primæ noua gaudia noctis,
 Quæ uir suspirat, suspirat pacta puella:
 Et desiderio iam contabescit uterque.

Quare age sollicitos iam nox coniungat amantes.
 Huc ades ô Hymenæe Hymen, ades ô Hymenæe.

Iam uenit en tædæ fulgor, iam lutea serum
 Flammea fert nuptæ. prodat nunc obuia uirgo
 Læta deo: pudor ire uetat, timet ipsa quod optat.
 Ille tamen properat, felix gratare puella:
 Nam fausto portat lætas tibi fidere tædas,
 Quæis coniux iungere uiro felici Hymenæo,
 Inq; sinus tendes optati optata mariti.
 Huc ades ô Hymenæe Hymen, ades ô Hymenæe.

Fortunate puer, qualis tibi ducitur uxor.
 Non uelox Rhodanus potuit, rapidus ue Garumna
 Te dignam huc misisse magis, seu munera formæ,
 Sine animum spectes, seu quo sit sanguine creta.

Huc ades

Huc ades ô Hymenæe Hymen, ades ô Hymenæe.

O felix uirgo, quali iungere marito.

Non mage te dignum uidit gens accola Rheni,
Nec quenquam Latias unquam transmisit ad urbes,
Cui mage te posses felici iungere tæda.

Huc ades ô Hymenæe Hymen, ades ô Hymenæe.

Non ego crediderim factum sine numine diuum,
Vt quos extremus tantum discreuerat orbis,
Perpetuo iungat nexu felix Hymenæus.

Huc ades ô Hymenæe Hymen, ades ô Hymenæe.

Viuite felices longum concorditer annos,
Nascatur soboles, reddat quæ utrunq; parentem,
Gallica qua exultet, qua exultet Cymbrica pubes,
Quæq; utramq; domum factis super æthera tollat.
Huc ades ô Hymenæe Hymen, ades ô Hymenæe.

Talibus orabat percurrens pectine chordas
Parthenia, & gratis mulcebat cantibus aures.

Interea somnos suadent labentia cælo
Sidera, & ad thalamos poscit Saturnia amantes.

Tunc utrumq; simul nectit Venus aurea cestis,
Hicq; ubi posuerat socium Concordia lectum,
Coniunxit fausto nexu. mox talibus infit:

Nunc uos bella manent, uoto quæ sita perenni,
Paceq; grata magis: nunc uobis carpere munus
Optatum toties fas est. Tu pollice dextro

Carpe puer florem, nec te suspiria flectant
Coniugis, igne pari tecum calet illa, cupitq;
Quod renuit, nostras fortis tu suscipe pugnās,
Quamuis illa gemat, quamuis luctetur amanti,
Victa cadet tecum, & capiet solatia amoris,
Crede mihi, atq; ultro quæ nunc pauet illa reposcet
Iura thori. Tu tela cape, & iam comminus illam
Aggredere, est Phœbes manibus iam Zona recincta,
Nuncq; mora in damno est, iam uiribus utere totis,
Virgineamq; bibat iam iam grauis hasta cruorem.
Fac plagis adlecta nouis languescat in ulnis
Lassa puella tuis, instantesq; abnuat ictus.

Tu uerò cupido uirgo coniuncta marito,
Pone metum tandem, libeatq; dedisse petenti
Molle femur iuueni, iam nunc pudor omnis abesto,
Iam luctæq; uacate ambo. nec prælia inisse
Sit bis ter ue satis. cupiunt iterata puellæ
Vulnera, fasq; uiris non est discedere pugna
Ni cadit, & uictus cedit iam languidus hostis.
Amplexus ederas superent, grata oscula conchas,
Parcere nec lateri libeat, nec parcere luctæ,
Debita dum soboles fecunda crescat in aluo,
Quæ matrem referat forma, factisq; parentem.

Hæc ait, & clara perfudit luce penates
Alma Venus, petijtq; poli radiantia tecta.

Inq; sinu

Inq; sinu Getici penitus resoluta mariti,
Et iuuenum ludos, & mutua basia spectans,
Consertis repetita labris, uelut æmula amantum,
Mollius ipsa etiam solito se iunxit amanti.

Haëtenus hæc nobis licuit cecinisse, nec ultra
Progrediar dictis, cum non mihi cuncta patefiant.
Cætera nox nouit, narret modo cætera coniux.

F I N I S.

F 5 CYN-

CYNTHII IOANNIS

BAPTISTAE GYRALDI

AEGLOGAE.

AEGLOGA I.



ICCINE crudelis me tantis ignibus
ustam,

Et quæ te toto iampridem corde re-
cepi,

Deseris? & notos nunc ô nunc despi-
cis agros,

Et petis ignotos? nec te mea cura moratur?

Ergo tibi uiolas nequicquam, & lilia plenis

Porrexi calathis? atq; irrita ferta capillis

Imposui sic dure tuis? sic me mea perdunt

Obsequia? heu miseram perdunt sua munera Nisam.

Heu, heu quid uolui miseræ mihi? crudus lola

Me fugis, & tota Nisam de mente fugasti,

Quamuis te ipsa colam, quamuis tibi munera tradam

Crudelis: miseræ nec tu miserescis amantis.

Ah te si qua mei pietas, si gloria tangit

Te tua, nec duras gestas in pectore cautes,

Me quoq; consortem, quæso, sociamq; laborum

Accipe, per tumidas ueniam maris ipsa procellas,

Perq;

Perq; altos nemorum tractus, perq; horrida tesqua,
 Te modò dure sequar, uita ô mihi charior ipsa.
 Iam mihi formosi saltus, iam florida prata
 Eridani, placidus quæ currens alluit amnis,
 Et riuï sordent, nulla est mihi grata uoluptas
 Te sine, despicio pecudes, & pabula læta,
 Et ferta, & flores & quicquid deniq; amœni
 Rura tenent, quicquid pulchri mea lumina cernunt.
 Quare age iam Nisæ faueas, meus ignis lola,
 Chære preces nostras ne (quæso) despice lola,
 Ne' ue thoris tecum pigeat me accumbere stratis
 Fronde super uiridi, patulæ sub tegmine quercus.
 Ipsa tibi uaria texam de fronde corollas,
 Purpureosq; legam flores, & lilia cana,
 Et tenues numeros tenui modulabor auena,
 Carminibusq; canam molles Amaryllidis ignes,
 Ut Daphnem Phœbus, Venus ut dilexit Adonin,
 Utq; Acin Galathea suum, gratissima quondam
 Munera capripedi Fauno, gratissima Nymphis,
 Quæ tibi (ni renuas) poterunt lenire labores,
 Et curas mulcere graues, miserere precantis.
 Iam tibi iam flebant animum pia carmina Nisæ,
 Quæ lachrymis lachrymosa rigat crudeliter ora,
 Nomina chara uocans, miseris iam lassâ querelis.

Sed postquam uoces surda nunc præteris aure

Ipse

Ipse meas, nec me ulla iuuat pietatis imago:
 I precor, i felix pastorem inuise supremum,
 Pastorem, pingues flauī qui Thybridis agros
 Possidet, & gregibus miseris felicia præstat
 Pabula, & optatam per saltus ducere pacem.
 Tu decus, oro, tuum, libertatemq; tuorum
 Tutare, ut tandem rebus feliciter actis,
 Et patriæ atq; tuis felicia tempora præstes.
 Quas tibi tunc laudes cantabit rustica pubes
 Pastorum? quæ sarta dabit? quæ liba quotannis?
 Ipsa tamen (modò ne infelix correpta dolore
 Absentis pueri, tenues exoluat in auras
 Interea) laudesq; tuas, decora alta tuorum
 Cantabo tenui stipula. Tu solus, lola,
 Carmen eris nobis, Nisæ ni carmina spernas.

Tu uerò, mea ne penitus sint irrita uota,
 Absentis miserere mei, rebusq; peractis
 Rumpe moras omnes, & charæ reddere Nisæ:
 Numina quæ precibus castis, altaria donis
 Accumulat, tandem ut sospes, uotoq; potitus
 Ad notos redeas agros, & rura beata,
 Nobiscum & parva felix potiare quiete.

CYNTHII

CYNTHIVS IO. BAP. GYRAL-

dus Antonio Musæ Brasauolo,

Medico præstantissimo,

S. P. D.

Non te præterit, Vir clarissime, quanto ego amore complecter duo illastrarum scientiarum lumina, Ioannem Manardum, & Ludouicum Bonaëtiolum, viros & ornatissimos, & in omni disciplinarum genere consummatissimos. Quos ambos communi omnium ordinum dolore, magnoq; rei literariæ, & urbis nostræ, immò totius orbis dispendio, improba mors impetu adeò citato nobis eripuit, ut de industria quodammodo fecisse uisisset: quod sicut horum alter alteri in rerum & disciplinarum cognitione par erat, ita uterq; pari exitu uitam cum morte cōmutaret. Vtriq; planè patris pietatem debebam, ab utroq; (ea erat ipsorum humanitas) filij loco diligebam. Ille me sacrosanctis Medicinæ sacris inuitauit: hic uero, & laborum meorum laurea donauit, & in medicorum collegiū honestissime cooptauit. Quo factū est, ut Manardum ueluti quoddam medicinæ numen colerem: Bonaëtiolum ueluti dignitatis meæ authorem obseruarem. His de causis, eorum obitu, opinione omnium maiorem animo cepi dolorem. Quid enim non dolerem uiris hisce amissis, à quibus omnis dignitas mea, & in literis promouendi spes ueluti

ueluti de filo pendeat? Quapropter meas partes esse duxi, si illis, quos dum in humanis uitam agebant, summo honore prosequerbar, nunc etiam uita functis, quantū opera mea fieri posset, non deessem: & apud utriusq; eorum studiosos, aliquod saltē meæ erga ipsos beneuolentiæ, & grati animi mei testimonium reponerem, ne unā cum eorum præsentia, ipsorum etiam memoria mihi sublata esse uideretur. Et licet nihil in me esse sentiā, quod desiderio meo, & tantorum uirorum magnitudini respondeat (quis enim egregias illas animi uirtutes, eorumq; immortalitate digna ingenia dicendo cōsequi possit?) tamen quantū in me fuit, operam nauaui, ut hisce carminibus, qualia qualia sint, singularem meum erga illos affectū testatum relinquerem. Ea autem ad te mitto, tum mei amantiſſimum, tum horum utriusq; studiosiſſimum: ut quum suapte natura non possent, dignitatis tuæ præsidio authoritatē consequantur. Tu ea & suscipe, & lege: curaq; obsecro, & ob meam in te obseruantia, & ob tuam singularem erga omnes humanitatem, quod sicut in re literaria utrunq; adeo egregiè refers, ut te superſtite, quasi ambo in te uno uiuant, eorum interitu nihil amiſſiſſe uideamur. Sic in me amando, fouendo, dignitatibus quæ ac honoribus augendo utriusque uicem, quod iam cœpiſti, quā libentiſſime ſubeas. Vale, & amantem redama.

Ex ædibus nostris.

LILIVS

LIL. GREG. GYRALDVS.

A Vius à Musis quamuis per inhospita tesqua
 Vitam agitem, legi carmina culta tamen.
 Quæ mihi, ni fallor, sunt & te & digna Manardo:
 Illi tu debes, debet & ille tibi.

DAPHNIS, AEGLOGA II.

In funere Ioan. Manardi præceptoris opti-
 mi, & Ludouici Bonactioli.

DAMON, MANARDVS. DA-
PHNIS, BONACTIOLVS.

QUID Damone mihi, quid nunc mihi Da-
 phnide rapto,
 Aut spei, aut uitæ superest? quæ pabula?
 quas ue

Nunc syluas, miser, ipse colam? quid ducere uitam
 Exoptem? quid dulce putem mihi Daphnide rapto,
 Extincto & Damone mihi? quid nunc moror ultra
 Infelix, quin ipse mihi mea pectora sæuo
 Vulnere transadigam? nigras quo tendere ad umbras
 Sic liceat, sanctosq; sequi per inhospita manes?

Quid quæso infelix, uitam producere tentem
 Amplius? an fors an tristi ut proiectus in umbra
 Aeternos fundam gemitus? uiduataq; cernam
 Prata miser? syluasq; omnes sine honore iacentes,

Et

Et mutos querar ad cineres? Eheu dolor, heu sors,
 Sors infausta mihi misero. Num sat mihi Damon,
 Damon sylvarum lumen, quo haud sanctius alter
 Excoluit prata, aut pecora hæc per gramina duxit,
 Mæstitiæ dederat misero? ni te quoq; Daphni
 Extinctum aspicerem? crudeli funere Daphni?
 Cui quondam Damon cessit sua munera lætus,
 Et dixit moriens: Tu nunc, charissime Daphni,
 Succedes nobis, tibi nunc sit cura mederi
 Armentis, gregibusq; & sæuos pellere morbos
 Arte tua, & teneros ne quis male fascinet agnos,
 Curabis viridi redimitus baccare frontem.

Hoc ego Damonis casus solabar acerbos.
 Sed quoq; cum iaceas Daphnis, cui cura salutis
 Nostræ erit? aut mortem quo nunc solabimur atram?
 Scilicet hæc nobis, nobis hæc gaudia linquis,
 Extinctum lachrymis ut te comitemur amaris.
 Te ne lapis tenet hic gelidus, sine sanguine corpus?
 Tun nobis nusquam es? nec te perquirere nobis
 Est fas, aut solitas audire ac reddere uoces?

Hinc flent te Fauni, flent te pia numina Nymphæ,
 Sylvanusq; ferens teneram ab radice cupressum,
 Panq;, Palesq; simul, simul & crinitus Apollo.
 Quin Daphne infelix ima de stirpe reuelli
 Ter conata fuit, ter ramos flectere uisa est,

Atq; comas,

Atq; comas, strata & funus lugere corona.
 Et lentæ salices flerunt, humilesq; genistæ.
 Pastoresq; omnes, gregibus per prata relictis,
 (Ni quos liuor edax uexat) miserabile funus
 Luxerunt, sæuum ipsa etiam testata dolorem
 Armenta, & pecudes, & syluæ, & littora, & amnes.

Atq; tuus Lycidas, cui sunt sine lumine soles,
 Cui nox illunis. Nam postquam te Atropos, heu, heu,
 Surripuit, spes cunctæ illi cecidere, nec unquam
 Dat finem lachrymis, imo de pectore questus
 Effundens, uocat infelix dum nomine Daphnin,
 Daphnin, quem medio seruat sub pectore fixum.

Et coniux, non iam coniux Galatea, sed orba,
 Infelix coniux, funus comitata supremum,
 Tusa genas, laniata sinus, discissa capillos,
 Nunc cælum infelix, nunc impia sidera damnat,
 Et syluas clamore omnes, & questibus auras
 Complect, dum condit uiridanti membra sepulchro.

Tu uero æternus fulgentiæ sidera calcas
 Et nostros rides gemitus, uel balsama campis
 Deligis Elysij, & odoriferam panacæam,
 Dictamunq; crocunq; immortalesq; amaranthos,
 Elysios inter manes non degener umbra:
 Et gaudes Damone tuo, quem pessima Clotho
 Inuidit syluis, pridemq; ad Tartara misit.

Sed nec tu Daphni Elysium, nec talia Damon
 Regna colit: uos astra tenent, uos numina diuūm
 Cernitis insignes animæ: uos lampade rara
 Lustratis cœlum, stellis fulgentibus aptum.
 Agnosco lumen rarum: uos numina syluis
 Pastores addent, &serta, & liba quotannis,
 Et pia thura dabunt, niueo & spumantia lacte
 Pocula iam diuis ponent altaria uobis,
 Et uestro instituent ludos de nomine dictos.
 Fortunati ambo, postquam uos carcere dempti,
 Aetherias colitis felicia numina sedes.

Nunc ô nunc uobis, si sunt mortalia curæ,
 Et nostrūm uos tangit amor, nec perdere prorsus
 Pastores superi quærent, post funera tanta
 Vos M V S A M seruate meum, quo sospite syluis
 Gloria, hōnosq; suus uiuet. nam hunc numine Apollo
 Afflauit puerum, tristesq; hunc pellere morbos
 Edocuit, uestrasq; uices nunc sumere iussit,
 Ipse ut Pæonijs succis medeatur, & herbis,
 Ingenio uigili, doctumq; Machaona reddat.

Ast ipse interea curis ingentibus æger,
 Hæc tibi do Lycidas mœstissīma munera Daphni:
 Tu facilis mitisq; ueni: mea munera Damon
 Haud spreuit, tunc cum solui suprema sepulchro
 Iusta miser, uario & conspersi corpora flore.

Tu quoq; Damonem felix imitare Daphni,
Atq; libens capies hæc, quæ tibi munera pono,
Munera certa quidem nostri monumenta doloris.

Quin etiam tumulo supremum hoc accipe carmen;
Mæstitiæ, & uerum sinceri pignus amoris.
Quod pastor dum rura colet, dum gramina falce
Detondet, pecora & uiridi compellet hibisco,
Incisum lauro aspiciet, tua nomina seruans,
Nomina, quæ iugi facient te uiuere fama.

Hic Daphnis iaceo, satis hoc tibi nosse, uiator:
Cætera fama tulit super & Garamantas, & Indos.

BARTHOLOMÆO PROSPERO

Consiliorum Herculis Estensis
participi fidissimo.

SI uacat, & nostri si qua est tibi cura laboris
Nise, decus nemorum, gloria Nise mea:
Hanc, rogo, quæ fragili compacta est fistula canna,
Accipe, Damocetæ munera grata tui.

Nec leuib; calamis pizeat triuisse labellum,
Ista decent magnos munera, Nise, deos.

Pan, deus Arcadiæ, tenues inflauit auenas,
Panq; dedit dulces inde ciere modos.

Sic pulchram pariat Phyllis tibi candida prolem;
Prataq; depascent sic tibi mille greges.

NISVS, AEGLOGA III.

adeundem, de eius & Beatricis
Priscianæ nuptiis.

LYCON, MENALCAS.



Ondebant uicina, Lycon, dumeta iuueni,
Et pecudes, mecunq; meos meditabar amo-
res,

Cum forte, innixus ramo felicitis oliuæ,
Vidi lasciuas per roscida prata Napæas,
Implicitis manibus plaudenti uoce choreas.
Ducere, & agresti modulari carmina canna,
Et Pana, & Satyros, & montiuagos Syluanos.
Ecce dies aderat, pulchram qua Phyllida Nisus,
Nisus pastorumq; decus, nemorumq; uirentum
Gloria, perpetuo sociam sibi scedere iunctam,
Ad socios duxit thalamos, placidosq; Hymenæos.
Ly. Hoc erat, hoc ipsum, quod pridem noster Amyntas
Cantabat uacuus, muscoso stratus in antro,
Dum nemora & dulci mulceret pabula uoce.
Me. Ne, rogo, ne pigeat, dum læto in gramine ludunt
Armenta, & pecudes, omnes nunc reddere uersus,
Quos modò felici fundebat pectore Amyntas.
Sic tibi sit facilis semper formosus Iolas,
Sicq; optata feras chara de Leucade uota.

Ly.

Ly. Sim licet illi impar numeris, & uoce, Menalca,
Me tibi nunc æquum parère est. carmina dicam,
Carmina, quæ dudum sitientibus aatribus hausi:
Nam memini numeros omnes, & uerba notavi.

O decus Italiae, cunctis prælata puellis,
Virgo, decus Charitum, syluis celeberrima nostris,
Quam te felici spectarunt numine fata?
Tu, quem mille olim castæ optauere puellæ,
Connubio optato nunquam potuere potiri,
Sola tenes, illi tæda sociata iugali,
O felix coniuncta uiro, cui numina Faunum
Applaudunt, cui Pan meditatur arundine musam,
Cui sunt Mopsopijs inspersa liquoribus ora.
Vidi ego capripedes Faunos, Nymphasq; ferasq;
Ludere, & annosas motare cacumina fagos,
Ponere & immites flatu ad carmina uentos,
Dum caneret, tenuemq; canens inflaret auenam.
Et Daphnis pastor, cui syluæ & pabula parent,
Quæ nitida Eridanus decurrens alluit unda,
Quo tantum nemora Italiae felicia gaudent.
Ille meus Daphnis, cantans qui proxima Phæbo
Carminibus facit, & cantu qui uincit olores,
Eridani qui nant herbofo in flumine læti,
Hunc unum cunctis præfert pastoribus, unum
Semper flore nouo, sertisq; halantibus ornat,

Partiturq; ipsi curas, arcanaq; mentis.
 O felix una ante alias castissima uirgo,
 Virgo, cui nymphae redolentia lilia carpunt,
 Et uiridi intexunt myrto, & uiuaci amarantho.
 Non te saeui aestus, urit cum sirius agros,
 Vexabunt, Boreasue geluo torquebit iniquo,
 Flatibus aut saeuis hortos uiduabit honore,
 Nec glacialis hyems excindet frigore plantas :
 Sed uer purpureum genitabilis aura Fauoni
 Adducet, gemmisq; nouis Zephyritides auræ
 Depingent longè lateq; uirentia prata.
 Flaua Ceres, grauibus crines circumdata aristis,
 Munera opima feret, cymbijs spumantia fundet
 Vina pater Bacchus : Tritonia pinguis oliui
 Crateras statuet magnos, ditissima dona :
 Et Pomona tibi cultis clarissima in hortis,
 Arboreos tradet foetus, felicia poma,
 Castaneasq; nuces, auro & certantia mala,
 Excubijs quondam mala enizlata draconum.
 Ipsa Pales, niueas & oues, agnosq; petulcos,
 Hædosq; & capras distentas ubera lacte
 Concedet, pariterq; noui carchesia lactis,
 Quin & Hamadryades comptæ frondente corona,
 Et festas ducent choreas, & carmina dicent.
 Atq; Napææ omnes, satyrum placidissima cura,

Felices

Felices florum numbos, spirantibus auris,
Effundent, pariterq; omnes halantia nec tent
Serta tibi, atq; opibus genitalia stragula uernis
Inspergent manibus placidis, & diuite fronde.
Immo ultra hæc, quæ sunt sylvarum pingua dona,
Nercides ipsæ spumanti ex æquore conchas
Purpureas relegent, auulsa coralia saxis
Innectent collo, niveis distincta lapillis,
Diuitias Neptuni, & formosæ Amphitrites,
Munera pastorum nulli concessa priorum.

Tu uero, quem fata uocant, quem poscit Apollo
Aureus, & cingit florenti fronde capillos,
Pastores inter lectos lectissime Nise,
Ecedere perpetuo charam tibi Phyllida iunctam
Quæso fove, & cupidis cupide amplexare lacertis;
Suspirat uirgo amplexus, sua gaudia poscit
Phyllis, clara oculis, cultu clarissima Phyllis,
Candidior cygnis, & dulci dulcior Hybla,
Lucidior stellis, & pluma mollior omni,
Aurea Acidalios fundit cui Cypris odores.
Huc ades ô formose, ueni, te pronuba Iuno
Iamdudum uocat in thalamo, felixq; Hymenæus
Flammeolo intectus croceo, croceisq; cothurnis
Vinctus utrunq; pedem, quassans & lampada dextra
Lam festa te uoce uocat, iam Cynthia nuptæ

Dissoluit manibus Zonam, tu gaudia sume
 Nise parata tibi, uiridantia stragula sternit.
 Intus Hymen. formose ueni, cape munera lesti.
 Vesper adest, toto sese diffundit Olympo
 Hesperus, optatam ducit qui sidere noctem:
 Huc ades, & iunctam stabili tibi scedere nuptam,
 Ingenio claram, formæ nec stripis egentem,
 Iam foueas, tereti substernas brachia collo,
 Iam lateri coniunge latus, dulcissima amoris
 Munera carpe libens, tibi debita munera Nise.
 Hinc tibi nascentur Damones & Alpesibæi,
 Insignes calamis, insignes arte canendi,
 Qui doceant resonare uirentes Phyllida syluas,
 Aoniasq; deas Romana in carmina ducant.
 Namq; his non hædos uiridi compellere hibisco
 Cura erit, aut unco campos proscindere aratro,
 Vel socias lentis coniungere uitibus ulmos:
 Sed tantum calami tenues, & carmina cordi,
 Et uoce & numeris doctos superare Menalcas,
 Et cantu aërias deducere collibus alnos.
 Horum carminibus sistent sæua æquora fluctus,
 Mitescantq; feræ, iunctiq; leonibus hædi
 Errabunt syluis, fugietq; inamabilis horror,
 Et pecudes posita ducet formidine pastor.

Hæc sunt quæ dudum uacuus cantabat Amyntas,

Et re-

Et respondēbat facilis cantantibus Echo.

Me. Non tantum pluuiā lætatur torrida tellus,

Vere nouo uolucres, florenti gramine campi,

Quantum nunc ego sum lætatus carmine Amyntæ.

Ly. Sic ô quæ cecinit, superi læta omnia firment,

Coniugibus sit uera fides, & mutuus ambos

Nectat amor, niueis qualis solet esse columbis :

Pulchrâq; nascatur pulchro de sanguine proles,

Proles, qua mcestus redeant sua gaudia syluis.

Me. Sic erit: arrident en undiq; & undiq; prata.

Sed iam sol rapida uectus uertigine cælo

Inclinat, cogamus oues pecudesq; Menalca,

Et consueta petant saturi præsepia tauri.

ALFONSO GVARINO.

SErò planè, Alfonso suauissime, ob felices filij tui nuptias tibi gratulor: non ob id tamen abs te accusandus sum, cū id à me nulla negligentia prætermissum sit. Scis enim me negotijs propemodum infinitis, & illis difficillimis districtum, ob quod nihil ferè otij ad scribendum mihi reliquum est. Nec id coram tecum agere uolui, licet potuerim. Ego enim mihi ipse uidebar propemodum inanis, si aliquid omnino mecum non ferrem, præter uerba, quo & mihi gauderem, & tibi gratularer, meumq; erga te amorem apud te testatum relinquerem: præsertim cum ami-

citiæ iampridē inter nos ortæ, his ipsis nuptijs successerit
affinitas. ab eadem enim præclara Malchiaeuellorum fami-
lia, à qua nurus tua originem ducit, & uxor mea, ex Da-
miana Malchiaeulla, fœmina lectissima, oriūda est. Erit igi-
tur apud te testis Alcon hic meus, immò tuus (quid enim
quod tuum est mihi uendicem, & in censu meo asciscam?)
inter uarias animi mei perturbationes ortus, quatū tuo hoc
bono mihi gauisus fuerim. Hunc uerò si forte te indignum
iudicaueris, ignoscas occupationibus meis: si ipsum pro-
baueris, id omne (quodcunq; est) lætitiæ, quam de filij tui
nuptijs, opinione omniū maiorem animo concepi, acceptū
iri oportere tibi persuadebis: perspectumq; habebis, me
nihil magis optare, quàm quod hoc tibi & perpetuæ uolup-
tati, & sempiterno commodo sit futurum: & quod inter
nepotes tuos omnes annos usq; adeò feliciter exigas, ut
cum ætas tua ingrauescere cœperit, in amore atq; ipso-
rum adolescentia mollissime conquiescat. Vale: & Aeglo-
gan hanc, licet iure tuam, Alexandro fratri uiro clarissi-
mo, cui nuncupata est, exhibeas oro. hoc namq; mihi
maximo scœnori futurum confido: & si nō alia, saltem hac
de causa, quòd xeniolo uno, & te & filium, & fratrem
etiam, licet antea meos, arctiori beneuolen-
tiæ uinculo mihi obstrinxero. Va-
le iterum atq; iterum.

ALCON

AD ALEXANDRVM GVARINVM
uîrum clarissimum, de Francisci Al-
fonsi fratris filij & Vrsinæ Mal-
chiauellæ nuptiis.



VNC iterum agrestes Musæ, coniungere
cera

Vocales opus est calamos, nostrasq; docere.
Syluas cōnubia læta, & lætos Hymenæos.

Aspicite ut dudum ducant per prata Napææ
Nunc molles iterum choreas, ut gramine in alto
Nunc etiam uiridi redimitus tempora canna
Pan deus Arcadiæ demulcet rura cicuta.

Illa dies uenit cunctis pastoribus, illa
Tot uotis optata diu, qua candidus Alcon,
Præsignis forma, præsignis sanguine auito,
Alcippen facie egregiam, & florentibus annis,
Et genere illustrem, Veneres quæ spirat ab ore,
Et blandos oculis iactat radiantibus ignes,
(Hinc etenim tela atq; faces, & retia sumit
Mitis Amor, figitq; uiros, & uincula nectit)
Alcippen, cui prata uirent, cui pascua & omnes
Applaudunt saltus, cui rident numina blandum,
Connubio ipse sibi iunxit, tædaq; iugali.

En ut Hamadryades, en ut quoq; Oreades una

Alcippæ

Alcippæ exultant, frondenti baccare cinctæ,
 Et sociæ ferta intexunt, & ueris honores
 Lilia, purpureasq; rosas, flauasq; genistas,
 Et molles uiolas, & purpureos hyacinthos,
 Sponte ferunt placidæ per roscida prata Napææ.

En ut semiferi (syluestria numina) Fauni,
 Et Panes cincti palmis, & uirgine lauru,
 Egregio iuueni assurgunt, ut pascua complent
 Plausibus altisonis, & multifono modulatu.

Hinc Idmon fido Alconi coniunctus amore,
 Et pariter nymphæ consanguinitate propinquus,
 Idmon nec syluis, nec nymphæ cognitus Idmon,
 Et uarijs æctus curis, sua gaudia uersat
 Pectore sub tacito, mox & pro uiribus arua
 Carminibus mulcet, biforesq; ad carmina buxos
 Inflat ouans, optat faustosq; utriq; Hymenæos.
 Huic nemus umbriferum, blandumq; immurmurat unda
 Dum canit, & uolucres uocum discrimina mille
 Certatim effundunt, & uersicoloribus alis
 Applaudunt cunctæ, & cunctæ sua gaudia monstrant.

Huncq; diem choreis celebrant, & uoce canora
 Eridani nymphæ, spumat properantibus ipsis
 Fluminis unda nitens : muscoso & lætus ab antro
 Vndarum ipse pater testatur gaudia uultu
 Cæruleo, & geminas tendens ad sidera palmas,

Popule

Populea fronde & crines & tempora cinctus,
Talia uoce refert, summo prouectus in amne.

O læta ô nimium, nimium lux candida syluis,
O lux, ô nobis lux ô celebranda quotannis,
Qua pulchram Alcippen coniunxit pronuba luno
Alconi, pulchro Alconi, cui fistula collo
Iampridem pendet, septem compacta cicutis :
Alconi, numeris æquat qui grandibus ipsum
Iam patrem, egregium patrem, magnumq; Varinum,
Illum, in quo patris uirtus rediuiua resurgit,
Præclarusq; resurgit auus, qui carmina syluis
Cantat, quæ solitus si quando armenta uocabat
Amphion Dircæus in Actæo Aracyntho.
Hunc alium, hunc ô, quæso, diem (si gloria cordi
Pastores uestra est uobis) celebrate fauentes,
Laudibus excipite unanimes, plausuq; secundo,
Idalia compti myrto, lauroq; uirenti,
Insolita syluis deducite carmina auena.
Namq; hoc nascetur claro de sanguine proles,
Qua decus amissum uobis, qua gloria nobis
Reddetur demum, tot iam quæsitæ per annos.

Hæc ait: huic blando responsant murmure ripæ,
Responsatq; illi latè de rupibus Echo.
Tunc hilaris sese currenti reddidit alueo
Eridanus, uitreis ipsum excepere sub undis

Naiades,

Illuxit, toties se mer sit & a quore Titan.
 Nec mihi quod dempum est, mihi nec mea munera præbes
 Munera qui rapuit, nutat sine remige cymba
 Aduersis quassata Notis, & fluctibus æta.
 Optatos per te tantum contingere portus
 Tuta potest, sine te laxis compagibus ipsa
 Naufraga lethalem accipiet male saucia pontum.
 Ergo iam subeas clauum, & tranquilla per alta
 Duc (precor) ad portus, & tuto in littore siste
 Concussam nauim: soluet tibi debita uota
 His numeris, medio fiet quæ littore tuta.
 Præsidio seruata tuo iam naufraga puppis
 Hæc, Tassone, tibi ponit pro munere uota.

ILLVST. GALEAT. EST. TASSONO.

NON te latet, quibus dolis aduersarij mei affectent, ut in
 hac turbulentissima tempestate, omnes concitati flu-
 ctus in me redundant, adeoq; submergant, ut nulla emergendi
 spes sit reliqua. Quapropter ne, ut olim Amyclas, nunc etiam
 me silentiū perdat, ad D. Herculem Estensem principē nostrū,
 rusticum hunc Thyrsim pro me legatū mitto, ut ipse, re diligen-
 ter inspecta, me tam graui inuuriæ, præsertim nulla mea culpa cō-
 flata, affici non permittat. Verum cum mihi persuadeam, ipsum
 principi nostro tuo præsidio gratiorem fore (scio enim quantū
 apud illum tua ualeat autoritas) cum prius ad te mitto, teq;
 iterum atq; iterū obsecro, ut ipsi hæc in legatione usq; adeo præ-
 sto sis, ut nō modò orator, sed exorator ad me reuertatur. Vale.

THYR-

Ille hæc dissimulat, ueteris nec gratia facti
 Me nunc ulla iuuat, quando is sine legibus ullis,
 Nulla æqui forma, seruatoq; ordine nullo,
 Ascriptum reliquis nostrum de cortice nomen
 Abrasit falce incurua: sunt crimina nobis
 Præceptis hæsisse tuis, doctissime Daphni,
 Tu tantum scelus es nobis, habitasse uerentes
 Quos dederat saltus nobis tua dextera habendos:
 Hinc flores gregibus teneris, hinc pabula læta
 Porrexisse manu: nomen cecinisse beatum,
 Et sanctum syluis nomen, dum fata sinebant,
 Daphni tuum, hos fluctus, hos nunc mihi parturit ignes.
 Ipse licet simulet causas, & crimina fingat,
 Infensus nobis Aegon. Sed cum mihi tantum
 Profueris Daphni, & summo decoraris honore
 Quid non te obseruem? quid non tibi debita tradam
 Munera? quid' ue tuos cineres? quid busta suprema
 Semper honorata, & non sint mihi semper acerba?
 Sic erit, hocq; animo est fixum, quocunq; cadat res:
 Nam cineres qui non amat, is non antea amabat.

Quò feror ô demens? quò nos uis iusta dolendi
 Præcípites egit? quid prodest fingere inanes
 Quas uenti rapiant uoces? tu maxime Thyrsi,
 Nunc tantum faueas, ALCON tuus ut mihi fauit,
 Ille ALCON, moriens tibi qui sua munera cessit.

H

hinc:

In nos cum fureret quondam crudelius Aegon.
 Pastorem defende tuum. Da maxime Thyrsi,
 Pascere ut ante greges, nec te seruasse Menalcam
 Pœniteat, quæso: namq; is non indecor ipsis
 Seruatus fuerit syluis, tibi liba quotannis
 Muneris ipse memor, tibi condita subere mella,
 Castaneasq; nuces, & lecta ex arbore poma
 Concedet, faueas modò tu charissime Thyrsi.

Quin & pastores, doctus quos afflat Apollo,
 Vnà omnes mecum soluent pro munere grates
 Aeternum, & resonare dabunt tua nomina syluas.

F I N I S.

CYNTHII

CYNTHII IOANNIS

BAP. GYRALDI ÉLEGIA-
rum Liber unus.

IN FVNERE DELIAE DA-
mianæ Malchiauellæ socrus,



VID iuuat, heu, crebris cumulasse al-
taria donis?

Quidq; dedisse tuis mascula thura
focis,

Phœbe Pater? si nunc ulta mihi charior ipsa

Eripitur socrus, febre perusta graui?

Ah ualeat quisquis medica confidit in arte,

Et putat assidua flectere fata prece.

Hæc nihil (heu) profunt, cum nos mors impia poscit;

Nec tangunt magnos tunc pia uota deos.

Heu miseranda socrus, sic te mihi fata tulerunt?

Sic fera sic dempsit commoda Parca mihi?

Post patris occasum, post charæ funera matris,

Crudele, heu, fixit nil mihi cōda magis.

Quin & morte tua prisci rediere dolores,

Et priscas ciuit mors tua mi lachrymas.

Nam mihi mater eras, sola & pia munera obibas

(Me miserum) patris, sedulitate tua.

Me me utinam letho comitem tibi parca dedisset;

Quæ mihi nunc uitæ stamina nigra trahit.

H 2 Nam tibi

Nam tibi ut æterno clausit mors lumina somno,
 Omnia iam tecum commoda nostra iacent.
 Tu mea tu moriens turbasti gaudia socrus,
 Et dēpsti quicquid fata dedere boni.
 Heu nimium in damnis properata heu funera nostris,
 Morte tua nostra est tota sepulta domus.
 At quamuis posthac uultus spectare serenos
 Non liceat, rapuit quos mihi Parca nocens:
 Vsq; eris ipsa tamen defixa in pectore nostro,
 Hærebit cordi semper imago tua.
 At nos interea, postquam sic funera poscunt,
 Præparat & miseras mors tua mi lachrymas,
 Soluemus pia iusta tibi, tristissima dona,
 Debita sed cineri tristia dona tuo.
 Et, si quid sentire potest, tibi paruus Olympus
 Soluit uagitu qualiacunq; puer.
 Tu cape purpureos, quos ipse, & Tharsia flores
 Nata tibi miseras spargimus & lachrymas.
 Pars animæ Damiana meæ, charissima socrus,
 Et tristis natæ cura dolorq; tuæ.
 Aeternum felixq; uale, decus addita cælo,
 Et genero & natæ perpetuæ lachrymæ.

D. M.

D. M.

DELIAE DAMIANAE MALCHIA-
VELLAE IOANNIS BARDELLI
OLIM VXORI OBSEQUEN-
TISSIMAE.

FOEMINAE INCOMPARAB. SIVE
PVDICITIAM CAETERASVE IL-
LUSTRES FOEMINEAS IPSI-
VS DOTES SIVE QVEM
MVLIEBRI CORP. GESTABAT
VIRILEM ANIMVM
SPECTES.

QVAM ANN. NATAM XL. P. M.
(HEV IACTVRAM IRREPARAB.)
IMPIA FATA NOBIS INVI-
DERVNT.

CYNTH. IOANN. BAP. GYRALD.
GENERET FVLVIA THARSIA
FILIA CONIVGG.

SOCRVI ET MATRI DVCISS. NON
SINE LACHRYMIS MVLTI OB
ACERBISS. ILLIVS DESPERIVM
B. M. POSS.

*Heu Damiana iaces: hic tecum sed iacet una,
Delia, Amor, Charites, Iuno, Minerva, Venus.*

H 3 PRO

PRO LVDOVICO BONACTIO-

lo primi nominis physico

Soteria.

PHæbe Pater, superûmq; decus, lux maxima cæli,
 Mundi oculus, per quem cuncta creata uigent.
 Accipe odoratos, quos do tibi thuris acervos,
 Felix & sacra hæc quæ tibi uota paro,
 Sancte ueni, cape dona libens, quæ debita saluo
 Sunt Bonactiolo persoluenda mihi.
 Aequum quippe fuit, longæ qui tempora uitæ
 Præstiterat multis, eripuisse neci.
 Nanq; hunc si extinxet sæui inclementia fati,
 Maxima (crede) foret gloria raptâ tibi.
 Sanctius hoc nemo (quid enim manifesta negemus?)
 Languida Pæonia membra leuauit ope.
 Et tua quid ualeant ostendit munera solus,
 Quamq; tibi cedat cætera turba deûm:
 Ipsius ingenio cum ducta è faucibus orci
 Dux nostra, atq; iterum penè renata fuit.
 Vreret hanc etenim febris cum lethifer æstus,
 Parsq; esset uitæ iam bona lapsa sua,
 Nec cuiquam quidquam spei superesset in urbe, &
 Aula omnis miseris plena foret lachrymis,
 Hic uirtute sua longæuam uiuere uitam
 Regina, fato penè uetante, dedit.

Et quam

Et quam luxerunt omnes, hoc uindice gestat
 Iuncta uiro casta sceptrā uerenda manu.
 Officij q̃ memor, tibi nunc pia munera soluit,
 Atq; tuis urit thura Sabæa focis.
 Te q̃ rogat mecum, longum quod uiuat in æuum,
 Qui dederat uitæ tempora longa sibi.
 Eia age Nestoreos felix fac expleat annos,
 Et Parcæ huic semper candida fila trahant.
 Sic tra sic superent fulgentia lumina nubes.
 Sic rutilus niteat semper in ore decor.

AD IOANNEM MANAR
 dum pro Olympio filio
 seruato.

Quod me sis semper patrio complexus amore,
 Fauoris & uotis docte Manarde meis,
 Quod dederis pridem Phœbeas ire per artes,
 Et morbis medicas posse adhibere manus,
 Ingenti tibi me deuincti munere: sed quod
 Mortali possim soluere gratus ope.
 At quod nunc ægrum natum, lethoq; propinquum,
 Dempseris arte tua, præsidijq; neci:
 Non hominis certe, cælesti at munere uincti
 Me tibi, quod meritis non soluisse queam.
 Nunc demum Hippolytum reuocatum à manibus imis
 Credimus, exemplo docte Manarde tuo.

Hac ope sic discant alij succurrere morbis,

Seminecesq; neci demere posse viros.

Sic tibi det Phœbus felicia tempora, sicq;

Cumanæ felix secula uatis agas.

Namq; ut sol mundo decori est, & lumine dempto

Ipsius, in terris squalida cuncta iacent:

Tu quoq; sic nostri es solus lux maxima secli,

Extincta & tecum gloria nostra foret.

Quare age Phœbe precor, huic annos annue longos.

Huius enim ingenio crederis esse deus.

AD COELIVM CALCAGNIVM.

Cum mare nimboſis miſcetur flatibus, & cum

Fluctibus aſſiduſ horrida ſeu it hyems,

Nulla aude t puppis tumido ſe credere ponto,

Aequoris undiſonis non bene tuta uadis.

Sed poſtquam pelagi cecidit fragor, æquora poſtquam

Tuta ſilent, nullis exagitata notis,

Tunc remos, tunc uela parat, tunc littore ſoluit,

Tunc audax medium per mare currit iter.

Sic ego nunc COELI, curis grauioribus actus,

Non auſim ſolita tangere pleetra manu:

Aut Aganippeis haurire e fontibus undas,

Alta' ue Parnaſi montis adire iuga.

Sed mihi ſi faueat toties oratus Apollo,

Leniat ut curas ſors male fida meas:

Te ſequar

Te sequar Aonij super ardua culmina montis,
 Et residis repetam fila canora lyræ.
 Quam mihi tu dederas leui percurrere dextra,
 Ut rudibus possem iungere fila modis.
 Tu uero interea, dum nos male uexat Erinny,
 Et rerum uario turbine sollicitat,
 I precor, i felix Cynthi per amœna uireta,
 Et dulces docto pectore funde sonos.
 Atq; precare dies nobis post nubila lætos,
 Et tantis finem sollicitudinibus.
 Sic tibi concedant felicia secla sorores,
 Candida perpetuo sic tibi fila trahant.

IN PERFIDVM DE-
 tractorem.

ECquid uirosis nostras conferre tabellas
 Pergis? ab infonti quid mala facta petis?
 Sic sceleris fontem facilis mihi prodat Apollo,
 Ut scelere hoc nostra est non temerata manus.
 Utq; ego non ullum mordaci carmine læsi,
 Sic superent nigros nomina nostra rogos.
 Hæc nescit Cynthi castissima condere Musa,
 Nec cor sollicitant facta nefanda meum.
 Non mea non tali mens est obnoxia culpæ,
 Nec læsit magnos pagina nostra uiros.
 Nec uos læserunt castæ meæ carmina matres,

Sint licet impacta hæc crimina fœda mihi.
Est nobis Phœbus testis, Ferraria testis,
Testis uita uiris cognita nostra probis.
Tuq; fores testis, premeres nec nomen amici,
Ni tibi fictus amor, ni simulata fides.
Desine Mome loquax rhonchos agitare sonantes,
Desine sacrilega bella mouere manu,
Desine harenosum proscindere littus aratro,
Iungere gryphes equis, uel dare frena boui,
Non bene conueniunt nostris, mihi crede, libellis,
Infami quæ sunt uerba notata manu.
Sanguinolenta meas inter tot litera chartas
Haud unquam (ut nosti liuide) lecta fuit.
Et mihi ni pugnae causam scelerate dedisses,
Omne foret Musæ carmen inerme meæ.
Perfidia nunc ipse tua tibi cogis amicum,
Acria pugnaci bella mouere pede.
Quare age iam tandem uoces compesce malignas,
Disceq; iam sanctè, si potes, ipse loqui.
Si potes, ipse mihi tenebras offundere cessa,
Non obsunt famæ crimina falsa meæ.
Imò quem tentas lethæas mittere ad undas,
Spem seræ clarus posteritatis habet.
Nunc scelere atq; tuo niuax, expersq; sepulchri
Est factus, famæ quem rapuisse putas.
Sat mare

Sat mare turbato uentis agitata carina est,
 Satq; fuit uotis sors inimica meis.
 Nunc mitis spirat Zephyrus, nunc aura secunda est,
 Nunc tanget portus, te renuente, ratis.
 Nam mihi quod tentas fallaci impingere lingua,
 Ipse author propria prodidit arte scelus.

IN EVNDEM.

Perfide, te ne etiam gemina comitata sorore
 Tisiphone colubris urget acerba suis?
 Non satis est, duce te falsum quod crimen inustum
 Sit mihi, quod nomen perderet usq; meum:
 Sitq; foro in medio non parua iniuria nobis
 Illata, & culpa perfide Mome tua?
 Ni mihi nunc etiam tentes offundere nubes,
 Bellaq; mendaci uoce mouere pares?
 Sancta fides ubi nunc? ubi nunc pia munera amoris?
 Et toties pacti iura sodalitij?
 Perfide, amicitiae iunctus si scedere, labem
 Impingis falsi criminis usq; mihi,
 Qui tua perpetuae mandauit nomina famae,
 Lethæisq; dedi facta nefanda uadis.
 Quid? tua nouissem ni turpia crimina: quid ue,
 Esset parte aliqua si mea lapsa fides?
 Sed quid agis demens? iam me pia numina Musæ,
 Numina carminibus non temerata meis,

Tutantur

Tutantur, Phœbusq; pater mea nomina seruat
 Intacta, & claro lucidiora die.
 Viq; omnes quondam (quos sacro numine Apollo
 Afflauit) damnis ingemuere meis,
 Optaruntq; omnes sceleris cognoscere fontem,
 Quo nota ab insoniti dempta maligna foret,
 Ut meritas lueret tanto pro crimine pœnas,
 Authorem & peterent facta nefanda suum:
 Sic postquam uoluenda dies nunc attulit ultro,
 Quod posset nemo uix tribuisse deûm,
 Et mihi quam fuerit mens æquo proxima semper,
 Prodidit indicio noxius ipse suo,
 Nunc pariter Phœbo lætum pœana canentes,
 Lætantur tantum non latuisse nefas.
 En meus ALCIDES, patriæ dominusq; paterq;
 Gaudet honorata tangere pleetra manu.
 Et qui Phœbea redimitus tempora lauro,
 Cœlius, æterno digna Marone canit:
 Cœlius, in quo uno est (liceat mihi uera fateri)
 Quæcunq; Ausonia Graiaq; lingua dedit.
 Atq; impar nulli numeris, nec uoce Guarinus,
 Soluit lætificis ora diserta modis.
 Quiq; audet cynis dulci contendere cantu,
 Prosper Apollinei gloria rara chori.
 Actiolusq; puer, Phœbeis altus in antris,

Nescio

Nescio quid solito grandius ore sonat.
Lilius & noster, quo nunquam dignius alter
Concinuit docta carmina, digna lyra:
Seu molles elegos scribat, seu barbita pulset,
Concinat autem plectro Martia gesta graui.
Bentiuolusq; sacra redimitus fronde capillos,
Pierium læto spirat ab ore melos.
Ferrinusq; meus, suetus super ardua Cynthi
Ire iuga, & sacri sumere fontis aquas.
Flavius & frater, paruum quem matre cadentem
Excepit blando Musa benigna sinu.
Quem pridem Phœbus cythara dignatus honora est,
Ut tendat recta clarus in astra uia.
Ne' uē omnes memorem: nobis nunc gaudia promit,
Quisquis Castalijs ora rigauit aquis.
Liuide, tu tantum, quem dedignatur Apollo,
Et uetat Aonio fonte leuare sitim,
Virus atrum, tetramq; luem de pectore fundis,
Et rabido profers uerba canina sono.
Et tabulis tabulas confers, tentasq; aliena
Perdere me culpa, garrulitate tua.
Mome, tibi infecta est lethali lingua ueneno,
Cui nisi mature consulis, ipse cades.
Sed dare si nescis tanto medicamina morbo,
Hæc peragas, Cynt hi quæ tibi uerba sonant.

Rode

Rode tibi linguam, quæ latrat mordicus: & sic

Aeger qui fueras, hac ope sanus eris.

Parcite Pierides, læsi si numina uestra,

Gessimus inuicta bella cruenta manu.

IN TVMIDVM ARCHEMORVM.

ARchemore obrueris, uana hinc tibi somnia fugis,
Meq; putas demens uerba aliena loqui.

Non mihi mansa aliquis, quisquam nec uerba ministrat:

Nam mihi sunt dentes, sunt mea uerba mihi.

Nec mihi lingua procax, mihi nec maledicta referre

Mos fuit: Archemorus, si quid id est, docuit.

Namq; tibi dederant magnas mea carmina laudes,

Ipse tamen reddis uerba canina mihi.

Scribis & indoctis insulsa epigrammata chartis,

Et latrans uirus fundis ubiq; tuum.

Atq; cies pugnam, fugio certamina: namq;

Nulla mihi tecum gloria, nullus honos.

Instas ipse tamen. tetrica & me uoce lacebis,

Et iactas uires, & noua bella moues.

Inuictumq; trahis: sed uix distringere ferrum

Incepi, tibi cum concutit ossa tremor.

Et uallo in medio cunctis mirantibus hosti

Das terga, & clypeum proijcis Archemore.

Post uerba ordiris, nugas & fundis inanes,

Et forti iactas parta trophæa manu.

I precor

I precor, i tandem, disce & quid prælia poscant;

Quam fuerat satius conticuisse tibi.

Ast ipse interea, iaceat ne uiuida uirtus,

Qua illustre Archemore tollis in astra caput,

Clara trophæa tibi ponam, hæc & carmina subdam,

Queis uigeat nomen semper in orbe tuum:

Qui se iactarat pridem uicisse Gigantas,

Prò pudor, Archemorus uelite uictus abit.

DE FELICI HERCVLIS ESTEN. II.
in patriam reditu.

HUc agite ô Musæ, uocales tangite chordas,
Et decorent uestras laureaserta comas.

Spargite humum folijs, prætexite flore capillos,

Aoniumq; nemus nil nisi læta sonet.

Huc ades ô uatum numen placidissime Apollo,

Et doctæ libeat fila mouere lyræ.

Dicite io Pæan, ter mecum dicite Pæan,

Huc agite, æterno soluite uota Ioui.

Lux etenim precibus tantis uotisq; petita

Aduenit, sacras inter habenda mihi.

En meus ALCIDES, patriæ dominusq; paterq;

Iam pridem optatum spargit in urbe iubar.

Et modò quæ dempto squallebant omnia Rege,

Illius aduentu facta serena nitent.

Cœlius en noster, cuius de pectore manant

Ambrosij

Ambrosij rores, naetareusq; lepor,
Pieria cinctus lauro de more capillos,
Iam niueum docto pollice tangit ebur.
Vtq; duce absente illius modò Musa solebat,
Carmina nunc læto pectore docta canit.
Memnonis & matrem felici uoce salutat,
Hercule uicino quo uehat alma diem.
Ad cuius numeros & uocem cuncta resultant,
Et dant lætitiæ maxima signa nouæ.
En pater Eridanus uelatus tempora fronde
Populea, placidum tollit ab anne caput.
Miratur Regem inuictum, miratur alumnus,
Atq; suum gaudet iam rediisse decus.
Sic uiso flauus uicta Carthagine Thybris
Scipiade, rapidas parcius egit aquas.
Quin ipsæ turres, & tecta superba domorum,
Huius in aduentu sunt prope uisa loqui.
Et herno sese uestiuit terra colore,
Dum uidet incolumis principis ora sui.
Nec tantum tellus, sed cælum, sidera, & aër
Gaudia sunt hilari testificata sono.
Iuppiter est nato reduci gauisus, ut ante
Hoc ipso imperij suscipiente decus.
Aureus æquoreis sol clarior exit ab undis,
Auricomum spargens lumine in orbe iubar.

Vos etiam

Vos etiam liquidum sulcantes aëra pennis,
 Alcidae blandum concinuistis aues.
 Et matres iuuenesq; simul, populusq; patresq;
 Felici plausu compita cuncta replent.
 Utq; expectato bis denos ante per annos,
 Lætata est reduci Penelopea uiro :
 Regia sic coniux, castis comitata puellis,
 Læta uiro incolumi dat pia thura focus.
 Iunoni sua dona offert, sua dona Tonanti,
 Atq; tibi Cyprias dat Cytherea rosas.
 Exhaustæq; uiæ dum uir discrimina narrat,
 Hæret in obtutu diua Renata uiri.
 Ipsaq; narrantis pendet lætissima ab ore,
 Atq; oculos spectat, compositumq; caput.
 Et cupidis necit Regalia colla lacertis,
 Bastaq; amplexu iungere sæpe iuuat.
 Quoq; magis fuerat curis grauioribus acta,
 Præsentis hoc ipsa est nunc mage læta uiro.
 Lætantur fratres ambo, uirtutibus ambo
 Insignes, factis clarus uterq; suis.
 Applaudunt paruusq; puer, maiorq; puella,
 Inq; sinu reptant, sarcina grata patris.
 Hunc ambo dextra attrectant, huic oscula figunt,
 Et manibusteneris pectora chara fouent.
 Quin & quæ absenti nata est nunc parua parenti,

Gaudia uagitu qualiacunq; refert.
 Sic ridet, Dux alme, tibi formosus Olympus,
 Sideraq; & toto quicquid in orbe nitet.
 Nec minus ipse tuo letaris sospite regno,
 ALCIDE, magnis non leue nomen auis.
 Salue chare pater patriæ, spes maxima regni,
 Salue lux generis, præsidiumq; tui.
 Maeste animo inuieto laus accessura parenti,
 Aeterni soboles nunc rediuiua louis.
 Di faciant, dextro uenisti ut sidere in urbem,
 Pacata teneas sceptrâ paterna manu.
 Et pia fata, precor, felicia uota secudent,
 Aspiret cæptis Iuppiter usq; tuis.
 Tu uero, innumeris nos qui iactamur ab undis
 Respice, & irato subtrahere uela mari.
 Da tandem nobis tot sæuis fluctibus actis,
 Auspicio portus tangere posse tuo.
 Sic tibi contingat faustis gaudere triumphis,
 Vincereq; inuicta monstra superba manu.

EPITHALAMION THOMAE

Manfredi, & Bartholomææ Bentiaë.

Atlantis Manfrede teris dum limina Hetrusci,
 Noscere quo possis lumina clara poli:
 Risit Amor, pariterq; Venus subrisit Amori,

Et se

Et secum : Nobis hic quoq; miles erit.
 Obijciuntq; tibi cœlestia uirginis ora,
 Qualia uiderunt secula nulla prius.
 Et tibi : Quid, demens, miraris lumina cœli ?
 Quod mirere magis hæc tibi forma dabit.
 Huc geminas iam flecte acies, iam lumina nosce,
 Lumina quæ possent sollicitare Iouem
 Hanc dum tu spectas, pendes dum totus ab illa,
 Excipis accensas corde tepente faces.
 Et qui stellarum quærebas noscere cursus,
 Et cœli motus sedulitate noua,
 Miraris uultus castos, niueasq; papillas,
 Pectoraq; hyberna candidiora niue.
 In facie totusq; hæres, & lumine flagrans,
 Sideribus præfers uirginis ora tuæ.
 Et tecum dixti : Quid quæro sidera cœli ?
 Lumina non hæc sunt lucidiora polo ?
 A Veneris facie non est prior ulla : nec illa
 Distat ab hac multum, sit licet ipsa Venus.
 Hanc spectans Phrygius, spreuisset & ora Lacanæ,
 Dignior hæcq; ipsa uisa rapina foret.
 Hacq; magis forma potuit Calydonius heros
 Vri, quam flammis ô Tegeæa tuis.
 Tuta foret Danaë : diti nam quæreret imbrē
 Iuppiter, hanc potius conciliare sibi.

Sic longumq; bibens oculis male saucius ignem,
Figis in oppositis lumina luminibus.
Et cupis amplexus, atq; oscula figere labris,
Stringereq; amplexu lactea colla tuo.
Atq; preces Hymenæo offers, & munera supplex,
lungat ut ipse tibi quam tibi iunxit Amor.
Tum subito afflarunt iustis pia numina uotis,
Nam toto excepit pectore uirgo deum.
At postquam illa rudis primo se sensit ab æstu
Vri, non notis ignibus obstupuit.
Nec calor ille sibi, nec quid suspiria poscant,
Scire ualet, nec quid saucia corda uelint.
Quid cupiat nescit, nullosq; intelligit ignes,
Ast oculis optat sola placere tuis.
Insinuat sæuus paulatim se osibus ardor,
Quidq; queat monstrat non bene nota Venus.
Exurit mollis penitus nam flamma medullas,
Quam similem Aethneis ignibus esse putes.
Hinc sæpe ex imo mittit suspiria corde,
Sæpe uocat nolens nomina chara sibi.
Vox sæpe in medio liquit sermone loquentem,
Et solitus roseo fugit ab ore nitor.
Non calathi, non pensa ipsi, non stamina curæ,
Non colus, aut fusi, quos aboleuit Amor.
Quin & acus studium, & doctæ monumenta Mineruæ,
Langenti

Languenti fugiunt protinus ex animo.
In te omnis Manfrede tuæ stat cura puellæ,
Figit & in te oculos igne perusta graui.
O quoties spectans te toto expalluit ore:
Monstrauit quoties saucia corda rubor.
O quoties dixit: Si qua hæc pia numina curant,
Ista iuuet flammis consuluisse meis.
Optata & quoties secum connubia poscit,
Et felix tali coniuge, dixit, ero.
Sed non passus Amor frustrari est gaudia uestra,
Et casto iunxit uos Venus alma thoro.
Optatasq; tulit tædas tibi pronuba Iuno,
Præbuit & nuptæ flammea castus Hymen.
Hinc myrti in foribus pendent, & laurea ferta,
Fragrat & Assyrio culta uapore domus.
Virgineusq; chorus iuuenum, & leëtissimus ordo
Iam simul inclamant, teq; Hymenæe uocant.
Huc ades ô Hymenæe Hymen, Hymenæe uenito,
Hymen io properes, ô Hymenæe ueni.
Ornatur Manfrede tibi, tibi nupta paratur,
Virginem & optatam iam tibi ducit Hymen.
Iuno comes, Venus, & Charites, & blanda Voluptas,
Et sedet in niueo casta Diana sinu.
Omnia plena iocis iam sunt, felicia cuncta,
Te uocat in thalamos sæpe uocatus Hymen.

O te felicem, cui coniux contigit uni,
Cui non ulla unquam secla tulere parem.
Siue animum spectes, seu raræ munera formæ,
Seu quod uirgineo fulget ab ore decus.
Si genus, & ueterum spectes monumenta parentum,
Clarior haud unquam sanguine in urbe fuit.
Si patris dotes, tu certe dixeris, hic est
Bentiadæ gentis qui decus omne tulit.
Cum talem dederint igitur tibi sidera nuptam,
Quid tenui cessas deligere ungue rosam?
Eia age rumpe moras, tenerum iam collige florem,
Gaudia ne tantum (lente) morare tua.
Lætus Hymen Manfrede tibi tua basta profert,
Basta, quæ fuerant mille cupita procis.
En & onam nuptæ Manfrede Diana resoluit,
Iniice iam cupidas in tua iura manus.
Mitis Hymen, lunoq; comes tibi stragula sternit,
Optato tandem quo potiare sinu.
Suspirat uirgo amplexus, sua gaudia poscit,
Iamq; cupit lateri conseruisse latus.
Vesper adest, cessas quid dudum carpere florem?
Te manet in thalamo nupta pudica suo.
Claudite iam postes, potiantur munere lecti,
Deiq; uiro tenerum nupta puella femur.
Sparge marite nuces, Veneris dum gaudia sumis,

Ludit

Ludit & in tepido nuda puella sinu.
Tu quoq; nunc Veneris lusus castissima uirgo
Exerce, his rixas implicuisse iuuet:
Non quas ira ferox moueat, sed concitet ipsas
Ausu aliquid tandem non bene docta manus.
Iam solitum iam pacta uiro depone pudorem:
Quid tua, quid differs gaudia lenta uiri?
Qui tibi se uouit, qui te ueneratur, amatq;
Cui uita & geminis charior es oculis.
Coniugis amplexus Lucretia casta petiuit,
Seq; dedit cupido Penelopea uiro.
Te decet hoc etiam, Veneris iam gaudia carpe,
Quæ tibi mille parat gaudia, mille uiro.
Ludite iam pueri pariter, sudate medullis,
Soluite concordēs debita iura thoro.
En simul implicitis dant mutua basia linguis,
Consertis repetunt sæpius illa labris.
Amplexus hederas, & murmura grata columbas
Vincunt, dum ludunt læti in amore pares.
Quare agite ô iuuenes, uos ô gaudete puellæ,
Optate & uotis commoda grata suis.
Viq; uigil roseos tardet Thaumantias ortus,
Lucifer optatas præstet utriq; moras.
Sic uobis sit mitis Hymen, sic gaudia uestra
Accelerent oro numina magna deûm.

Ipse ego quod cupio, sincero pectore poscam,
 Vivant unanimes secula longa simul.

Ducant concordēs felici sidere noctes,
 Sintq; dies fausti, sit sine lite thorus.

Suscipiant ipsis prolem genitoribus æquam,
 Et uigeat semper firma in utroq; fides.

IN FVNERE IOANNIS MANARDI
 præceptoris optimi.

ERgo 'ne crudelis rupit tua stamina Parca?
 Tantum etiam potuit dira patrare nefas?
 Ergo te urna brevis claudit, quem fama perennis,
 Fert celebrem latè docta per ora uirum?
 Quid colluisse iuuat medicas nunc puriter artes?
 Quid Phœbum cunctis præposuisse deis?
 Stemmata quid uē tibi? quid auūm generosa propago
 Profuit? aut ostris inseruisse caput?
 Si te, sancte senex, duri inclementia fati
 Sustulit, & campos misit ad Elysios.
 Iam nil sub cœlo est firmum, sors omnia uersat,
 Spesq; hominū cæcas mors inopina rapit.
 Namq; ego te extinctum, extinctum te cerno Manarde,
 Quem toties timuit mortis acerba manus.
 Quem fore perpetuum terris (si fata tulissent)
 Sperabam, aut Pylios uiuere posse dies.

I nunc,

I nunc, atq; hominum quæras producere uitam,
Pæoniæq; arti consuluisse iuuet.
Virtuti confide tuæ: iacet ecce Manardus,
Ille decus nostrum, præsidiumq; iacet.
Hinc Medica ars languet tristis, tumuloq; parentat
Vindicis & deflet fata suprema sui.
Nec Medica ars tantum tristis tua funera luget,
Et quæ te excoluit semper amica cohors:
Squallidus at Phœbus fusis per colla capillis,
Et mœsta obtundens pectora sacra manu.
Vt quondam luxit crudelia funera nati,
Nati, quem terris abstulit ira Iouis:
Quod Virbi extincti manes reuocarit ab Orco,
Præstiterit uita morte negante frui.
Assiduo incusat gemitu crudelia fata,
Et cubat ad cineres nocte dieq; tuos.
Et merito. eripuit nam nobis te inuidia Parca,
Cuius ope is fuerat creditus ante deus.
Morte tua Podaliri olim defecerat artis
Inter mortales pars bona Apollineæ.
Sed dedit ut letho magnum Libithina Manardum,
Quicquid erat reliqui, morte sua interijt.
Pro sortem miserandam hominum, proq; impia fata,
Præsidium uitæ sustulit hora brevis.
Sustulit hora brevis spes nostras, Atropos & nunc
I 5 Impune,

Impune, heu, nobis bella inimica mouet:
Bella inimica mouet, longasq; ulciscitur iras,
Nec timet ullius sæuior usq; manum.
At tibi mors inuisa nihil dedit ipsa dolendum,
Illa mali nobis causa maligna fuit.
Tu uenerande senex, terris colis astra relictis,
Et quæ mente prius nunc leuis astra subis.
Atq; animas inter diuas, cœtusq; beatos,
Transactæ uitæ præmia digna legis.
Authore atq; tuo, fragili compage solutus
Nunc fruëris, summo gloria magna polo.
Felices animæ, quibus is super ardua cœli
Tecta comes, tecum uel quibus esse licet.
Morte tua hæc gaudent, nostris ditantur auaræ
Damnis: at nobis flebilis umbra iâces.
Hinc nos infelix turba, & male sana propago,
Vexamur curis, prò dolor, usq; nouis,
Et nos sæua mali torquent contagia morbi,
Nec datur, heu, lætum uiuere posse diem.
Quare agè sancte senex, nitidi nouus incola cœli,
Lumine qui raro clara per astra micas,
Si te nunc tangit nostræ pia cura salutis,
Nec surda iustas negligis aure preces,
Respice nos quæso felici lumine, quosq;
Dilexisti in terris, nunc quoq; diue foue.

Pelle atraſt peſtes, lethales diſcute morbos,
 Et miſero generi non leue numen ades.
 Sic tua diuinos tibi det Ferraria honores,
 Sic ſoluat cineri debita iuſta tuo.
 Aeternumq; tibi ſic uer, ſic cinnama ſurgant,
 Et pariat flores nigra ſauilla nouos.
 Aſt ipſe interea tumulto hæc tibi carmina figam,
 Grati animi & mœſti pignora certa mei.
 Hoc iacet in tumulto tecum medicina, Manarde,
 Alterutrum haud potuit nam dare Parca neci.

AD IOANNEM BAPTISTAM

Cananum, diſcipulum aman-
 tiſſimum.

IAM ſatis indultum eſt Genio, iam munera poſcunt
 Te tua, iam celeri eſt urbs adeunda pede.
 Torrida adurebat radijs dum ſirius arua,
 Fas fuit à ſtudijs te cecidiſſe tuis:
 Alterna ut requie poſſes aſſumere uires,
 Promptius, & ueris inuigilare bonis.
 Cum uero autumno mixtum det bruma teporem,
 Cur etiam ruri luſibus ipſe uacas?
 Non ſatis apta tuis ſunt rura uirentia cœptis,
 Si bene coniectes quæ ſibi rura petant.
 Agricola hic terram curuo proſcindit aratro,
 Et raſtri aſſiduo pondere pulſat humum.

Hicq;

Hicq; premit molli pedibus sua musta Lyæo
Vinitor autumni hic munera grata legit.
Ille suas ducitq; boues ad pabula læta,
Hic pecudes molli uimine lentus agit.
Ast alius putri committit semina sulco,
Vt largo hinc crescat scœnore culta seges.
Et rostro rapiant ne auidæ frumenta rapaci,
Hic sonitu assiduo, uocēq; terret aues.
Illis insidias, illis & retia tendit,
Et uisco incautas fallere sæpe parat.
Alter ne nimia semen putrescat ab unda,
Deducit riuos prosilientis aquæ.
Viminibus textam segeti prætere sepe
Hic parat, horrentes urereq; igne rubos.
Inserit ille pyros, paritq; hic ordine uites,
Hic steriles ramos luxuriemq; secat.
Hic nemora & saltus, atq; horrida lustra canum ui
Sollicitat, sæuas doctus adire feras.
Hicq; breui nihil est, quod te ad tua munera poscat,
Non ullus cœptum qui tibi pandat iter.
Adde quod & Satyros, & rustica numina Panes,
Capripedes Faunos hæc loca ferre solent.
Quod ruber hortorum custos his fingitur aruis,
Non dea quam mentis fudit ab arce pater.
Sed colit ipsa olim Pallas quas condidit arces,

Nec

Nec decet hanc humiles incoluisse casas.
Dixeris, Admeti pecudes formosus Apollo
Pauit, & è claro uenit in arua polo.
Atq; huc è nitidis descendit Iuppiter astris,
Et campo in medio est passa puella louem.
Rus quippe incoluit (quid enim manifesta negarem?)
Et teneros Titan duxit in arua greges.
Sed qui tunc Phœbi uultus, qui fulgor in ore?
Quantum ille à se ipso uisus abesse fuit?
A quoties illum ut uidit Latonia uirgo
Ducentem pastas flumina ad alta boues,
Ingemuit fratri, casu perculsa maligno,
Signauitq; illi feruidus ora rubor.
Non erat ille etenim, qui lampade cuncta gubernat,
Auricomus penitus cesserat ore nitor.
Quaq; erat assuetus duros frenare iugales,
Nodosi baculi dextra ferebat onus.
Et pater ipse deum coluit dumosa uireta,
Sed rogo, quæ facies tunc erat illa Iouis?
Errantem hunc medios cum Io est perpeffa per agros?
Cum ficto Europa est per mare uecta boue?
Cum Satyrum hunc sensit gemino Nyctæida fœtu?
Cumq; caper niuei uir gregis ipse fuit?
Non ea qua è summo iaculatur fulmina cœlo,
Non qua consuevit dicere iura deis.

Ergo si

Ergo si amisit lumen per pingua culta,
Mundi oculus, quo non clarius ante fuit:
Siq; ipsum rapuere sibi tunc arua Tonantem,
Illi nec quicquam quod Iouis esset erat:
Te eripient sic ipsa tibi, lumenq; relinquet
Te laudis, nisi tu mœnia culta petas.
Nec mihi Serranum sulco læta arua ferentem
Obijce, non ætas quos prior illa tulit.
Namq; alios poscunt mores sibi secula nostra,
Atq; alia est nobis nunc patefacta uia.
Chaoniæq; olim ut glandi successit arista,
Et puro uicta est uitrea lympa mero:
Sic abiire rudes etiam de pectore mores,
Nobiliorq; uiris uita parata fuit.
Et quæ omnes quondam decuere, hoc tempore tantum
Semiferos homines rustica facta decent.
Et licet ipse Maro duos laudarit agrestes,
Augusti coluit tecta superba tamen.
Maluit idem etiam regali accumbere mensæ,
Quàm propter riuum semper euntis aquæ.
Et docuit potius leges artemq; colendi,
Quàm putres glebas uerterit ille boue.
Adde etiam, quod tristis hyems adoperta pruinis
Imminet, & syluis bella inimica parat.
Antè igitur campos ingens quàm frigus adurat,
Et Boreis gelido ducat ab axe niues,

Linque arua, agricolis ualido fragenda bidente,
Et reduci gressu huc ad meliora ueni.
Te rogat hoc genitorq; tuus, te Cynthia orat,
Si pondus Cynthiae uerba precantis habent.
Nec minus hoc poscit uotis Antonius abs te,
Qui cepit rerum pandere caeca tibi,
Ille decus summum, & seculi noua gloria nostri,
Verus honos patriæ, lux generisq; tui.
Aspice quàm læto hic tollatur ad æthera plausu,
Quàm clarus uolitet docta per ora uirum.
Nec credas talem florentia rura tulisse:
Non tales possunt hæc loca ferre uiros.
Nec quod de aucupijs uolucrum, aut uenatibus usq;
Quæsierit sæuas comminus ire feras,
Naturam nouit, cœli non aurea regna,
Nec stellis numerum tradere posse suum,
Gloria perpetuo est illi quæsitæ labore,
Et uigili studio uexit in astra caput.
Hæc eadem sectanda tibi est quoq; semita cursu,
Ut uenias quò te iam tua cœpta uocant.
Si qua igitur laudis tangit te cura futura,
Aeterniq; tibi nominis ardor inest:
Et causas rerum, & naturæ arcana tueri,
Atq; tuum antiquis addere nomen auis,
Quos tua progenies longo tulit ordine claros,

Seu belli spectes munera, siue togæ,
Huc propera, & lusus, quos fert male suada voluptas,
Linque oro, & prudens ad meliora redi.
Nam duri ut grauior pars est exhausta laboris,
Vltima sic superest metâ terenda tibi.
Vt tibi perpetuam parias per secula famam,
Nec rapiat nomen nigra fauilla tuum.

F I N I S.

CYNTHII

CYNTHII IOANNIS

BAPTISTAE GYRALDI

Epigrammaton Liber
primus.AD D. HERCVLEM
ESTENSEM II.

V. M Martem Musis, Musas
coniungere Marti
Te iuuat, & deceat munus u-
trumq; Ducem:
Nam Musis ferro seruat grata
otia Maiors,
Pegasides' que inter Martia

signa iuuant:

Nunc ego, quo Martis possis lenire labores,

Hæc dono Aonijs uerba coacta modis.

Et quamuis non sint te principe munera digna,

Principe qui Phœbo carmina digna facis:

Tu tamen hæc placido capias, rogo, carmina uultu,

Synceræ fidei pignora certa meæ.

Et cum depones clypeum, Dux Maxime, & hastam,

Quæ mea Musa dedit, qualiacunq; legas.

K

Sic

Sic tibi circumdet felicia tempora laurus,
Laurus honos belli, gloria summa togæ.

IN INVIDVM.

MOmē, licere negas nobis per florida Cynthi
Ire iuga, & sacro fonte leuare sitim.
Sed male coniectas, uates Thymbræus Apollo est,
Pœonia & morbos subleuat ille manu.
Est pulchrum Musas medicis coniungere rebus,
Hæc bene qui iungunt, hos bene Phœbus amat.

DE D. HERCVLE

Esteri II.

TErribilem gereret summa cum casside cristam
Dux meus, & forti stringeret arma manu;
Obstupuit Mauors, dixitq; : ut Thracia Marte
Gaudet sic gaudes Ausonis ora tuo.

DE SOLONE PHILOSOPHO & Venere dea.

PAlladis afflatu patriæ dum conderet olim
Iura Solon, illi candida Cypris ait :
Quid sequeris, demens, plena hæc monumenta laboris ?
Cur placidum numen non colis ipse meum ?
Forte puer coluisse Cypri. Tritonia nobis
Est longe inferior, iudice uel Paride.

Huic

Huic senior: Phrygio si mens non læua fuisset,
Non esset flammis Troia cremata tuis.

Tu uero ne, quæso, iterum me iudice certes:
Nam tibi non cedent aurea poma, Venus.
Me iuuat iste labor, uera hic parit otia sudor:
Otia sed flammæ, quæ facis ipsa, ferunt.

AD PETRVM.

Bembum.

THusca tuo debes Petrarchæ Musa parenti
Multum, Bembæ sed magis una lyra.
Namq; is te genuit, Bembus reuocauit ab Orco:
Illud mortale est, hoc reor esse dei.

AD EVNDEM.

ORpheus Eurydicem fidibus reuocauit ab Orco,
Abstulerat misero quam properata dies.
Tu quoq; quæ occiderat, reuocasti à manibus imis,
Dulcisono Thuscam carmine, Bembe, chelym.
Orpheus hinc merito es mihi tu, cui laurea cingunt
Serta caput, per quem gloria Thusca uiget.

DE IOVE ET AMORE.

PAsceret armenta Admeti cum pulcher Apollo,
Iuppiter, Ecquis (ait) sparget in orbe iubar?
Huic Amor: Ille, inquit, qui cælum & sidera rexit,
Fulmine dum posito tu quoq; pastor eras.

148 CYNTH. I. B. GYRAL.
DE FABRO MERETRICIS
domum colente.

ESte procul miseri, procul ô discedite amantes,
Hinc struit insidias Mulciber, inde Venus.
Hæc oculis animum capiet, uos tegmine ferri |
In medijs capiet Lemnius ipse iocis.

DE D. HERCVLE ESTEN. II.

VIdit ut Alciden cælo Saturnia ab alto,
Gestantem forti regia sceptrâ manu,
Immemor irarum, dixit: Pulcherrime rerum
Esse tibi poterat quàm bene Luno parens.

AD IO. STANCHARIVM OPTI
mæ spei adolescentem.

Non mea fatidica est, ut Apollinis inclyta uirtus,
Nec dant Pegasides munera larga mihi.
Cynthius ipse uocor: nam quæ mihi lumine flammâs
Subdidit, hoc nomen, perfide dixit, habe.
Sim tibi Stanchari Gyraldus, Cynthius illi,
Nec tibi tunc uates, nec tibi Phœbus ero.

AD QVENDAM.

Parua ego do paruus, da grandis grandia paruo,
Donet quo paruus grandia dona tibi.
Magna peto, tibi parua tamen: nam grandia paruo
Parua quidem, paruo magna sed ista mihi.

AD

AD DIANAM ARIOSTAM.

O Re refers ueram, castissima Cynthia, Phœben,
Fronte, decore, comis, nomine, & ingenio.
Hoc solum differs, quod ceruos Delia figit:
At tu luminibus, sæua puella, uiros.

DE D. HERC. ESTENSI II.

Cvm dextra Alcides Mauortia prælia miscet,
Tunc credas Martem bella mouere manu.
At citharam placidus pulsat cum pectine eburno,
Tunc Phœbum dices increpuisse lyra.
Ergo ipsi meritò, referat cum numen utrumq;
Cingit honoratum laurus honora caput.

DE NIOBE.

E Ste procul lati, cernant mea funera tristes,
Non similis toto mœror in orbe fuit.
Bis septem natos peperì, bis pignora septem,
Me miseram, dixùm sustulit ira mihi.
Dirigui demum lachrymis, & marmora manant:
Sic mihi mors dolor est, sic mihi uita dolor.
Discite mortales, quid sit turgescere fastu,
Et quid sit magnos posthabuisse deos.

AD DIANAM ARIOSTAM.

I actat tela, faces, & retia tendit ubiq;
Delia: quò uertis lumina, sæuus Amor?

Et quicumq; semel claros conspexit ocellos,
 Figitur, ardet, amat, captus amore perit.
 Infelix igitur postquam tua lumina uidi,
 Hei misero, patior retia, tela, faces.

/ DE LYCO PALVSTRE.

Ille Lycus, Damon, Lycus ille infamia nostri,
 Incolit en audax tecta superba ducum.
 Et quamuis fœdus, cunctorum corda perurit,
 Non secus ac Veneris filius ipse foret.
 Quin regi & curæ est, licet ante hunc spreuerit Irus:
 I nunc, & falli numina posse nega.

AD D. HERC. ESTEN. II. DE

Diana Ariosta.

Quid pendent lychni, Alcide, laquearibus aureis?
 An forte ut noctis nubila luce fugent?
 Nubila luce fugat, mediâq; in nocte nitefcit,
 Delia: sint procul hi, nam satis ipsa nutet.

DE SOLE ET DIANA ARIOSTA.

Cum dederit claram nobis ita Cynthia lucem,
 Ut fratris radios uicerit ipsa sui:
 Ergo meo, dixit Phœbus, sic lumine uincor?
 Ergo ego sum damni sic mihi causa mei?
 Dempfit & his dictis, quæ tradidit antè sorori
 Lumina, luminibus quo foret orba soror.
 Illa tamen clarum sparsit de more nitorem,

Et tulit

Et tulit obscura lumine nocte diem.

I modò Phœbe, inquit, nunc esse nitentia nobis
Lumina, nosq; diem promere posse nega.

DE LYCO PALVSTRE.

ESt, Lyce, prava tibi mater, turpisq; procaxq;
Quæ facere, atq; pati, fanda nefanda potest.
Fœda oculis, fœda ore, & toto corpore fœda,
Moribus est eadem fœdior, atq; animò.
Membra illi pallent macie, illi lingua ueneno
Suffusa est, tabe & tota peresa uiret.
Tu quoq; te draucis subicis, subigisq; cinædos,
Quos & demisso sæpe uoras capite.
Tu medios lambis pueros, medi isq; puellas,
Hinc tibi sæpe madent pallida labra sero.
Tristis suffudit liuor tibi lurida membra,
Hinc es inaurata pallidior statua.
Lingua iacit uirus, fraudes & nequitia amicis,
Quos & amas perdis, nequior Inuidia.
Sic illa est te digna parens, tu dignior illa
Filius, insolitis obrute criminibus.

DE TURCO ET CAROLO

Imperatore.

Quid frustra cogis molles in bella phalanges,
Si Caroli audito nomine, Turce, fugis?

20 DE EODEM CAROLO.

VT Carolum uidit uictorem Iuppiter, huncq;
Et terra, & toto ponere iura mari:

Infelix, dixit, tu nobis proximus unus,
Astra mihi parent, cætera Cæsar habes.

DE EODEM.

CVM pridem manes iuisset fama sub imos,
Te Carole inuicta uincere cuncta manu,
Reddere & imperium Latio uictoricibus armis,
Et Romæ amissum restituisse decus,
Augustus Cæsar dixit: Tu maxime, solus
Augusti meritò nomina clara tenes.

DE AMORE INERMI.

CVR tibi tela, puer, desunt? cur flexile cornu?
Lumina cur lachrymis nescia flere madent?
Subduxit mihi tela oculis castissima Phœbe,
Prò dolor, hincq; miser, uictus, inermis eo.

DE D. HERCVLE ESTEN. II.

CVM meus Alcides inter thoracas ahenos
Arderet, uiibrans fortia tela manu,
Hunc spectans Cypris cælo delapsa per auras,
Venit in amplexus, Marte negante, Ducis.
Tunc gemuit Mauors: Et quid mihi numina prosunt,
Si nunc mortali lumine uincor? ait.

AD

AD DINDYMVN.

Ipsa tibi soror & coniux est, Dindyme, Iela,
Nimirum terris Iuppiter alter ades.

GALATEA AD VENEREM.

Diva potens Cypri, cœli decus, alta Cythera,
Piscosamq; Gnidon quæ colis, atq; Paphon,
Hanc tibi do myrtum, myrtum hanc Galatea uirentem,
Istaq; odoratis lilia mixta rosis.

Tu dea, qua flamma nobis nunc pectora torres,
Vre Acin, quo fax torreat una duos.
Casside sic posita foueat tua pectora Mauors,
Sic tecum æterna flagret & ille face.

IN LYGDAMVN.

Indulget fortuna tibi, tibi Lygdame ridet,
Si nescis, casu quo grauiore ruas.
Vidi olim multos felici sorte tumentes,
Quos eadem miseros præcipitauit humi.

Ne rebus confide tuis, sors omnia uersat,
Sæpe oneri & cedit pondere pressa suo.

DE AMORE ET DIANA ARIOST.

Vldit Amor Phœben, uisa cecidere sagittæ:
Ipsa illos sumpsit, pro pueroq; ferit.

DE ALBERTO TURCO.

Vlx bene fulmineum Turcus uibrauerat ensen,
Tentaret ualida quo fera bella manu:

Cum subito gelidos hostii timor occupat artus,
 Et modò tam fortis, nunc timet ante tubam.
 Et secum tacitus, quid enim quid molior? inquit:
 Hic mihi nunc Mars est, qui modò Turcus erat.

DE EODEM.

VT Turcum uidit tectum fulgentibus armis
 Iuppiter, hunc Martem credidit esse ferum.
 Ut uero hic forti tentauit praelu dextra,
 Hic Marte est maior, dixit, & obstupuit.
 Hinc mihi nil mirum, metuit si territus hostis,
 Nam poterat Maiores hac cecidisse manu.

77 ANNAE BEREGVARDÆ TVMVLVS.

Cur flent hic Charites? hic flet cur aurea Cypris?
 An fato est hominum fas lachrymare deas?
 Non flent diuæ hominem, sociæ sed iusta ministrant:
 Anna etenim terris Gratia, Cypris erat.

DE ADMETO PVERO.

VT puer Admetus rorantem sanguine Adonis
 Vidit aprum, rapidus sustulit inde pedem.
 Dumq; fugit Medæ occurrit, cæde recenti
 Natorum madidæ, quæ ense necat miserum.
 Prò miserande puer, tutius te credere sæuis
 Tygribus heu poteras, uel dare membra sui.
 Nam licet is rictu tenerum lacerasset Adonin,
 Medea

Medea potuit mitior esse tamen.

Quæ nanq; extinxit crudeli funere natos,
Non tibi debuerat parcere dura manus.

IN LYCVM PALVSTREM.

Quid Dictynna Lycum cessas lacerare procacem,
Qui sanctæ rupit iura pudicitie?
Turpiter estq; tuos ausus scelerare penates,
Dum sibi commissio uim tulit ante gregi.
Non satis est solitis pulsus quod montibus erret,
Dempta illi & teneri sit pia cura gregis.
Hoc multo minus Actæon commiserat olim,
Ille tamen canibus præda cruenta fuit.

DE AMORE ET DIANA ARIOSTA.

Sumpserat arma puer Veneris, quo pectora Phæbes,
Vreret igne sacro, frigidiora niue.
Ut uero hunc uidit sinuantem cornibus arcum,
Flammiferis oculis trux petit ipsa deum:
Quid nos ut ferias, dixit, tua tela fatigas?
Nunc age, nunc nostras experiare faces.
Et dicto citius oculis sic ussit Amorem,
Cesserit ut Phœbæ spicula sæua puer.
Illa triumphales deprompsit læta sagittas,
Yrit & hinc homines, urit & inde deos.

ARTVSI HERC. ESTEN. VENA-
torij canis tumulus.

Cerberus est sedis custos Plutonis opacæ,
Possidet Icarius lucida regna canis.

At si uirtuti tradantur præmia digna,
Artuso danda est illa, uel illa domus.

Namq; is, dum uixit, superauit grandibus ausis,
Facta canis Stygij, uel canis Erigones.

DE PVERO DAPHNI.

Quid mirum, Daphnis fama si pectora Mopsi
Torreat, hac posset sollicitare deos.

Fac petat hic cælum, uideatq; hunc Iuppiter, ipse
Pocula miscebit pro Ganymede Ioui.

DE SVO AMORE.

Exuror glacie in media, dumq; uror, in igne
Algeo. si hæc patiar cur mala quæris? amo.

AD DIANAM ARIOSTAM.

Pectora cur flamma flagrent, cur frigida fiant
Sæpe gelu, quæris sæua puella, mihi:

Non scis? quod claros in me cum uertis ocellos,

Oraq; in humana uirgine digna dea,

Vrit crudelis misero mihi flamma medullas,

Nec requies uitæ tunc datur ulla meæ.

Quodq; ego si specto quanta est reuerentia famæ
Iuncta tibi, in medijs ignibus ossa rigent.

Sic per

Sic per te uruntur, per te sic pectora torpent:

Vna es tu glacies, ignis & una mihi.

DE VENERE ET MARTE.

INduerat thoraca humeris, & casside fuluum

Sopito amarat Marte Erycina caput.

Et clypeum læua, dextrâq; assumpserat hastam,

Cum Mars excitus talia uerba dedit:

Nil opus his Venus est, nudæ si celsimus olim.

Quid Galatea mihi nunc, rogo, bella moues?

DE STATVA VENERIS.

Sic similem Veneri Venerem cælauit Iulus,

Vt Mars non lapidem, sed putet esse Cyprim.

Vt uero hic statuam cupidus complectitur, inquit,

Aut Venus in lapide est, aut riget ipsa Venus.

DE AMORIBVS DISPAR.

TV Galateam ardes Cyclops, te non secus odit

Hæc nympha, ac auidū parua iuuenca lupum.

Et meritò: forma nam par Galatea Dionæ est,

Ascalaphum sed tu lumine & ore refers.

Ast Acin Galatea perit, digna estq; peruri

Hac flamma: at fœdam deperit ille Napen.

Quanto esset satius, si tu Polyphæme fuisses

Acis, siue Nape tu Galatea fores?

DE IOVE ET CVPIDINE.

IVpiter ut sensit diuorum pectora Amoris

igne

Igne uri, his avidum corripuit puerum.
 Pone modum flammis, diuosq; exurere cessa.
 Ni cesses pœnas fulmine, crede, lues.
 Risit Amor: Genitorq; (inquit) quo fulmine terres,
 Icere debueras, cum mihi taurus eras.

IOANNIS MANARDI TVMVLVS.

NON hæc quã spectas claudit brevis urna Manardũ.
 Claudere tam magnũ nam brevis urna nequit.
 Est ipsi tumulus, quicquid sol lumine lustrat,
 Et quicquid magnus proliit Oceanus.

DE AMORE FVLME^N FRACTVM
manu gerente.

COnuenere olim pariter concurrere telis,
 Hinc diuũ genitor, Cypridis inde puer:
 Corripit hic arcumq; manu, celeresq; sagittas,
 Ast ille armatus fulmine bella mouet.
 Spicula uibrat Amor, fatalia fulmina torquet
 Rex superum, flammæ utraque tela ferunt.
 Sors dispar: pueri hæserunt nam spicula cordi
 Sæua Iouis, nullo is uulnere tactus abit.
 Tunc calamus, quo fossus erat, Rex frangere tentat:
 Huic Amor, hæc spernunt & Iouis arma manus.
 Ipse tua exscindam: nanq; ut tu uiribus impar
 Es mihi, sic cedunt en Iouis arma meis.
 Et rupit, quæ fracta manu nunc spicula gestat,

vt sint

Vt sunt uictoris signa superba manus.

DE EODEM.

Ipsæ ueniens uici, is cecidit mihi fulmina uictus :
Victorici hinc frango tela trifurca manu.

D. ALFONSI ESTEN. TVMVLVVS.

Clauderis Alfonso hoc tumulto, si claudere possit
Hic tumulus cælum quæ tibi bona dedit.
Sed parua hæc pars est, quam frigida marmora claudunt,
Namq; tui melior pars uiget. & potior.
Nec potuit famam, tibi quam tua gesta pararunt,
Aeternumq; decus perdere Parca nocens.

DE EODEM.

Alfonso extincto Mors secum læta: Quid, inquit,
Hoc potuit maius sternere dextra mea?
Hoc cæso, cecidit Mauors, hoc bellica Pallas,
Hoc decoris toto quicquid in orbe fuit.

AD CASSANDRAM MINOTAM.

Ipsa licet ducas uocis modulamine saxa,
Et rapidi possis sistere fontis aquas,
Iunonem forma superes, superesq; Dionem,
Et Latonigenæ uirginis ora deæ,
Non tamen hæc miror: miror quod Palladis artes
Sint iunctæ in forma hac pulchra puella tibi:
Quod sancti mens sit, mens sit tibi conscia rectori,
Præponas cunctis pecciora casta bonis.

Cassandra,

Cassandra, illa brevis fati : sed propria sunt hæc
Dona tibi, nullo dona abolenda die.

AD IVLIAM.

Non mihi si tot sunt oculi, quot sidera cælo,
Quæ tibi cunq; insunt, Iulia, perspiciam.
Ergo nil mirum, si non sunt lumina tantum
Bina satis, quo te plene ego perspiciam.

AD FLAVIUM ANT. FRATREM.

Fortunæ nimium Flavi ne crede secundæ :
Sed mage quo blanda est, hoc grauiora time.
Nam modò quos placida extulerat, nunc deprimit atrox.
Et firma in sola est mobilitate dea.
En Xerxes, Cræsusq; astris felicibus usi,
Mox tristes dominæ succubere rotæ.
Et Priamus sæui urebant dum Pergamon ignes,
Indiguit flammis ad sua busta miser.
Crede mihi, ex tenui pendent mortalia filo,
Et celeri fugiunt gaudia nostra pede.

DE CAROLI IMPERATORIS
Augusti effigie.

Quis neget Augusti faciem, quis pectora, quis ue
Lumina, uel Marti pectus tremenda deo,
Hac cerni in tabula ? Nemo : nam quicquid ab arte,
Fas fingi est, finxit dædala quippe manus.
Sed quamuis heros referat pictura color es,

Verior in

Verior in factis extat imago suis.

DE SE AD AMOREM.

CUm tot tela Puer iactes, totq; improbe flammæ,
 Igne fretum ut flagret, terra, polusq; tuo,
 Spicula quis tibi tot, quis tot tibi suggerit ignes,
 Quot corde in nostro nocte dieq; iacis?
 Ipse faces cum tot patiar, tot spicula, credo,
 In me unum quod nunc sæue Cupido furis.
 Parcius ure, precor. Nam si produxeris iras,
 Non me, sed cineres, & mea busta petes.

IN PACTIVM.

ORe uenena iacis Pacti in me noxia putri,
 Sed clam: namq; times comminus ire mihi.
 Et uersare dolos tentas, modo possis obesse
 Improbe, nec curæ est fas ue, pium ue tibi.
 Crede mihi, aspiciunt superi tua crimina ab alto,
 Vltricesq; parant in tua damna manus.
 Interea tamen ipse precor, pro talibus ausis
 Quod desit tellus, desit & unda tibi.

IN MALEDICVM ARCHEMORVM,
 de Cœlio Calcagnino.

Ambrosiam, & nectar, quod fundit Cœlius ore,
 Et quæ de docto pectore uerba fluunt,
 Archemorus quærit tetro temerare ueneno,
 Dum demens iugi rumpitur inuidia.

L

Nil agit

Nil agit ille tamen, nam miscet mella ueneno
 Coelius, idq; facit dulcius ambrosia.
 Hinc est, quod liuet, macieq; peresus inerti,
 Corpore iam toto palluit Archemorus.

AD D. HERC. ESTEN. II.

Magna canāt quamuis de te, Dux inclyte, uates,
 Nemo tuis meritis uersibus æqua facit.
 Et quamuis cupiant quāplurima fingere cantu,
 Tu quoq; Dux fictis maxime maior eris.
 Namq; ut nulla ualent lucem addere lumina soli,
 Carminibus tua sic crescere fama nequit.
 Ergo licet crescant uates, & carmina, nullus
 De te unquam mendax esse pōeta potest.

IN INUIDVM.

Luor, quid tentas atro temerare ueneno,
 Aurea, quæ cecini, regia sceptrā Ducis?
 Arrisit Dux ipse mihi, iam comprime uirtus:
 Iam tibi corrodat uultur, inique, iecur.
 Quod si uesanos quæris finire furores,
 Intende huc oculos, quo moriāre, miser.
 Ipse tibi macies, tibi ero Libithina maligno,
 En tibi crux parta est, liuide luor, obi.

MORA NIGRA EX ALBIS.

Nemirere nigrum nobis nunc esse colorem,
 Qui succus nunc est, hic erkor ante fuit.
 Alba

Alba etenim fuimus poma, at nos reddidit olim
Pyramus & Thysbe sanguine nigra suo.

AD ILLVST. GALEATIVM

Esten. Tassonum uirum
clarissimum.

TE duce iam sæuos undarum uicinus æstus,
Et fuit in tuta te statione ratis.

Nunc iterum sed nos agitat uiolentior Eurys,
Et petit (heu) miserum sæuior unda caput.

Turrisus nostræ subeas moderamina puppis,
Ne quem seruaras, horrida perdat hyems.

Sic tibi, sic nullo cælum turbetur ab hymbre,
Et mare tranquillum sic tua puppis aret.

DE HERCVLE ESTENSI

Duce IIII.

ORa Cleonei capiti dum fulua leonis
Induis, Alcide, dum capis arma manu,

Arma quibus cecidit moles Nemeæa, uolucres,
Hydra, aper, & taurus, tergeminusq; canis,

Dumq; humero imponis clypeum. spolioq; superbo

Te tegis, atq; hasta fortia bella moues,

Te spectans cælo, dixit Tirynthius, Ecquid

Nunc me alium genuit de Ioue sceta parens?

Talem quippe uirum si tempora prisca tulissent,

Hoc foret, hoc uno gloria nostra minor.

L 2 CYNTHI

Agnâq; sic uobis candida sæpe cadat.

IN LYCVMPALVSTREM.

N Arcissus liquidis dum se spectabat in undis,
Ipse sui (hei misero) uictus amore perit:
Nunc tua forte tibi si occurrat turpis imago,
Infelix, odio sic moriere tui.

DELIAE DAMIANAE SO-
crus tumulus.

Q Væ Venerem forma referebas, arte Minervam,
Ingenio Phœben, hic Damiana iaces?
Quid sperem in terris firmum, si munera tanta,
Totq; animi dotes Parca inimica tulit?

FVLVII BALTHASARIS
Bardeli tumulus.

B Althasar hic iaceo, primo quem flore iuuentæ
Decerpfit rapida mors inimica manu.
Si spectes annos, iuuenem me fata tulerunt:
Si ingenium, dices me perisſe senem.

IN TVMIDVM ARCHEMORVM.

Fortunam Archemorus petulanti uoce laceſſit,
Munera quod meritis non ferat æqua ſuis.
Huic dea: Pro meritis dedero ſi munera digna,
Iro pauperior iure eris Archemore.

CYNTH. I. B. GYRAL.
DE GEORG. LOXANO ET
Catharina Aquila Coniugg.

Tectus olorinis plumis Pater ipse deorum
Venit in amplexus, Læda beata, tuos:
Nunc aquilæ (mirum) ficta sub imagine luno,
Loxani in gremio scedere iuncta cubat.
Tyndaridas Læda enixa es, duo lumina diuū n,
Nil mirum, ediderit si quoq; luno deos.

AD LILIVM GREGO-
rium Gyraldum.

Implumem quod me niueis subuexeris alis,
Et tua deiectum Musa leuarit humo,
Hæc tibi do, Lili nobis non debita ferta,
Istâq; honoratis munera digna comis.
Tu modo quem rapidis fers alta ad sidera pennis,
Ne linguas, ne te deficiente cadam.

AD D. RENATAM ESTEN.

Dives opum luno, prudens Tritonia Pallas,
Delia casta, nitet pulchra decore Venus.
Tu diues, prudens, tu casta, & pulchra Renata es:
Te minor est Phœbe, luno, Minerua, Venus.

AD COELIVM CALCAGNINVM.

VT sol, cum toto radios diffundit Olympo,
Sidera fulgenti lumine cuncta fugat:

Sic

Sic Cœli promit sese cum dædala Musa,
 Carminibusq; nouum spargit in ore iubar,
 Sola micat, cunctosq; premit, qui luce corusca
 Flagrabant uates, lampadis igne suæ.

DE FRANCISCO SAR-
 raceno personato.

Quid mihi nunc latras, ficta quod imagine formæ?
 Celarim faciem, liuida turba, meam?
 Sæpe louem decuit ficta sub imagine formæ
 Ludere, & ardentes destituisse polos,
 Et cycni formam, formamq; assumere tauri,
 Magni ut celaret numinis ille iubar.
 Sic & nos decuit tetricos deponere uultus,
 Et grauibus curis inseruisse iocos.

DE ADMETO, QUI SE HÆ-
 redem instituit.

Vreret Admetum febris cum leihifer æstus,
 Proximaq; aspiceret fata suprema sibi,
 Ante Erebi quàm umbras peteret, noctemq; profundā,
 Hæredem extremis se instituit tabulis.
 Mox medicus letho, fatisq; potentior, ipsum
 Exanimem morti surpuit arte sua.
 Hic sospes cuncta absumpsit, quo ostenderet unum
 Hæredem uerè se superesse sibi.

Obstringunt tibi me, uirgo pulcherrima: sed qui
 Corda tibi exurit religionis amor,
 Et morum probitas, castæ & reuerentia famæ,
 Men q̃ in mortali uirgine digna dea.
 Et pietas, & sancta fides, & uiuida uirtus,
 Et pudor, atq; animi tot bona rara tui.
 Felices, talem qui te genuere, Camilla:
 Sorte tua & sexu es celsior una tuo.

MATRIS LACAENAE VIRTUS.

VT clypeo impositum uidit Lacedamone natum,
 Cuspide traiectum fata subisse parens:
 Non casu percussa graui, sed læta sereno
 Aspectu exanimis conspicit ora uiri.
 Atq; illum complexa, inquit, Te hæc uulnera, nate,
 Incolume & clypeum mi probat esse meum.
 Hanc tantum ob causam peperì, ut cum posceret hora,
 Esset qui patriæ uellet amore mori.
 Iam lachrymæ hinc absint: nam tali ex funere matri
 Viuis, quem extinctum cætera turba gemit.

AD LESBIAM.

SI tot me iaculis figis, totq; ignibus uris,
 Nomine uix solo Lesbia nota mihi:
 Quos ignes patiar, quæ spicula, Lesbia, si in me
 Conuertas oculos, sidera clara, tuos?

L 5 Ignis

Ignis ero totus, totus, comburam, eroq;

Qui modò uir fueram, pulvis, & aura leuis.

AD MARCVM.

VT tibi te uere monstrauit, Marce, Philippus,
Qui tot iactabas, factus es Harpocrates.

MATRIS LACHRYMAE IN FU
nere nati morsu anguis
extincti.

NAte dolor matris, prima surrepte iuuenta,
Indigne (heu miseram) nate perempte mihi.

Te, modò qui patriamq; tuam, sanctosq; Penates

Protexi, cunētis qui modò terror eras:

Nunc demum imbellis transfixum dente chelydri

Exanimum uideo, funere degeneri.

Quid iuuat, heu, duri subisse pericula Martis,

Pro patria toties exposuisse animam,

Quae sisse & toties pulchram per uulnera mortem?

Sic nunc tam uili uulnere, nate, iaces?

Felices, quibus hostili procumbere dextra

Contigit, & forti fata subire nece.

Sic si te extinctum aspicerem, dolor omnis abesset,

At specie hac lethi flebilis umbra mihi es.

Sed postquam sic fata uolunt, sic funera poscunt,

Aeternum flebo, nate, mea lachryma.

DE IVLIO SCVLPTORE.

Si posset saxis animam coniungere lulus,
 Arte sua possent marmora dura loqui.
 IN SINONEM EVDOLEMVM.

Nulla lues orbi grauior, nec scedior ulla
 Est te, qui pariter fanda nefanda facis.
 Nulla tibi uirtus, nulla est tibi gloria cura,
 Sed tantum insidiæ, crimina, bella, neces.
 Nec mirum, genuit nam te sub faucibus Orci
 Tisiphone, fouit sæua Megæra sinu:
 Vberaq; exhibuit tetro liuentia tabo,
 Non prius humanis ubera sueta labris.
 Te Stygij lauere lacus, tibi turpis Erinny
 Angue cruentato pectora scæda ciet.
 Hinc Plute superas pridem si misit in auras,
 Vt lites terris, & scelus omne seras.

DE NIOBE MANV PRA.

22

xitelis sculpta.

Melapidem ex uiua fecerunt numina diuum,
 Praxiteles uiuam redidit ex lapide.

IN SINONEM EVDOLEMVM.

TAndem in me euomuit nigrū rabido ore uenenū,
 Marce, Sinon, quo non tetrior ulla lues.
 Sed bene res cecidit: nam quo me extinguere uiru
 Credidit, incolumi me, perit ipse Sinon.

DE

DE LESBIA

Sparserat auratos crines mea Lesbia uentis,
 Sparserat & nitidum lumine in orbe iubar,
 Cum sol hanc spectans, radios contraxit, & inquit:
 Cedant luminibus lumina nostra tuis.

Hactenus humanos uicisti, Lesbia, uultus:
 Nunc gaude, cedunt numina sacra tibi.

DE CVIVSDAM AMORIBVS.

Avreat quondam Cypris, nunc tristis aduris
 Lesbia, Tisiphone scædior, & grauior.
 Quæ matre Eumenide, & Stygio generata parente,
 Imo ignes in te de Phlegethonte tulit.

Quòd face tam sæua si uisit pulchra Dione,
 Quàm grauis hæc misero flamma futura tibi est!

VXORIS PRO VIRO FORTITVDO.

Vxor forte uirum uidit succumbere pugna.
 Hostis nec longum uulnera posse pati:

Ulla oblita sui, atq; animos induta uiriles,
 In medios enses acta dolore ruit.

Et mulier quamuis, quamuis exerta papillas,

Vlla nec armarent fortia tela manus,

Hosti ui gladium rapuit, clypeumq; uirago,

Protexitq; suo robore nixa uirum.

Moxq; illo incolumi, non ultra protulit iras,

Sed quæ hosti abstulerat mitius arma dedit.

His

His superincrepitans : Indigne occumbere dextra hæc,
 I uiue, ut merita mox moriari nece.
 Iactent Hippolyten, iactent sua secla Camillam:
 Iam superant priscam tempora nostra fidem.

AD MANLIVM.

Dispereo: sed quæ mihi das medicamina, Manli,
 Negligo, nã morte hæc sunt grauiora mihi.
 Emoriar, quid enim perdam nisi inutile pondus?
 Altera pars uiuet, morte negante, mei.
 Pulchrius ergo mihi est generoso occumbere fato,
 Quàm uita indecori fanda nefanda pati.

DE LACONE QVODAM.

Cvm clypeo exanguẽ impositũ Lacedæmona fer-
 Semianimo ut medici uita daretur ope: (rẽt,
 Ecce Lacon sentit socias dare terga cohortes,
 Et timidas rapido linquere castra pede.
 Profiluit, læua & clypeum, dextraq; potenti,
 Exanimis quamuis tela cruenta capit.
 Et sæuum inclamans: quò nunc, quò tenditis? inquit.
 State uiri, imbelles uulnera sæua timent.
 Est pulchrum perijsse uiris, dare nomina famæ:
 Ast turpe est uitam ducere degenerem.
 Mecum ergo audete, & libeat procumbere bello:
 Nam uita ex tali funere maior erit.

His dictis arrecti ani ni, per tela, per hostes
 Præcipitant, cupidi gloriæ amore mori.
 Mox uictor pulsus felici Marte Pelasgis,
 Ipse Lacon cecidit ut Lacedæmonius.

AD GALLVM.

Quid tentas undis extinguere Cypridis ignem,
 Qui tibi sub misero pectore, Galle, furit?
 Hunc Venus orta salo genuit, iam posito lymphas,
 Ex undis ortus non timet ignis aquas.

IN SINONEM EUDOLEMVM.

Presserat Eudolemus tollentem colla chelydram,
 Cum sæuè hic fixit dentibus Eudolemium.
 Sed quæ illi serpens properabat dente uenens,
 Sanguine gustato sensu, & interiit.
 Nec mirum, Eudolemi periit si sanguinis haustu,
 Corpore nam toto nil nisi uirus habet.

IN VESBIAM.

Tres habuit furias quondam, sed Vesbia manes
 Vt petit, furias quatuor Orcus habet.

DE ECNOMI SÆVITIA.

Nam qd te mirer Progne, qd te improba Colchi?
 Tempora si maius nostra tulere nefas.
 Ecnomus occidis furiali concitus cestro,
 Natum, olim matris, deliciasq; suas.
 Et gemina uxorem gestantem pignora in aluo,
 Quæ furias nondum nata tulere patris.

Addidit hic famulos, & castæ fata sororis,
 Qui fratri nunquam minor ulla fuit.
 Inunc, huicq; Scynim, Phaleremq;, ferumq; Procustem
 Confer, collatis sæuior unus erit.

HECVBAE VIRTVS.

Hætoris extincti cernit dum vulnera mater,
 Vulnura quæ aduerso pectore natus habet:
 Illa, oculos quamuis lachrymis suffusa dolentes,
 Aspexit forti pectore pectus hians,
 Atq; gemens dixit, Non hoc ego funere tristor,
 Tristor, quod tecum patria, nate, perit.
 Di rursus facerent, hæc posses fata subire,
 Et patria incolumi pro patria cadere.
 Sed postquam nobis hoc inuida fata negarunt,
 Gaudeo tam pulchra te occubuisse nece.

DE CLOANTHO.

Ofert Neptuno clypeum, Martiq; Cloanthus,
 Quod pelagi, & belli hoc uicerit ille mines.
 Hoc se etenim textit pugnans, hoc naufragus usus
 Pro cymba, euasit sæua pericla maris.

DE AMORE.

Quid mirum, exultet si sæuis, Lygdame, flammis,
 Si fletu gaudet nec minus acer Amor?
 Mulciber est illi genitor, flamma altius & igne:
 Hunc peperit medio nata Erycina mari.

Ergo ille hinc lachrymas ciet, illinc pectora adurit,
 Cum q; undis flammæ, cum face miscet aquas.
 Sic uersas lachrymas oculis, sic uritur igne
 Pectore sub medio, Lygdame, quisquis amat.

MATRIS LACAENAE VIR-
 tus in filium degenerem.

ANtilochus socios medio in discrimine belli
 Liquerat, & dederat terga pudenda fugæ.
 Cum nato occurrens traiecit pectora mater,
 Atq; his degenerem foemina corripuit:
 Imorere o mentite genus, mentite parentem,
 Nec meus es natus, nec Lacedæmonius.

AD D. HERC. ESTEN. PRO
 munere exorato.

SI quoties nostris respondent numina uotis,
 Numina continua sollicitata prece,
 Thure calent aræ, sacriq; adolentur honores,
 Et dantur magnis debita dona deis:
 Quid tibi nunc tradam, uoti (Dux maxime) compos,
 Quod possit meritis æqua referre tuis?
 Sed cum nil mihi sit te magno Principe dignum,
 Ne uidear munus dissimulare tuum:
 Me tibi do, & uocem hanc, quamuis exile sonantem,
 Tu quæso, hoc magni muneris instar habe.

Sic tua

Sic tua diuinos tibi det Ferraria honores,
 Sic tua post cineres fama uirescat anus.

AD LESBIAM.

Audit Sirenas, qui te audit dulce canentem;
 Et qui te cernit, Gorgonis ora uidet.
 Hinc riget alta silex, subit inde pericula ponti,
 Et gemina per te, Lesbia, morte perit.

AD FRANCISCVM
Sarracenum.

LAetus erat Thybris, dum celsas illius aras
 Incoleres, mœstus flebat at Eridanus.
 Sed postquam is reducem uidit, te sospite gaudet,
 Discessuq; gemit Thybris in amne tuo.
 Sic quocunq; pedes confers, facis omnia læta:
 Læta & quæ fuerant, sic te abeunte dolent.

DE PASIPHAE.

DUmpudet, & cupit optato concumbere tauro,
 His sese dictis Gnosia corripuit:
 Cur mihi crimen erit tergus subiisse iuuençæ?
 Et tenerum tauro supposuisse femur?
 Non quondam ut pulchra potiretur Agenore nata,
 Iuppiter in pratis mugijt ore bouis?
 Hoc si ipsum decuit, quis me damnauerit unquam,
 Ut boue perfruerer, nunc subiisse bouem?

M AD

AD VENEREM.

62

NE natum in triuijs fugitiuum Cypria quæras,
 Huc propera, in nostro pectore regnat Amor.
 Hicq; furit latitans, ægrum & crudeliter urit,
 Igni addens ignem, nec uolat hinc aliò.
 Tu puerum hinc Cytherea uoca, non basia posco:
 Sat mihi mercedis, si puer hinc abeat.
 Sic tuus assiduo tecum Mars igne cale scat,
 Sic semper cedat luno, Minerva, tibi.

AD LESBIAM.

Sic me blanda tui succendunt, Lesbia, ocelli,
 Ut miser ardenti concremer usq; face.
 Tot rursus rigor iste tuus sub pectore luctus,
 Cit mihi, ut assiduas cor fluat in lachrymas.
 Sic flamma per te exuror, sic soluor in undas,
 Sic geminæ sola es tu mihi causa necis.

DE MORTE HECTORIS.

INuide Mæonida, si nobis pectus Achilles
 Transadigit, cur nos terga dedisse canis?
 An forsân quo me uentura redarguat ætas,
 Degeneriq; ferat procubuisse nece?
 Sed mihi non deerunt qui rem uero ordine pandant,
 Et forti monstrent me meruisse manu.
 Strauit me Aeacides: ferro at ni imperuius esset,
 Hectoris is poterat fata subire manu.

Et

Et si aberit liuor, si rem perpenderis æquæ,
Sternere me is potuit, uincere non potuit.

AD IULIAM.

L Vminibus fundis tot lumina, & illice uultu,
Vt Cytherea tibi cedere iure queat.
Horrida tot rursus celas sub pectore monstra,
Vt tibi Phorcynis cedere iure queat.
Sicq; trahis miseros illis, his perdis amantes:
Cypride pulchra magis, Gorgone sæua magis.

IN TOLLAM.

N On mihi tu Gorgon, mihi non Acheloia Siren,
Quod rapias, potius tu mihi Scylla uorax.
I uincas cantu Sirenas, & ore Medusam,
Non tibi præda maris, non tibi marmor ero.

AD MARCVM, DE
eius amica.

O Re nitet tanto, tot fundit lumina Cypris
Marce tua, ut Veneri nil mage sit simile.
Niq; suæ Veneris Mauors flagraret amore,
Mars uri poterat Cypridis igne tuæ.

CVPIDO AD APOLLINEM,
qui ipsum & eius tela
spernebat.

S Perne faces Pæan: tamen ut te flamma peruret
Daphnes, hinc posces more clientis opem.

M 2 DE

DE DAEDALO, QUI IN PALUDE
morsu anguis mortuus est.

Quid iuuat, heu, leuibus uoluisse per aëra pennis?
Transisse & uasti longa pericla maris?
Minoisque iras fugisse fugacibus alis,

Quas in te cierant crimina Phasiphaës?
Dædale: si immanis te fixum dente colubri,
Submersum, exanimem, continet ima palus.

Non ne fuit satius pelago perijsse profundo,
Quam nunc tam uili procubuisse lacu?
Icarus ipse licet minor, hoc te clarior uno est,
Aequore quod medio fata suprema subit.

I nunc, & factis famam molire perennem,
Si mage præclaros tam fera fata manent.

FORTUNAE HERCVLI

Estensi alas dicat.

Quæ cuncta instabili uerso mortalia motu,
Sors præpes, cunctis & malefida uiris,
Firma futura tibi semper: tibi fida, nec unquam
Mutatura uices mobilitate mea.

Has tibi do uolucres (Dux inuictissime) pennas,
Inq: tuo implumis ludo benigna sinu.

DE ANNIBALE A RIVALI EXTINGTO.

Annibalem bello innictum dum candida Dirce
Demulcet, tacita fraude Cupido necat.
Ipsa

*Ipsa nephas deflet scissis Bellona capillis,
 Et Marti assiduus fletibus ora madent.
 Et meritò, nam quem poterat uix tristis Erro,
 Vel Mars bellipotens sternere, strauit Amor.*

LVCRETIAE ROMANÆ
 tumulus.

Candida fama mihi cum uita charior esset,
 Sanguine seruauit damna pudicitia.
 Roma tamen nostra fuerit cum libera morte,
 Sic me pro patria procubuisse iuuat.

DE SE AD MVSAS.

Diuæ, queis ducibus Permessidas hausimus undas,
 Et licuit Pindi sacra subire iuga:
 Si me non frustra est dignatus nomine Cynthi
 Cynthius, Aonij duxq; paterq; chori.
 Vos ô uos toties diuæ ad mea uota uocatæ,
 Demite supremis nomina nostra rogis.
 Ut cum sera dies longo me absumpserit æuo,
 Aeternum uolitem docta per ora uirum.
 Sic uobis semper uireat Pencia laurus,
 Vosq; inter docta cuspide Bacchus eat.

EPIGRAMMATVM LIBRI SE-
 CVNDI FINIS.

M 3 CYNTHII

CANDIDO LECTORI.

Libuit nobis, his Cynthij Gyraldi poëmatijs ipsius, etiam addere fragmenta quædam, quæ ad rem medicam attinent. Quod non alia de causa à nobis factum est, quàm ut candidus lector uideat, quantum utilitatis rei medicæ, et ornamenti poëticæ accederet, si opus tam præclarum perficeretur: secumq; cogitet auctor, quanta in perfecto opere sit laus futura, quando id sic interfectum tantum sui desiderium excitauit.

Vale, & boni consule.

CYNTHII

DE HV. CORP. PARTIB. 183
CYNTHII IOANNIS
BAPTISTAE GYRALDI PHYSI-
CIFERRARIENSIS DE VSV PARTI-
VM, SIVE DE PARTIBVS COR-
PORIS HVMANI FRAGMEN-
TA QVAEDAM.

De hepate, corde, & cerebro, & quæ
animæ uis ipsorum unicuiq; à
Galeno adscribatur.



EC minus hinc constat, tria prima ab
origine membra
Esse, quibus uiuit moles hæc corporis
huius,

(Heu grauib; morbis, mortiꝑ; obnoxia moles)
Cor, iecur, & cerebrum (neq; enim genitalia nobis
His numerare libet, licet his sine cuncta periret
Humani soboles generis) concessa facultas
Quæ diuersa fuit: nec membrum est corporis ullum,
Vnde suos ortus ducant quæcunq; creantur
Membra, nec unde etiam procedat quæq; facultas
Corporis ipsius. uenarum nam hostia surgunt
A iecore, undarum uelut alto à flumine riuu
Desiliunt: passim hinc sanguis per cuncta redundat
Membra hominis, liquidoꝑ; rigat sicca omnia fonte,

Et vires reparat fessas, nutritq; fluento
 Purpureo corpus, qua uenis cunq; feratur.
 Qualis cliuoso decurrens tramite montis
 Fons exit rapidus, rauco cum murmure secum
 Saxa trahens, qui mox placidus cum se intulit aruis,
 Vt uitam inde habeat quicquid radicitus hæret
 Telluri, hume etat sitientes undiq; campos.

Cor fons innati est, & prima caloris origo,
 Thoracis mediumq; tenet, uitamq; ministrat
 Artubus & membris. Nam uiuax inde uagatur
 Spiritus, & defert mixtus cum sanguine uitam.

Ardua sed cerebro uis iuncta est, unde mouere
 Se queat hæc moles, ut fert sua quemq; uoluptas,
 Atq; frui sensu. uisq; uni est insita tantum,
 Qua noscit rerum formas, qua cuncta tuetur
 Quæ sunt, quæ fuerunt, & quæ uoluentibus annis
 Euenient, rerumq; uices, seriemq; futuri,
 Qui motus quatiantq; solum, quos luna labores
 Nocte obeat, solis cursus, solisq; recursus,
 Et rerum euentus uarios, quò ue ordine cælo
 Sidera labantur, cuncta ut sol aureus ornet.
 Hic uires omnes monstrat, rerumq; potitur,
 Vis animæ potior. Natam hinc de uertice patris
 Tritonis fluuij ad ripas, è Metide sacra,
 Pallada, carminibus uates cecinere priores,

Consilij

Consilijs animoq; insignem, in pectore patris
 Quam Themis armavitq; armis, parmaq; nitenti,
 Imposuitq; hastam dextræ, quo laudis amore
 Succensa, audaci meditetur prælia fronte
 Armipotens uirgo, duri uelut æmula Martis,
 Viq; animoq; potens. Quod si qua in parte locanda est
 Ipsa anima, hæc tota in sublimi est sede locanda.
 Si uero est tota, in toto, nec parte reposita est
 Vlla omnis, uiresq; suæ per membra secuntur,
 Siue homini fuerint animæ tres, munere terno
 Vt uiuant homines cuncti.

Illa quidem, qua nos uexat sæuæ impetus iræ,
 Et qua mens hominis semper facta ardua poscit,
 Innata est cordi. Sed qua crescitq; uigetq;
 Corporis hæc moles, qua uitæ munere gaudet,
 Qua cupimus, qua sæpe trahit sua quemque uoluptas,
 Hepatis esse puto.

Ast illam, qua homini sors est propè proxima diuis,
 Quæ rerum simulachra capit, noscitq; uidetq;
 Cuncta animo uigili, ueræ nil lucis egenus,
 In celso sistam. Quod si tibi munera nosse
 Naturæ hinc libeat, quo uè hæc tria membra creentur
 Ordine, tunc nosces non dandam dignius ullam
 Sidereæ menti sedem, licet inclytus ille
 Hanc minimi faciat partem, cui cætera subsunt,

Mentis & imperium uiuaci in corde reponat.

Nam cum se fundit in aluum,

Cumq; uiri sese commiscet semine semen.

Fœmineum (nam animal matris sine semine nullum

Gignitur) & grauida fœtus generatur in aluo,

Tunc primum ipsius uita est contermina plantis,

Atq; alimenta sibi fœcunda sumit ab aluo,

Ceu plantæ radix succos trahit insita terræ,

Vnde ipsa & tronchus frondosaq; brachia crescant.

Gignitur inde hepar, genitum quod suggerit illi

Nutrimenta simul. namq; altrix insita uirtus

Est iecori tantum, iustos ut deinde per auctus

Paulatim crescat. Sed sensim ut reddere cœpit

Verum animal, pulsus expers ne tunc quoq; uiuat,

Continuò exoritur cor uiuax pectore in ipso,

Tuncq; statim motu gaudet, pulsūq; animali,

Exiguo quamuis, qualem conchylia seruant.

Non tamen est aliquis sensus tunc usus in illo,

Non auris uoces audit, non lumina cernunt,

Non linguæ est gustus, haurit nec naris odores,

Nec pede se desert, nec agit tunc dextera quicquam,

Nulla illi innata est ratio, non ulla uoluntas:

Non eget his etenim. Sed postquam membra per omnes

Seminis auxilio (nam tantum semen in aluo

Est quod agit, quod membra creat, diditq; regitq;

Non cor

Non cor, Nicomacho cretus quod senserat olim)
 Concreſcunt numeros, membrisq; anima inſinuatur,
 Iam capite exorto, tunc primum cernere cuiq;
 Eſt cerebrum, quod membra regat certo ordine cuncta.
 Armiger Automedon ut quondam ad frena iugales
 Collegit, docuitq; illos tolerare magiſtrum,
 Dum campo in medio curruſ agitabat Achillis
 Terribilis, præmeret uē manu, aut laxaret habenas.

Sic etiam Aemonia puppi cum fortis Iaſon,
 Aurea ut eriperet Nepheleia uellera Colchis,
 Eſt auſus primus decurrere cerula ponti,
 Velorumq; alas demittere flatibus Euri,
 Hagnia deſ magnæ ſubiit moderamina puppis,
 Cum fabricata ratiſ commiſit carbaſa uentiſ,
 Ferrato cœpitq; æquor proſcindere roſtro.
 Nec quiſquam fuerat Thyphſ priuſ uſuſ in illa.

Tunc quoq; Romani ſubiſti pondera regni
 Romule, tuncq; uiriſ leges, tunc iura dediſti,
 Auguſta grauitate ſedens, cum maxima Roma
 Te duce fundata eſt: ſæuoſ attollere faſceſ
 Non opuſ ante fuit, uel rerum fleſcere habenas,
 Imperiſ gentes uē tuiſ frenare ſuperbaſ.
 Sed tibi ſi cordi eſt rem tandem noſcere apertaſ,
 Huc oculoſ, huc fleſce animuſ, remq; ordine diſce.

Maternā eſt iuxta aliuſ hepar, dum foetuſ in illa eſt.

Longiuſ

Longius at cor abest, cerebrum quoq; longius illo est.

Quin etiam postquam dias in luminis auras

Infans exoritur, cunctis se clarius effert

Vis iecoris, cordisq; minor, minor illa cerebri.

Ergo uidere tibi est hepar, mox corda creari,

Posterius cerebrum, quo sese probat in ipso

Sponte animæ uirtus potior, ceu fulgida lampas,

Cur quædam animalia oculos in fronte
habeant, quædam in ceruicibus.

Sed si à nobis nunc forte requiras,

Cur ceruice oculos nonnulla animalia gestent,

Hosq; homines sub fronte gerant: hoc accipe paucis.

Nam tenui quæcunq; cuti mortalia membra

Tecta gerunt, septa his etiam sunt lumina læui

Pellicula, ut molli sunt corpore lumina tota:

Quo facile hæc lædi poterant. hinc sedula mater

Omniparens natura, illis loca tuta parauit,

Infixitq; cauis oculos in partibus, hosq;

Munijt, & molles multo simul obijce sepsit.

At contra quæ crusta tegit, quæ ue aspera testa,

Lumina dura cuti gestantq; simillima dense:

Hinc facile haud possunt lædi, hinc munimine tanto

Is opus haud fuerat. quanquam hæc si aduersa tuentur

Forte oculis, i los ætutum in pectore condunt,

Tuta illis & fida domus dura omnia contra.

Quod

Quòd oculi sunt uigiles totius corporis,
& ob id in summo positi.

Nec melius poterant alia sub sede reponi
Lumina, prospicerent quo cuncta aduersa tuenda,
Quàm parte in celsa. Nam si sub pectoris ima
Ipsa parens oculorum orbis posuisset, adempta
Vis prope tota illis esset discernere tela,
Ledere quæ poterant illos, & lædere membra
Cætera, quis uigiles oculos natura creauit.

Sic etiam summa custos speculatur ab arce,
Prospicitatq; uiris placidæ qui membra quieti
Dant, fracti Marte assiduo, fessiq; labore,
Ut uires somno reparent sub nocte silenti:
Ni faciat, fortuna usus meliore, paratus
Ibit in incautos hostis, somnoq; sepultos
Demittet letho uictor felicibus armis.
Ut quondam Hyrtacides, toto dum pectore somnos
Proflarent, Rutulos inopino Marte peremit.

Nec minus ipse uno tantum comitatus Vlysses,
Pergama uastaret, duro dum Græcia Marte,
Sumeret ut meritas rapta de coniuge pœnas,
Aggreditur Rhesum, uigili custode perempto,
Et somno oppressum nigro demittit Auerno,
Ardentesq; abducit equos, ne pabula Troiæ
Gustent, aut Xanthi fatalia flumina potent.

Vnde

Vnde orta est Troiæ clades, uictoria Græcis.

Quare os in capite.

FOrsan, sed si quæ siueris ultra,
Cur etiam capiti natura adiunxerit ora?
Id gemina ex causa factum est. nam iuncta palato
Aptior ad gustum lingua est, rerumq; sapores.
Nec minus ut possent homines, dum luce fruuntur,
Mortales reparare artus, sunt addita cunctis
Ora, quibus terantq; cibos.

Euagatio poëtica de Astomis.

FAmatamen, Ganges Indis qua turbidus auro
Defluit, & claro Titan se prodit Olympo,
Exortam gentem contactam corpora uillis,
Indutamq; artus tenui lanugine frondis,
Cui caput ore caret, dictu mirabile, quæq;
Vsa cibus nunquam est, latices nec pota fluentes,
Sed uario tantum semper quæ uiuit odore
Aut florum, aut mali, aut radice simplicis herbæ
Naribus attracto, atq; ima ad uiscera misso.
O nimium felix, & cælo digna propago:
(Si modo digna fide de uobis fama loquuta est)
Improba uos rabies nunquam compellat edendi,
Dulcia sollicitant, nec mollis Massica Bacchi,
Diræ animis pestes, Venerisq; alimenta nefandæ.
Non uobis toruus duro sub uomere taurus

Ingemit

Ingemit, aut uitis frondenti iungitur ulmo.
 Non terram assiduis rastris pulsare iacentem
 Est opus, aut ualidos duris subsistere marris,
 Vlla'ue fallaci committere semina sulco:
 Omnia nam uobis ultro fert dædala tellus.
 Felices iterum, uobis per prata Napææ,
 Chlorisq; & gratis perfusa liquoribus Anthi,
 Aeternos florum nimbos spirantibus auris
 Effundant, semperq; recentibus halet
 Omnis ager, tetro nunquam uos lædat odore
 Putre aliquod, nunquam galcies uos horrida lædat,
 Mitia sed uobis poma omnis proferat arbor,
 Et uer purpureum genitabilis aura Fauoni
 Aduelat, ut uobis non desit copia uictus,
 Quò uos cunq; pedes tulerint per amœna locorum,
 Et tepidi semper foueat clementia cœli.

De corde & pulmone nonnulla.

COr medio in thorace sedet, ceu magnus in amplo
 Rex regno, qui cuncta regat, uitamq; ministrat
 Artibus & membris: nec erat locus aptior illi.
 Nam fons innati est, & prima caloris origo.
 Inde etenim uarij uelut alto à flumine riu
 Proueniunt, cuncta unde leuis per membra uagatur
 Spiritus, & defert mixtus cum sanguine uitam.
 At globus hic cordis, uillorum qui ordine terno
 Constat,

Constat, quæis cæsit diuersa potentia, molle
 Os habet innatum, neruumq; & se sustinet illo.
 Hoc autem natura olli dat sedula sensum.
 Huic gemini motus. tenues nam suscipit auras,
 Dum se aperit: sumptas, dum se premit, inde repellit,
 Concepta expurgans sese fuligine nigra
 Ignipotens uigor, ille uigor, quem gignit in ipso.
 Pyramidis formamq; tenet: nam parte suprema,
 Quæ molli & lenta est pariter pinguedine tecta,
 Est latum: ast alia coni sub imagine desit.
 Hæc latus attingit læuum: hinc consistere læua,
 Nonnullis uisum est, quos ueri lusit imago.
 Vilior illa quidem pars est, hæc dignior: ambas
 Circuit inuolucrum, soli domus addita cordi.
 Suntq; aures binæ, & uenarum quatuor ora,
 Atq; sinus gemini feruenti sanguine pleni.
 Nec plures binis uentres in corde repostos
 Inuenies, quamuis ingenti animalia mole
 Emineant, quamuis illis sint maxima corda.
 Nonnullis tamen est unus: nam dexter in illis,
 Qui pulmone carent, desit, uocisq; potestas.
 Non uero idem usus geminis, nec munera: namq;
 Spiritus it passim uluax per membra sinistro,
 Nutritur dextro pulmo, mirabile dictu.
 Quod cum nulla sibi cordis ualidissima uirtus

Nutrimenta

Nutrimenta paret, pulmoni suggerat illa:
 Illius hæc quippe est merces concessa labori,
 Quo gaudet, dulci fruitur quo lumine uitæ,
 Cor cunâtis illam præstans quæ in corpore uiuunt.
 Namq; capax auræ pulmo, uitæq; minister,
 Qui bifidus medium cor ambit.
 Per scabram uocis uenam, quæ arteria Graio
 Nomine dicta fuit, flatus ultroq; citroq;
 Vitales ducitq; auras, ductasq; repellit,
 In follis morem, ut paulo deferueat ignis
 Innatus cordi, hunc ductisq; resarciat auris.
 Ni faciat, calor ille ingens, quo cunâta fruuntur
 Membra hominis uita, paruo post tempore prorsus
 Desinet, inq; leues se soluet spiritus auras,
 Spiritus ignipotens cum nullus pabula præstet.
 Non aliter, quam cum ualidis se uiribus infert
 Ignis edax syluis, superatq; cacumina flammis,
 Et furit, insanas uires dum sylua ministrat.
 Datq; alimenta illi. sed ubi flamma omnia carpsit,
 Desinit in tepidos cineres, nigrasq; faxillas.
 Vel cum fulgenti illustrat cæca omnia circum
 Ignis flamma micans, qui fatus flatibus auræ
 Fulget luce noua. sed si compresserit illum
 Vas uacuum, desitq; leuis tum spiritus auræ,
 Actutum extinctus flammæ lucemq; relinquit:

N Et

Et modò tam uiuax, tunc demum frigidus alget.

Esse nulli animalium duo cor-
da, sed unum tantum.

Nec dignum est credi, quenquam sub pecto-
re bina

Corda habuisse unquam. quamuis longæuus aruspex
Hæc uidisse ferat, dum forte trementia magnis
Vreret exta deis.

Forte fuit falsa deceptus imagine ueri,
Dum notat exta pater, dum dis pia sacra ministrat.

Namq; duo cum sint uentres in corde reposti,
Inq; specus morem læuus petat ardua cordis,
Infima dexter habet. qua re sæpiissime turget
Proxima pars cono, cono redditq; figuram.

Hinc illis geminas acies, cum pronus aruspex
Vidisset, portenta deum non æqua putauit,
Ignarus rerum & naturæ noscere causas,
Et bina in solo distinxit corpore corda.

Forte etiam mentita pium mala numina numen,
Illis sacra facit dum pura in ueste sacerdos,
Lumina perstringunt misero, quo ficta tuendo
(Heu cæcas hominum mentes, heu pectora ueri
Inscia, quid uos uana iuuent simulachra deorum
Discite, & insanis adolere altaria domis)
Vera putet, fallatq; alios, quos improba fallit

Relligio,

Religio, mentesq; premat caligine cæca.
 Ceu persæpe solent celeri nos fallere dextra,
 Qui manibus ludunt, falsa & miracula monstrant,
 Dum ludunt, ficta incautos & imagine ducunt.

Cor quibusdam magnum, quibus-
 dam paruum, & quid ho-
 rum cuiq; proprium.

Nonnulis autem cor magnum in pectore fixū est,
 Paruum alijs. Ingens illis timor occupat artus
 Degener, atq; tenet timidos ignavia deses.
 Namq; ollis resides animi, & desueta triumphis,
 Pectora, inepta armis, necnon ueræ indiga laudis,
 Luxuriæ Veneriq; uacant, similesq; puellis
 Intextas auro uestesq; sinusq; crepantes
 Gestant, electroq; obducunt molle capillos,
 Et picturatis incingunt tempora fertis
 Mollia. sed sonitum si qua procul arma dedere,
 Horrescunt, gelidaq; coit formidine sanguis.
 Vsq; adeò gaudent uitam traducere inertem.
 Talis forte fuit, modò uir, modò fœmina Ceneus.
 At contrà, hos, quæis cor paruum sub pectore uiuax
 Exilit, impauidos belli generosa cupido
 Excitat, his feruet circum præcordia sanguis
 Innatus, gliscitq; uigor, uigor igneus, ipsis,
 Excavitq; mares animos, uirosq; ministrat.

Hinc magis atq; magis pulchram per uulnera mortem
 Magnanimi quærent, stricto & concurrere ferro,
 Palantes agere & populos, & sternere gaudent.
 Dum iuduant multis hostiles ciuibus urbes,
 Impauidi, & uicto palmas ex hoste reportant.
 Tantus amor laudis, tanta est in pectore uirtus.
 Talis Alexander, tales duo fulmina belli
 Scipiadae, geminiq; Atridae, & fortis Achilles,
 Et (mihi si liceat priscis componere nostros)
 Talis eras nobis quondam inuictissime regum
 Alfonse armipotens, dum fata deusq; sinebant,
 Te Romæ tremuere arces, te Thybris in undis
 Horruit, Adriaciq; sinus, te miles Hiberus,
 Hispanus belloq; potens, te Gallia diues,
 Te duce uictrici letata est sæpe triumpho.
 Inclita Arestinae gentis te gloria tantum
 Floruit, ut felix caput inter nubila condant,
 Auspicijs beata tuis. hinc fleuit in amne
 Te pater Eridanus, tua te Ferraria fleuit,
 Extinctum patriæ dominum, patriæq; parentem,
 Omnis & amissum luxit decus Itala pubes.
 Morte tua Marti riguerunt corda dolore,
 Defleuitq; (nefas) scissis Bellona capillis.
 Hinc uates, cui sacra dedit sua nomina Phoebus,
 Exiguus quamuis uates, tibi iusta ministrat


*Illachrymans, totamq; implet clamoribus urbem,
Et tumulo dat dona gemens, & lilia fundit,
Lilia, purpureasq; rosas, fuluosq; hyacinthos,
Et sacros manes pingui ueneratur acerra.*

CYNTHII IOANNIS BAPTISTAE

Gyraldi fragmentorum de Humani
corporis partibus

FINIS.

N 3 CYNTHIVS



CYNTHIVS IOANN.

BAP. GYRALDVS COELIO

CALCAGNINO SVO

S. P. D.



AR SI penè semper, Vir clariss. incredibili quodam desiderio cognoscendi, in quo uis imitationis, sine qua neminè ulla in arte proficere posse, mihi persuadeo, locata foret. Non enim, mi Cæli, ex illorū sum numero, qui tantum mihi tribuam, & ingenio meo, perexili quidam, faueam, quòd imitationem, quam Tullius ipse Romanæ eloquentiæ parens plurimi fecit, ut nūc Erasmus, & ante ipsum Politianus, impudenter despiciam. Quis enim nescit, quòd etiam M. Tullius Cicero in Oratore testatus est, omnem dicendi rationem, imitatione sumnota, non modò sterile scere, sed prorsus eua nescere? Et licet hac in re à doctissimis plerisq; multa acceperim, tamen mihi hætenus (tanta est doctorum uirorum hac in re dissensio) minime innotuit ipsius uis imitationis. Sunt enim, qui inanè tantūmodo uerborum sonū imitatori obseruandum proponant: nonnulli uero lepōrem inspiciendū, quidam facultatem, cōplures ductū, pleriq; figuras, et aculeos. Nec desunt hī qui sententias integras, nulla uerborū facta mutatione, imitatorē citra uitium excerpere posse contendant. Quæ etsi ad

imitationem non parum conferunt, tamen uix mihi apta uidentur ad eū exactè exprimendum, quem imitari uelim: & eo minus, quo uix unum aut alterum inueni, qui sic aliquem imitandum mihi proposuerit, ut omnia ab eodem accipiam. Nam quoniam uix fieri posse opinantur, ut unius industria omnia perficere potuerit, hæc quæ ad orationis candorem et stili grauitatem attinent, more apum hinc inde perquirenda arbitrantur. Nam ueluti apes, in melle condendo non ex uno tantum, sed ex omnibus floribus id sibi colligunt, ex quo mel ipsum condiāt: ita à Cicerone schemata, epichemata, parabolas, sales: à Quintiliano lepōrem, gratiam, energiam: à Salustio sanguinem, cutem, carnem: à Cæsare neruos, cartilagineſ, ossa: à Plinio acumen, uim, spiritum: & breui, quæcunq; orationem illustrem reddunt, à diuersis exquirenda præcipiunt. Ego uero in hanc sententiam eo minus descendo, quo ad Oratorem instituendum hæc mihi non secus attinere uidentur, quàm si ad unius hominis generationem, quædam humani seminis colluies expeteretur. Vix enim fieri potest, quin illius oratio, q sic omnia à plurib. mendicat, exilis, arida, eneruata, mutila, inculta, molesta, ab omni decoro, ab omni deniq; energia sit prorsus aliena, illisq; ipsis obstrepens, qui eam cōposuerunt. Quæ cūq; enim lumen orationi addere deberēt, si ad unius si militudi-

militudinem inuicem cōnecterentur, ea à diuersis exce-
pta, & in unā ueluti congeriem coacta, illi obscuritatē
ac tenebras afferunt. Nam quis omnes hosce poterit
imitari, et in unā orationis faciem redigere, cū sint ipsi
dissimillimi inter se! nec omniū unū sit dicendi genus?
Quapropter licet Erasmus nostra tempestate de his o-
ptimè meritis, in Ciceroniano suo ab unius Ciceronis
imitatione plurimum deterreat, in superioremq; senten-
tiam descendat (quod etiam Ioan. Franciscus Picus Mi-
randula, illustris, acriq; uir ingenio, duabus in epistolis
ad Petrū Bembum uirum clarissimum, & in utraq; lin-
gua eruditissimū egit) tamen cum existimem in omnib.
rebus esse aliquod summum & optimum, ita etiam ali-
quem in eloquentia esse crediderim, qui in dicendo o-
mnia munia obierit: ad huncq; ueluti ad perfectā quan-
dam orationis imaginem, quam fortè cogitatione asse-
qui possumus, uiribus autem non possumus, omnes co-
natus esse referendos. Quod si is qui imitari uoluerit,
eò prorsus non peruenierit, quo & desiderium, et men-
tis aciem intenderat, tamen ipsi non inhonestum erit,
in secundis & tertijs consistere. Cum igitur M. Ci-
cero omnium calculis eò eloquentiæ peruenierit, ut i-
pso omnis eloquentia nihil maius fingere possit, in e-
ius lectione mihi semper insistendum, quod Cortesio
etiam, Bemboq; sanioris (ut credo) iudicij quàm prio-

res, uidetur, ab incunabilis usq; cōstitui: licet uel ob aetate iuniorem (ualentiorū enim laterū hęc sunt) uel quia neminem ducem hoc in stadij curriculo habuerim, parum me adhuc profecisse cognoscam. Idem enim in literis, quod in castris & praelijs, euenire arbitror. Nam ut quicunq; strenuum sectantur imperatorem, et in bel-
lorum discriminibus uersatum, ab eoq; rei militaris peritiam addiscunt, et ad tuendas ciuitates & ad hostium acies oppugnandas longe peritiores atq; acriores sunt ijs, qui se & minus illustribus, & non satis expertis addixerunt: Sic ij ueram dicendi peritiam mihi callere posse uidentur, qui ipsum eloquentiae parentem sectandum sibi proponunt, et ipsum ad amussim effingere conantur. Vix enim fieri potest, quod qui Ciceroni addi-
ctus fuerit, exactam eloquentiam, maximam rerum copiam, & integram artis oratoriae peritiam abunde non calleat. Nam ut omittam illam immortalis ingenij beatissimam ubertatem, perpetuamq; illam orationis ac felicissimam facilitatem, quis est ipso Cicerone uel ad docendum, uel ad delectandum, uel ad cōmouendum acutior? quis ad necēdōs argumentorū nexus promptior? quis ad propositum firmandum acrior? quis in astutijs parandis uersutior? quis ad dolos euitandos callidior? quis ad inimicorū impetū sustinendum promptior? quis in re augenda, uel minuenda uehemētior? q̄s ad animos
uel

uel ad iram, uel ad odium, uel dolorem incitandos uegetior? quis ab ijsdem permotionib. ad amorem, ad lenitatem, ad misericordiam reuocandos aptior? quis uerborum copia locupletior? quis sententiarum pondere grauior? quis figuris iucundior? quis trallationibus magnificentior? quis totius orationis serie magis elaboratus? quis in dicendo candidior? O unicam, atq; felicem M. Tullij eloquentiam. Grandiloquus Cicero, salibus & lepore concinnus, acer, elaboratus, uariis, acutus, grauis, accuratus, subtilis, lenis, in quamlibet dicendi formā paratus, nec minus in ocio quā in negotio gratus. Insunt Tullio arma, tela, faces, quib. et manū cominus conferre possis, et eminus iaculari, fulgereq; quandoq; & tonare, & fulmina uibrare, si libeat. Sunt item in ipso excessus amoeni, in quibus lassus desideas, & expatieris, & tibi indulgeas, & ingenio lasciuias, si libeat. Quid multa? Nihil uel egregij, uel rari, summi ue in oratione esse potest, quod in Cicerone ueluti in speculo non luceat. Quem si è medio tollas, non lucem modò aut candorem, sed spiritum, animam, uitam ipsam à dicendi facultate prorsus auferas necesse est. Non erit ille igitur prorsus insanus, qui inuētis ac paratis frugibus glandibus uesti uelit: quiq; riuos insectetur, & fontem cum limpidissimum, tum uberem relinquat: aliundeq; potius, quā ab ipso sole lumē haurire desideret?

Non tamen

Non tamen ego imitatore[m] à cæteror[um] aucto[rum] lectio-
 ne ita deterrebo, ut cæteros omnes despiciendos, so-
 lum Ciceronem legendum censeam: (quis enim me te-
 meritatis non prorsus damnet, si hoc ausim affirmare?)
 uelimq[ue] unius auctoris angustijs omnia ingenia meti-
 ri, quasi in alijs nihil sit aut egregium, aut admirabile,
 quod obseruari possit. absit à me temeritas hæc. Sunt e-
 nim & alijs suæ uirtutes. Quare ego illud uel ultro uni
 cuiq[ue] concesserim, quod cū firmati erit iudicij, et extra
 periculi aleam positus (quod tum potissimū erit, cum
 Ciceronis dictionem ac stilum usq[ue] adeo imbibarit, ut
 quoscunque & mentis conceptus, & ingenij conatus,
 Ciceronis more possit uel eloqui, uel literarum monu-
 mentis complecti) tum demū et antiquos omnes, & re-
 centiores etiam (non enim seculis nostris usq[ue] adeo
 fata inuida fuerūt, ut inter nostræ ætatis homines qui-
 dam etiam non sint, qui orationis grauitatem ac dicen-
 di candorem ita inuicem coniunxerunt, ut cum Cy-
 gno Arpinate quodammodo contendere posse uidean-
 tur, & iam iacentem prostratamq[ue] Romanæ eloquen-
 tiæ dignitatem subleuare) & legat, & obseruet, excer-
 patq[ue] ex his quicquid ad orationis ornatū attinere ui-
 deatur, siue sententiæ fuerint, siue uerba, ex his enim
 duobus omnis oratio constat. Quæcunque uero excer-
 pta fuerint, ad unius Ciceronis imitationem conuer-
 tenda

tenda censeo. Neq; enim in Catonis duricie consensendum est: neq; rursus lasciuientium flosculi adeò legendi sunt, ut uoluptati tantum & luxuriæ indulgere uelle uideatur. Quod profectò non eueniet, si & mollium lasciuiam, & antiquorum duritiam, ad unius Ciceronis splendorē, ueluti ad examen & regulam quandam deduxerint. Hoc enim duce, quæ duriora fuerint, mitescent: & rursus languidiora, neruos ac maturitatem quandam accipient orationis. Quod si mollia neruos, ac dura gratiam non admiserint, ab integro iudicio prorsus abijcientur. Vt enim inter homines, quidam sunt naturæ adeò hebetis, ut nulla cura uel bonis moribus imbui, uel optimis artib. illustrari possint: ita etiam quædam sunt adeò per se rudia, ut nullū prorsus admittant orationis ornatum. Quamquam hæc à Ciceronis assecla felicius tractabuntur, quàm ab aliorū nemine. Nam si ea quæ Musices sunt, & aliarum etiam artium, quantumlibet rudium, uerborū ac orationis concinnitatem quandā accipiunt, si de his eloquens aliquis egerit, & felicius ab eo tractabuntur, quàm ab inuentoribus artificibusq; ipsis: cur idem non eueniet in dicendi facultate? illi præsertim, qui in Ciceronis lectiōe diutius uersatus fuerit. Quamobrem, Cœli optime, cum ea me semper tenuerit cupido, ut quantum humana opera fieri potest, Tullio quandoq; simillimus efficiar (sa-

tis enim mihi lucrificasse arbitror, si huius uestigijs alē
quando inhærere mihi fas fuerit, quem nunquam mi-
rari desino) cumq; ex tuis lectionibus mihi satis perspe-
ctum sit, quantum Ciceronem ipsum admireris, &
quā libenter bonarū literarum sectatoribus operam
tuam impartiaris, ad te ueluti ad totius eloquentiæ lu-
men, pro tenebris meis fugandis, summa cum fiducia
me contuli: ut quid in Cicerone, ad ipsum, quantum in
me erit, effingendum, animaduertendū sit, ex te per-
spiciā. Nec rem hāc mihi infeliciter cessurā arbitror,
si tu, in quo tot ac tanta sunt ornāmēta dicendi, penu
hanc mihi patefeceris, et thesauros hosce reseraueris.
Nam cur non bene sperē, te mihi duce? quem alterū no-
stræ ætatis Ciceronē nō immerito appellauerim? Nam
cū nihil in te sit non admirabile, tū illud præcipue et e-
go et uniuersus doctorū cœtus admirari solemus, quod
in ipso quotidiano sermone tanta affluas ubertate et fa-
cundia, tāta rerū copia, ut non modò ex ore tuo uerba
uel ipso melle dulciora manēt, sed nihil tibi aut à natura
denegatū, aut à doctrina nō delatū esse uideatur. Qua-
re, Cœli optime, cum me in hoc iuuenilis ætatis tyroci-
nio tibi instituendum tradiderim, per meam in te fidem,
per tuam innatam erga literatos omnes humanitatē, per
spes tuas, perq; tua uota rogo, ac obsecro, ut deside-
rio meo facias satis, Nam si eloquentiæ fores adeò mi-
hi (ut

hi (ut spero) patefeceris, quod in illius penetralia mihi ingredi liceat, dabo operam, ut te profectus mei nunquā pœniteat: et quicquid unquam dicendo proficiam, (si modò aliquid unquam profecero) id omne Cœlio Calcagnino acceptū ferri oportere, non dissimulabo. Vale. Cal. Quintil. M. D. XXXII.

COELIVS CALCAGNINVS
CYNTHIO IOANNI BAP.

Gyraldo Salutem D.



QVOD ego nihil hæcenus tuis literis responderim, Vir clarissime, non est quod arbitrere, uel tua apud me studia parum habere ponderis, uel tuam excellentem literaturam non tanti à me æstimari, quanti meritò ab æquo iudice æstimari debet. Sed ita, nescio quo fato accidit, ut cum tuæ ad me literæ perlatae sunt, essem tum occupationum mole propè obrutus, tum ita uiribus corporis destitutus (nā me insolita quædam stomachi intemperies dies aliquot malè uexauerat) ut ego ipe mei compos non essem. Quare amabo te per communia Musarum commercia, facessat omnis de me sinistra cogitatio, persuasumq; habeas, me in studiosos omnes albam esse lineam, in alt'o lapide: doctos uero homines, in quorum locum tu honorificum tibi tua uirtute

tute locum uendicasti, nō solum amare, sed etiam admirari. An non ego sim mortuum omnium ingratiſſimus, si pulcherrimis tuis literis non faueam? quib. tantum mihi tribuis, quantum neque uel si immodice sim ambitiosus agnoscam. Quā in re & si animaduerto te plus amorī & bonitati tuæ dare quā iudicio, tamen non potest tua ista præclara in me uoluntas, nō mihi esse gratissima. Cæterū illud non dissimulabo, me quāprimū literas tuas accepiſſem, constituiſſe ad propositam de Imitatione disquisitionē non prius respondere, quā auocationes expunxiſſem omnes, & essem mihi ipsi per ualeitudinem reſtitutus. Sed quoniam tu tuis his urges, ac propemodum cessanti mihi faces subdis, non committam ut diutius officium meum desideres. Abijciā itaq. omnem conctationem, & quæ mature digere cogitauerā, tumultuario opere in compendium redigam, ut intelligas me tuæ uoluntatis quā meæ æſtimationis rarationem habere maluiſſe. Vale, et me ama, tui amantiſſimum. Idib. Quintilibus.

M. D. XXXII.

AD

AD CYNTHIVM IOANNEM
BAP. GYRALDVM PHYSI-
CVM COELII CALCAGNINI
SVPER IMITATIONE
Commentatio.



IVAE literæ, Vir clarissime, magnam mihi profectò spem attulerunt, rem latinam, & egregia studia, facile posse aliquando reparari, postquam & vos naturæ interpretes, & abditarum artium professores, studetis pulcherrimas disciplinas cum eloquentia coniungere. Quas proximo seculo patres ac præceptores nostri, ita pugnare inter se existimabant, ut nulla conditione in fœdus coire posse iudicarent. Eratq; illa sententia iam recepta, atq; approbata, Philosophiam et Oratoriã aduersis frontibus pugnare: eosdemq; philosophos & oratores nullo pacto posse reperiri. Sed eam sententiã perfacile ridebunt, qui tuas literas legerint, utputà à summo philosopho profectas: in quibus tamen omnes dicendi ueneres, omnes eloquentiæ suauitates admiremur. Bene itaq; ac feliciter res habet: & rectè sapere, et commodè dicere cõciliauimus: & iam linguæ pectus, lingua pectori succinit. Illud ue
O rò mihi

rò mihi iure admirari subit, unde tibi in mentem uenerit, requirere à me imitationis rationem, & quid illud sit quod nos potissimum imitari oporteat, quom tu ipse iam tantum dicendo profeceris, ut non modò tu te ipsum imitari possis, sed alijs quoq; exemplum præscribere. Sanè si ego ad te, hominem tantæ eruditionis, tantiq; profectus, de imitatione scribere quicquam ausim, periculum est ne quis me improbe facere clamitet, qui Mineruam doceam, in syluas qui ligna feram: præsertim cum ex tuarum literarum testimonio intelligam, te clarissimi cuiusque conditoris super imitatione sententiã explorasse, ac propè nihil inexcussum reliquisse. ut iam mihi, uel si ingenio maxime polleam, nihil fiat reliquum, quod in medium afferre possim. Proinde si à cæteris ad satietatem inculcata, ad aures reuocem, ætæ agam: sin abeuntes in diuersum sententias, quasi disceptator, in trutina expendam, neq; rem facilem aggrediar, in tanta opinionum uarietate: neq; id sine multorum offensa efficere possim. Ne igitur ad alterũ aut alterum scopulum offendam, hæc inita est à me ratio, atq; hoc propositum est temperamentũ, ut prætermis-
 sis aliorum sententijs, quid ipse sentiã, breuissimè perstringam. In confesso est, imitationẽ omni ætate fuisse pernecessariã. quom enim ars nulla, nullaq; eruditio
 in suis

in suis initijs absoluta inueniatur, sed omnis per suos gradus producat, sanè eum qui cupit celeres progressus facere, oportet quæ ab alijs inuenta atq; obseruata sunt, ea sibi in exemplum proponere. Quod ni fiat, artes omnes semper ad limen subsistant, neq; ultra progrediantur necesse est. Tantum enim semper promouebunt, quantum unius hominis diligentia & cura adsequetur. Quæ uero ab alijs præmeditata fuerint, et præmunita, ea in obliuionem abire oportebit. Hac igitur ratione ars dicendi suis in rudimētis semper manebit: et qui animum ad scribendum appulerit, satis existimabit, si ex trib. muneribus, quibus fungi debet orator, unum modo assequatur: & quantum dicentis audientisq; intersit, tantum possit dicendo proferre. Nam delectare, & permouere, aut parum, aut certe nihil apud se putabit attinere. Admirabiles ergo illas opes Demosthenis, uberrimos illos flores Isocratis, tumulatissimos illos Ciceronis thesauros, nullus agnoscet: sed quasi tum primū oratoria in lucem prodeat, nunquā ultra infantiam promouebit. Hoc enim accidat necesse est, si ex reb. humanis imitationem ablegaueris. Quam quom omnium, qui recte iudicarunt, cōsensus approba uerit, tum maxime in dicendo hoc nostro seculo necessariam opinamur: quo non solum eloquentia defijt, sed uernaculus etiam ille maiorum nostrorum sermo in de-

suetudinem abiit. Cuius locum fœdissima barbaries, ex
 uariarum gentium colluione, quæ superioribus seculis
 Italiam inuaserunt, coalita occupauit, ut iam proprias
 & consuetas patrum & auorum uoces requiramus.
 Quid dicam, quod huic uitio, quod par fuit omnibus
 machinis à nobis deturbari, ita patrocinemur, ut iam
 inuenti sint, qui illud rationibus foueant, & certis re-
 gulis adiuuent, & si dis placet ueræ ac germanæ latini
 tati præferat? Quæ res multa præclare nata ingenia in
 transuersum abiicit: quippe quæ inuentis, paratisq; fru-
 gibus, glandibus tamen uestimalint. Hoc est, hoc scili-
 cet quod efficit, ut imitationis præsidio magis egeamus.
 Nā antequā maiestas imperij Ro. pessum iret, & splen-
 dor Latini nominis obsolesceret, quom cætera ad imi-
 tationem uocarentur, uerba certe cum lacte nutricis
 hauriebamus. neq; in ijs quærendis multus labor relin-
 quebatur: sponte siquidem intra priuatos penates oc-
 currebant. Nunc autem in tam perditâ tempora incidi-
 mus, ut in uerbis perquirendis etiā frustra laboremus.
 Nisi ad ueteres, & receptos conditores perfugiamus,
 quorū authoritate innitamur, quos imitemur, quorum
 exempla mutuemur. Nam protritæ uoces illæ, quibus
 non dico uulgus, et tabernarū mancipes utuntur, sed ip-
 si proceres qui rerū in Italia potiuntur, tantū abest ut
 præsidij aut commodi quicquam nobis ad eam rem af-
 ferre

ferre possent, ut multo maxime à uia nos deducant, & transuersos agant. Decepti enim uicinitate, & quasi uocum imagine, manifestos etiā solæcismos barbarismosq; incurrimus, adlecti præferim tabellionū & exceptorum frequentia: qui omnes has sordes in tabulas formulasq; suas non dicam promiscue, sed ambitiose, & cum plausu congerunt. resq; mira dictu euenit, at quanto quisq; corruptius dixerit, eo inter suos populares maiore laude prouehatur, idemq; ampliore quæstu dignus existimetur. Quid uero ego in hoc censu tantum tabelliones, & exceptores appello? quom iuris Romani, & sanctissimæ philosophiæ, aliarumq; pulcherrimarū disciplinarū professores in hoc maxime errore uersentur? Nam postquā artem dicendi à rerum cognitione excluserunt: id est (ut clarius dicam quod sentio) postquā antiquos scriptores imitari desierunt, accidit illud, quod fuit necesse, ut optimas & splendidissimas cōmentationes fœdissime inquinauerint. Nō enim iam ex fontib. & cōceptaculis, sed ex impurissimis lacunis uerba, et totam dicendi rationem corriuant. Hi sunt, apud quos sol & homo hominem causantur. et qui arcanos naturæ effectus contemplantes, admiratione afficiuntur: quiq; quod in obligationibus præstare debent, illud se manu tenturos pollicentur, tametsi suam causam tueri soleant ea ratione, quod plus pectori quàm

lingua tribuant: quodq; egregie sentire quàm perpolite loqui, longe præstet. Nunquam tamen illud effugient, quin iure vitio detur, eos res præstantissimas, ac præcipuæ æstimationis, in ordinẽ redigere, ac neglectui habere. Quod si, qui per desidiam feracem agrũ sinebant sterilesce, uel equum ex publico acceptum incuriose habebant, & strigosum esse patiebantur, ijs censoria nota inurebatur: quãto iustius eos damnaueris, qui admirabiles opes ingenij, qui philosophiam, tam quæ ad mores et ad naturam, quàm quæ ad inquirendam ueritatem spectat, rem inter omnes sanctissimam, qua nihil maius aut melius à dijs immortalibus hominum generi datum fatemur, despiciatissimo orationis genere deformant atq; conspurcant? Non secus ac perditissimi illi ganeones, qui in Dionysij Syracusani conuiuio exquisitissimas epulas inspuebant, ut soli ipsi sine æmulo eluerentur, ac cæteros conuiuas rei fœditate ab iisdem absterrent. Et sanè proximæ ætatis philosophis res magna parte ex uoto processit. nam pleriq; auspicato literis initia: i, perterriti portentoso orationis genere, cognitionem maximarum atq; optimarum rerum auersati sunt. Sed ego parcius hanc partem attingam: quod illud genus hominum pridem multorum & clarissimorum stylo explosum atque procissum est. Ego certe de ijs nulla alia causa mentionem feci, nisi ut omnes intel-

ligant,

gant, ob id eos in hanc tam iustam accusationem incidisse, uel quod nescierint, uel quod graue duxerint ueteres imitari: suoq; ingenio freti, quod in ipsis fuit, circa abstrusas ac profundas cogitationes se exercuerint: quod uero aliunde seligendum fuit, dicendi scilicet facultatem prorsus abiecerint. Ex quo factum est, ut quæ natura seiungi non poterant, orationis & rationis consortia (quæ ideo nobis data sunt, ut non modò nobis sapere, sed recte etiã alios possemus admonere) dissilire ac dissidere cœperint. Sed hæc uetus expostulatio: cui facilius obrectare possumus, quàm mederi. Ex hac tamen non difficulter fortasse elici potest id, quod tu Cynthi à me per literas efflagitabas: Quid sit illud scilicet potissimum, quod in imitationem ueniat. Recte enim mihi uideor posse respondere, in eo plurimum esse imitationi locum, in quo minimum est ingenio. Dicã hoc apertius, si poterò: ut intelligas, me desiderio tuo, si modò facultas affuisset, non defuturum fuisse. Ex ijs quæ in ratione dicendi ueniunt, quædã insita sunt in re nobis proposita, quædam in nobis: quædã neq; in re, neq; in nobis, sed peregrinè accersuntur. Quod si exemplo uti lubet, quo res fit at illustrior, dicamus inuentionem in re esse. Nam dicturus de cæde Clodij, statim tibi proponis seriem ac rei ductum ad ueritatem maxime accommodatum. Et quid prius, quid posterius factum sit, quid postquam ad manus uen-

tum est, quàm potes perspicue, conaris enarrare. Non quod non possis ingenio quædam præmollire, aut exasperare, ut Cicero fecit, Clodium insidiatorem ostendens, eumq; quantum potuit in inuidiam uocans, contra Milonem ab omni eximens suspicione: impudens tamen sit, qui tam longe ab historia et à re ipsa gesta euariet, ut nota inficietur, & causam prodidisse suã in ipsis statim initijs coargui possit. In nobis erit exordij apparatus, ut attentum, docilem, beneuolum auditorem protinus reddamus. Id facile fieri poterit, si naturã atq; ingenium hominũ, apud quos dicimus, perspexerimus. aliam enim præfationem Cato, aliã Cæsar approbaue-
rit. Tum quomodo quis attentus, docilis, ac beneuolus effici possit, à nobis petimus. Eadem ratione natura nobis suppeditabit, quid prius, quid posterius, quid in medio orationis statuamus: unde elucet admirabilis illa dispositionis coordinatio. Qua qui cõmode uti nouerit, hunc Plato dijs cœlestibus parem existimat. Ad eundem calculũ uenit ea pars, quæ argumentis colligit & probat, aut diluit ac refellit alienas argumentationes: In qua si quando cõminus conferamus pedem, altercatio appellatur: quæ una pars omnium maxime paratum atque procinctum ingenium postulat. Peroratio autem & amplificatio, nouissimæ quidem illæ, sed omnium potentissimæ orationis partes, & si à re ipsa
multum

multum trahant, ab oratoris tamen industria ac uehementia imprimis pendent, animorū motus comitantur. Et hæc quidem omnes licet in nobis sitæ sint, suæq; in nobis habeant seminaria, à re tamen, & à subiecta materia opes & temperamentum quoddam acquirunt: & ut ita dicam, se ad argumenti propositi imaginem propemodum effingunt. Sola est memoria, quæ ita in nobis tota delitescit, ut à naturæ beneficio magis quàm ab ingenij facultate pendeat. Ex ijs quæ neque in re, neq; in nobis posita sunt, sed tota peregrè adueniunt, ea pars est, quæ ad dictionem spectat, quæ orationi suppellectilem & domesticum instrumentū subministrat: & ut ita dicam, tectorium superinducit. quam unam propriam oratori existimauit Cicero: eamq; ita admiratus est, ut eius explicandæ gratia nobilem illum ad Brutum librum scripserit, cui titulum Oratoris fecit. Certe apud Græcos rhetorice non aliunde nomen accepit. Facit enim phrasim: id est, eloquentiæ corpus absoluit. Et quom cæteræ partes reliquis artificibus communes cum oratore sint: nam & præfari, & iuuenire, & in membra digerere, tum refellere & asseuerare, & certo fine concludere quæ scripta sunt, solent omnes, qui nomen literis dederunt: sed dicere pro dignitate, & uerba inuenire rei propositæ accommodata, hoc uero proprium est & præstan-

tissimū magni illius eloquentiæ institutoris munus: hoc
 illud est, quod nemo per se suisq; uiribus confisus, uel
 diuturnitate tēporis, uel assiduitate studij, uel ingenij se
 licitate unquam adsequetur. hic regnat, hic rerum poti
 tur imitatio. Quisquis uero hac parte imitari fastidit,
 potest ipse sibi placere fortasse, mihi uero planè ope
 ram frustratur: eiusq; profectus conclamatos, ac pror
 sus defletos puto. Nam quom in oratione præcipua uir
 tus sit perspicuitas, qui potest ille planè ac latine loqui, q
 nescierit se proprijs uerbis id posse adsequi? Propria au
 tem uerba appellarim, quæ in loco nata sunt ad rem ip
 sam significandam: qualia sunt, quæ à Varrone primige
 nia nuncupantur. Eius generis sunt, quæ magnus ille
 dialecticus in Cratylo apud Platonem inuenit: quæ
 summus philosophus, nō ille quidem naturaliter facta,
 (sic enim eadem essent apud omnes gentes) sed hausta
 ex proprietate naturæ existimauit. Quod si exornan
 dæ orationi quis studeat, quomodo id melius facere po
 test, quàm si translatis commodè uocib. frequenter u
 tatur? Translatæ autem uoces sunt, quæ ex loco in quo
 natæ sunt, in alienum migrarunt: quæ quasi stellæ ora
 tionis interferuntur. Omnia autem uerba aut seorsum,
 aut in contextu considerantur: seorsum, ut pura sint,
 usitata, & rē significantia. Quom enim oratio institu
 ta sit in auditoris maxime gratiā, quàm indigna laude
 sit,

fit, si obscura fuerit, et apud homines cōsummatae præsertim lectiōis, egeat interprete? In cōtextu aut orationis uerba cōcinna sunt, apte inter se cōphærentia: quæ in ingressu orationis, & in exitu, maxime uoluptati aurium inserviunt. Illud uero cum prudentia coniunctum est, ut qui dixerit, intelligat, ac secernat, in quo genere uersetur oratio. Nā eloquens ille, quem se persæpe quæsisse, nunquam autem inuenisse Antonius profitebatur, cognoscet à se humilia subtiliter, magna grauius, mediocria temperate esse tractanda: At hæc tam diuersa nemo effecerit, nisi qui suscepto argumento obsecūdauerit, & ad genus dicendi uerba temperauerit: ex ijs innumera schemata, ex ijs antitheta, ex ijs epichæremata, et cætera in dicendo lumina effulgent. Quid dicam de numeris? quibus quasi amentis contorta oratio fulgurat, tonat, & in animos hominum tyrannidem exercet: utpote quos pro arbitrio in omnem faciem tu odij tum misericordiae tu indignationis cōmutat. In numerosa oratione Aristoteles perana quartum omnibus præfert. Cicero, Brutus, atque alij longe diuersa sentiunt. Dichorius Asiaticis oratoribus familiaris est, & propemodum in delicijs habetur: & si uera fatemur, non est alius qui apertius auribus blandiatur. Quanta enim acclamatione Ciceronianum illud ex Rosciana exceptum est? Quid tam commune quam spiritus uiuis? terra mortuis? mare fluctuantibus? litus eiecitis?

Ita

Ita uiuunt dum possunt, ut ducere animam de cælo non queant: Ita moriuntur, ut eorum ossa terra non tangat: Ita iactantur fluctibus, ut nunquam alluantur: Ita postremo eijciuntur, ut ne ad saxa quidem mortui conquiescant. Ego uero (ut dicam quod sentio) hunc aurium pruritus in ijs omnibus pedibus animaduerto, quos quatuor saltem syllabis metimur, & proximam à fine attollunt. Sit exemplo illud ex Cornelianæ: Neq; me diuitiæ mouent, quibus omnes Affricanos & Lælios multi uenaliij mercatoresq; superarunt. ob id pæana tertiū quarto multò libentius prætulerim. Hinc se germanos Ciceronis existimabant, qui hoc fine periodum clauserant, Esse uideatur. Atqui hunc uerborum deletum, hunc apparatus nemo adsequi potest, nisi qui se assiduæ accuratæq; lectioni dederit: qui in uolendis scriptoribus, ijsq; præcipuis, se diu exercuerit, & quasi concoxerit, ut ad scribendum deinde subactâ operam afferat. Vera est enim imitatio, quæ hæc parte plurimum polleat. hæc obseruat, excerpit, seponit: quæ, quom tempus postulauerit, quasi ex penu depromat. Hæc olim erat oratori accommodata, quom adhuc in ipsis crepundijs Latinæ linguæ castitas ageret: quom in theatro uoce una parum commodè enunciata, uniuersus populus actorem exhibilaret. Cur enim Cicero de bono oratore pronunciaturus ad populum prouocaret?

cat? Cur Demosthenes una dictione corruptè, sed ea consultò prolata, αἰχὺνὸς μῖδωτο ὃ ἄνδρες, ἦ ὅ; acclamationem totius populi Atheniensis emeruit, μῖδωτός, nisi si quòd protritæ ac præuulgatæ erāt dictiones, quib. docti indocti promiscue utebātur? Alioqui anicula una olitrix nō annotasset affectatum atticifmum in Theophrasto. Ex quo nobis multo maxima illa difficultas adsurgit, de qua paulò antè diximus: dediscendi scilicet uerba corruptissima, quæ alijs Gotthis, alijs Longobardis, alijs Mauris & Vandalis accepta fuerunt, ego ex omniū fece hausta contenderim. Nouissimus autem labor incumbet ediscendi atq; ebibendi, scriptorum ueterum beneficio, non dico quæ optima sunt: (nam in hoc ueteres salua adhuc populi uictoris gentium maiestate elaborabant) sed ea quæ non sint pessima. quæ si non ornamentum orationi asferant, certe dignitatem non detrahant. In collocatione aut uerborum, & numerosa oratione, illud non dissimulabo, nonnullam quoq; partem naturæ deberi, quæ acutis & grauib. omnem pronunciationem modulata est: in imitatione tamen certū est partem longe maximā, et ipsam quodam modo summā esse positam. Hinc est quod Platonem legentes, heroicā quandam amplitudinē haurimus, et afflatu propè diuino incitamur. Qui uero frequētes sunt in lectione Isocratis, hi comptam, & undiq; pictura-

tam

tam orationem effingunt, palæstræ quàm iustæ pugnæ multo aptiorem. Qui apud Demosthenē uersantur, hi bellicum quendam concentū animo concipiunt, ut paulo minus ad arma prosiliant, & iam cædem & sanguinem spirent, & uulnera afferre & accipere honestum putent. At quom M. Ciceronem adimus, Di boni, quis habitus oris? quæ animorum imago non se nobis ingerit? quantis ille hastas lacertis in orationib. iaculatur? quos ille clamores, quos tumultus elicit? quoties indignatur? quos ille luctus, quas deplorationes animis inspirat, quom misericordiæ uela intendit? Quale illud: O me miserum, ô me infelicem. reuocare tu me in patriâ Milo potuisti per hos: ego te in patria per eosdē retinere non potero: et quæ sequuntur. Quæ tantū secum ignis conuehunt, ut totus auditorū animus exardescat. Quid in ijs libris, quos de philosophia cōscripsit? quàm presse ingreditur? quàm luculenter enarrat? quàm fortiter redarguit? quàm constanter asseuerat? In ijs autē libris, quib. rationem dicendi prosecutus est, rem planè admirabilem præstitit: ut quom libri illi minime sint eloquentiæ capaces, is tanta tamē eloquentia illos exornarit, ut non aliunde libentius eloquentiæ rationē mutueris, Et quota hæc portio innumerabiliū laudum? quas eminentissimus ille, et planè incōparabilis orator promeruit, lōge omni inuidia maior: quas præter Ciceronē ne

mo facile enumerauerit. Sed nos hæc pauca ea tātū causa attigimus, ut oēs intelligant, ei q̄ profecturus est in dicendo, imitationē optimi cuiusq; esse necessariā. qua ab legata ac reiecta, omnes conatus iacere, ac nō aliter esse destitutos oportet, quā si nauis oneraria pacato in mari, remittentib. uētis, inhibentib. nautis, fluctuet tantum, neq; promoueat, neq; præstitutos portus sibi unq̄ polliceatur. Quod si nemo dubitat, quin ad imitandum optimus quisq; deligēdus sit: neq; id dubitabit, Ciceronem sine cōtrouersia longe omnibus esse præferēdum. Nā ex cæteris una aut altera uirtus peti potest, hic unā omnia implet munia, solusq; pomæria Romanæ eloquentiæ tantū protulit, quantū imperatorū nemo uictribus armis imperiū propagauit. Ut nō iniuria Apollonius Molonis, quom Ciceronē Rhodiorantē audisset, ingemuerit uicē Græcorū, quib. quom Romana uirtus imperium abstulisset, id, quod unum reliquum erat, eloquentiā scilicet, Cicero quasi spoliū ex deuictis ingenijs, in Romanā urbem referret. Nec à me quisquā putet hæc ideo dicta esse, quod cæteros scriptores in ordinem redigam, aut suo honore fraudatos uelim: Absit enim à me hic furor. An ego Cæsarem non suspiciam? qui ea scripsit animi magnitudine, qua depugnauit. Certe ego, si mihi argumentū offeratur, in quo ille uersatus est, Cæsarem quā Ciceronem imitari malim.

Quid

Quid Liuium? quid Salustium? Vtrunq; diuersa uirtute eminentem? quid Celsum in re medica? quid Columellam in re agresti? Certe in historia naturæ C. Plinium facile omnibus prætulerim: in cuius descriptione, nemo mirificas illas opes feliciore penicillo expressit: nemo dulcius, nemo aptius Aristotelem, Theophrastum, totamq; illam doctissimam antiquitatem sub compendio repræsentauit. Certe me loca quædam ex Cicero ne excerpta, et à Plinio repetita cōferentē, ingens admiratio peruasit, quom ea cōmodius ac subtilius à Plinio enarrata (meo qdem iudicio) offendissem: usq; adeò multi interest, cui quis materiæ describendæ nomē dederit. Mirum est enim, quantū in eo quisq; promoueat, ad quod à natura factus uideatur. Sed corrupta adeò ad nos Pliniana lectio peruenit, ut (quod aiunt) Samnium adhuc quæramus in Samnio. Solent hoc nonnulli percunctari, Nunquid ab eo, quem nobis imitandum proposuerimus, liceat eadem prorsus uerba, nihil immutata, nihil inuersa, in nostra scripta transferre? Anceps quæstio, & super qua neq; uerba, neque rationes desideres: seu tu hanc, aut illam partem propugnādam, seu oppugnandam susceperis. Quod si testimonijs utilis, authoritas clarissimorum se utrinq; profert. Mitto cæteros. Sanè Vergilius, Belli ferratas rupit Saturnia postes: et, Vnus qui nobis cunctando restituit rem: aliaq;

aliaq; loca innumera tum ab Ennio, tum ab alijs prisca
 seculi scriptorib. bona fide sceneratus deprehenditur.
 Sicut illud à Cicerone detorsit, Proximus huic lon-
 go, sed proximus intervallo. Sed et ipse Cicero: Timor
 mihi omnem sapientiã exportauit. Et illud: Arcem fa-
 cere ex cloaca. Nonne & illud Terentianum à Luio
 Andronico acceptum est? Tute lepus es, & pulpamen-
 tum quæris. Contra alius dixerit, imitationem ni-
 hil esse aliud nisi imaginem, ad quam stylum quis, ora-
 tionem que conformet. Atqui in imagine quædam si-
 milia, dissimilia quædam sunt: nulla sunt eadem. Nam
 si eadem, tum uero eueniet illud ridiculum, quod Lu-
 cianus argute illufit in Ioue tragædo: ut tunc Demo-
 sthenem pulchre imitati uideamur, quom Demosthe-
 nis orationem transcripserimus: & manifesto in plagio
 deprehensi, quasi cornicula Aesopi spectatoribus ri-
 sum præbeamus: uel cōiuncti adiudicatiq; creditoribus,
 nexum ineamus. Sanè huc censuram direxit Aristopha-
 nes, quom præfectus bibliothecæ Ptolomæi, adiuratis-
 simos scriptores proscripsit: qui tanti æstimarunt alie-
 na monumenta suis chartis inseruisse, ut ea protinus sui
 mancipij facta esse iudicarent. Sunt etiam, qui ab alijs
 accepta ideo mutanda non putent, quod priores illi o-
 ptima quæq; inuaserint: quibus peiora substituere, non
 modò turpe sit, sed etiam temeritati finitimum. Rursus

alij fortiter audendū, & cū antiquis intrepide digladi-
 andum suadent. nunquā enim nobis uerba defutura, uel
 propria, uel translata, uel ex contrario deducta. Exem-
 plo sit, Ea res mihi perpetuō memoriæ condita mane-
 bit, Eam rem nulla ætas mihi expugnet aut delebit ex
 memoria, Ea res nulla unquam obliuione obsolescet. In
 priore illa sententia fuit Cicero, cuius uerba sub perso-
 na Crassi enunciata subiiciā, ut res melius intelligatur.
 In quotidianis autem cogitationibus equidem mihi ado-
 lescentulus proponere solebam illam exercitationē ma-
 xime, qua C. Carbonem, nostrū illum inimicum, soii-
 tum esse uti sciebam: ut aut uersibus propositis quā-
 maxime grauibus, aut oratione aliqua lecta ad eum fi-
 nem, quem memoria possem comprehendere, eam rem
 ipsam quam legissem, uerbis alijs quā maxime possem
 lectis pronunciarem. Sed pōst animaduerti, hoc esse in
 hoc uitij, quod ea uerba quæ maxime cuiusq; rei pro-
 pria, quæq; essent ornatissima atq; optima, occupasset
 aut Ennius, si ad eius uersus me excercerem: aut Grac-
 chus, si eius orationem mihi forte proposuissem. Ita si
 iisdem uerbis uterer, nihil prodesse: si alijs, etiam obesse,
 quom minus idoneis uti consuescerem. Aduersus
 Ciceronem stat Quintilianus: & grauiſſimo orato-
 ri, cui alias reuerenter semper adsurgit, audacter re-
 pugnat. Eius quoque uerba non pigebit adscribere, ut
 quod

quod præclara ingenia utrinq; attulerint, agnoscatur. Neq; ego *ωαρω φεασι* esse interpretationem tantum uolo, sed circa eosdem sensus certamen atq; æmulationem: ideoq; ab illis dissentio, qui uertere orationes latinas uerant: quia optimis occupatis, quicquid aliter dixerimus, necesse sit esse deterius. Nam neq; semper est desperandū, aliquid illis quæ dicta sunt, melius posse reperiri: neq; adeo ieiunam & pauperem natura fecit eloquentiam, ut una de re bene dici nisi semel non possit. Nisi forte histrionū multa circa uoces easdē uariare gestus possunt, orādi minor uis est, ut dicatur aliquid, præter quod in eadem materia nihil dicendum sit. Sed esto, neq; melius quod inuenimus sit, nec par, est certe proximus locus. An non ipsi nos bis ac sapius de eadem re dicimus, et quidē cōtinuas nonnunq̃ sentētias? Nisi forte cōtendere nobiscū possumus, cum alijs nō possumus. Nā si uno genere duntaxat bene dicetur, fas erit existimari, præclusam nobis à priorib. uia in dicēdo. Nūc uero innumerabiles sunt modi, plurimæq; eodē uia ducunt: siue breuitatis gratia, siue copiae. alia tralatis uirtus, alia proprijs. hoc oratio recta, illud figura declinata cōmendat: ipsa deniq; utilissima est exercitationi difficultas. Quid quod authores maximi sic diligētius cognoscūtur: nō enim scripta lectiōe secura trāscurrimus: sed tractamus singula, & necessariò introspicimus:

& quantum uirtutis habeant, uel hoc ipso cognoscimus, quod imitari nō possumus. Quod si mihi in re controuersa liberum permittatur iudicium, illud uideor sine cuiusquam iniuria posse dicere: quādam esse tam proprie, tam apposite, & ad rem explicandam accommodate dicta, ut uix cōmutari possint, nisi in deterius. Quale Cæsarianum illud: Altero commeatu omnes copias trans flumen exposuit. Et Plinius Cæcilius, quom lachrymas uectigales eorum appellauit, quorum hæreditati pars detrahebatur, nō potuit efficacius rem com monstrare. Quom Cicero integrum discipulum uocauit, satis indicauit hominem nullis adhuc imbr̄tum rudi mentis. Neq; illud Ciceronis quisquam melius dixerit: Aut opus sartum redimere, aut operam in diem locare. Quod si hæc usui ueniant, nemini fraudi duxerim, ijs si ne ulla interpolatione uti. Quod si quis immutare tentauerit, me quidem iudice, nō id faciet sine affectationis suspicione. Sed quom multo plura sint, quæ uarijs modis dici atq; exornari possint, & (ut ita dicam) eloquentiæ capacia sint: is apud me longe potior fuerit, qui pluribus luminib. orationem uariauerit, & copiam in dicendo suam approbauerit. Quam rem uideo Senecam Ouidio uitio dedisse. Sed uitium hoc tam amabile est, & magnis ingenijs tam peculiare, ut non altero libentius uelim bene institutos adolescentes laborare.

Illud

Illud erit in imitatione præcipuum, ut à pari, à simili, & quasi ex eadem uicinia multa contrahas, & quasi reponas. Exemplo sit illud. Cicero dixit, Turpe esse amicitiam ad calculos reuocare. Tu hanc dicendi imaginem mille modis effinges, multiformi que persona indues. Nam & beneficentiam nihil reuocare ad calculos, & probos in promerendo calculis non uti, et ingratos uocados esse ad calculos, & neminem esse qui cum bonitate summi numinis possit calculis decidere: & legem Talionis tacito consensu antiquatam, quod paribus calculis iniuriæ pensari non possint, commodè pro loco & re præsentē dixeris. Quærun humanarum artium studiosi, quis fuerit celeberrimus et ore omnium dictus canon Polycleti. Ego eum Doryphorum illum uiriliter puerum fuisse arbitror, ex quo omnes omnium membrorum exemplum sumebant artifices: non ea quidem ratione, ut tam excellentis imaginis membra conuellerent: sed ut numeros eosdem tantum, eandemque proportionem seruarent. Solus enim ille artem fecisse artis opere iudicatur. Illud quoque testatum uelim, nullam esse partem in arte dicendi, quæ diuturna lectione, solerti que imitatione non multo fiat melior atque auctior: siue illa ex re pendeat, siue ex dicentis ingenio. Nam & exordia, quæ ex re petuntur: & inuentio, quæ insita est in re: & coordinatio, quæ ingenij functio est: cætera denique

quæ superius enumerauimus, si ad imaginem optimi & probatissimi cuiusq; referantur, infinitū est quanto cultiora absolutioraq; effici possint: sicut & reliqua naturæ bona, si manu tractentur, et mangonis artificio expoliantur, supra fidem splendent atq; illustrantur. Me igitur iudice, primus locus sit imitationi in delectu uerborum, seu quæ ad rem exemplificandam, seu quæ ad exornationem pertineāt. In reliquis autem, secundarius et postremus subsideat. in actione incertū est, plus natura an cura ualeat: certe suauitas uocis, & literarū expressio, quam in Catulis laudauit antiquitas: quin et oris probitas, dignitas corporis, & faciles membrorū flexus, naturæ debentur. Nec tamen huic omnia, alioqui Demosthenes non tantum operæ dedisset Andronico hypocritæ: non Augustus Phonsco: nō Cicero toties cum Roscio & Aesopo contendisset: neq; idem optasset aliquot locis suum sibi oratorē non quidem palæstritā, sed neq; omnino ἀπάλαστον contingere. Atqui ne illud quidem omittendum puto: hāc ipsam imitationem, quā candidatis studiorum ita cōmendatam uolumus, ut sine ea propè inanis sit omnis opera, tunc demū non solum inutilem fore, sed iacturam etiam allaturā ijs, qui iam suis uirib. uti possunt, et (quod adagio tritum est) sine cortice natæ. Alienis enim semper uestigijs hædere, et semper astris (ut ait Varro) eū uti, qui

per

per ætatem stare possit, atq; ingredi; non modò turpe est, sed periculosum etiam. quom non facile eorum vires coalescant, qui alienis pedibus incedunt, alienis manibus pugnant, alienis oculis vident, aliena lingua loquuntur: sui denique obliti, alieno spiritu viuunt. Quippe hoc ijs per me liceat, qui nondum in suam tutelam uenerunt: qui que per ætatem præmanso adhuc cibo aluntur: quorum adhuc membra fascijs effinguntur. At quorum adulta est ætas, & firmiores lacerti, ij iam prodeant ex umbra, iam prosiliant in campum, iam cum ipso lanista contendant, à quo olim solebant dictata accipere, suasq; cum eo vires expendant. nec cedant, sed contrà potius adsurgant; periculum facturi, an ipsi quoque possint ordinem ducere, & suo Marte de gradu aduersarium deijcere. Nec sanè hoc loco mihi absurdum uidetur eius fabulæ meminisse, cuius autorem habeo Alexandrum ex Aphrodisiade, philosophum, & in Academia, & in Lyceò præstantissimum. In lucem ediderat Venus Cupidinem. Mirabatur dea quod multos post menses à natali die nihilo auctior fieret Cupido. Quæ causa eius moraretur incrementa, neque intelligebat, neque quid facto opus foret, aut quomodo huic mæderi posset incommodo prospiciebat. Fatidicam igitur anum Themis adit, consulit, responsum accipit:

Non antè illum iustos auctus habiturum, quàm Venus alterum filium peperisset, in cuius æmulationem ille succresceret. Venus respoſo Themidis accepto, it in Martis complexum, filium alterum parit, cui nomen Anterotiſ imponit: ceu tu Anticupidiniſ dixeris. Tum uero mirum dictu, quàm repente, quàm feliciter adoleſcit ille. Certatim dixeris alterum in alterum contendere, uter pulchrius ac præſtantius ſe porrigat. Mirantur dii cæteri, tum uero imprimis parentes, tam egregiã prolem exurgere. Ex ijs puto facile colligas, nulla præclara ingenia poſſe ingentes proſectus facere, niſi habeant Antagoniſtem (ut Græci dicunt) qui cum decertent, qui cum colluctentur. Neque ſolum oportet, ut cum æqualibus, uiuentibusq; contendamus: ſed cum ijs etiam, qui olim ſcripſerunt, quos mutos magiſtros appellamus: Alioqui futuri ſemper infantes.

F I N I S.

L I L I I

LILII GREGORII GYRAL-
DI AD CYNTHIVM GY-
raldum Epistola.



VDIERAM quidem antea istic Fer-
rariæ gentilem quendam meum ad o-
ptimas artes, bonasq; literas pleno gra-
du procedere : famam hanc nonnihil au-
xerat Fabius Antimachus, qui hic apud nos medicum
agit, iuuenis raræ & spectatæ indolis. Nuper uero
cum à Pico uocatus Manardus, non iam ut antea fa-
mam, sed certissimam quondam mihi tuæ & eruditio-
nis & elegantiae formam impressit, ut eum ego erga te
amorem, ac beneuolentiam conceperim, ut miro ac in-
credibili tuarum literarū desiderio arderem. Sed bone
Deus, quanta nunc mihi facta est amoris & charitatis
accessio, cum cultam ad te Cœlij de imitatione cōmen-
tationem, dignissimā illam quidem imitatione, mihi le-
gendam transmisiisti? Cœlij inquam illius, qui unus hoc
fermè tempore Varronis & Plinij eruditionem, cum
M. Tullij eloquentia coniunxisse uisus est, orbemq; il-
lum disciplinarum, interiorūq; ac reconditarum litera-
rum clarissime patefecisse, quem iure quidem ego à pri-
mis annis & colui semper, & suspexi, & me nonni-
hil ab eo fieri, in coronis gloriari soleo. Amorem ergo
ac beneuolentiam erga te meam cumulatissimè auxit

Coeliana cōmentatio. Sed quid dicā? quod fieri uix pos-
 se credidissē. Expectationem meam longe superauit
 tuarum epistolarum lectio, ex quibus planē percepi, eō
 te breuissimē peruenturum, nisi alia te forte studia im-
 pedierint, quō adhuc paucissimi peruenerunt, nedum
 sunt ausi aspirare. Perge, quæso, hoc gradu, mi Gyr-
 alde charissime: hāc tu assidue incudem tunde: nec patia-
 re, ut barbarorum hominum studia, te à tanto incepto
 deturbent. Et, ut adhuc præstitisse uideris, tu tibi con-
 sta, Et qua cœpisti simul Et eloquentiæ Et sapientiæ
 uia grassare. Hic me Gyralde cōtineo, ne te, qui per te
 sapis abunde, docere uidear, et sus Minerā: ne ue mali-
 gnus aliq̃s, aut inuidus, ut sunt pleriq̃ omnes hac tempe-
 state, putet me familiæ necessitudini et nomini adulari,
 blandiriq̃ magis quā ex animo dicere. Cæterū quo-
 niam ex tuis literis, te cupere uehementer uideo, quid
 de imitatione Coeliana Picus ipse sentiat, meis ut tibi
 literis significem, longior sim Gyralde, si cunēta ue-
 lim hic tibi perscribere, quæ statim ille audita tua pri-
 mum epistola, dein Coeliana commentatione, dixerit:
 ut est homo omnium facundissimus, cum aliquid ipse
 suis uerbis declarandum aggreditur. In summa, in sua
 se ait persistere sententiā, quam longiusculis duabus ad
 Bembum nostrum epistolis pridem datis est executus:
 quas Et te uidisse ex tuis literis facile colligo. Porro
 quo-

quoniam & meam quoque sententiam rogas, tamen si ex quo Romana me tempestas sic fortunæ fluctibus obruit, ut nulla sit amplius emergendi spes reliqua, amissis non modo amicis & opibus, sed & corporis ualitudine, totum me, ut nonnihil à procellis subleuer, lectionum uarietati omnis generis auctorum addixi, quæ pro eorum oratione legentis stilum huc illuc in diuersa rapiunt. nihilominus, ne non ex parte morem tibi geram, paucissimis accipe, quod mihi nunc occurrit. De imitatione generatim, & in uniuersum non satis recte quenquã hoc tempore præcipere posse crediderim. Nã (ut mihi quidem uidetur) bifariam imitatio ipsa est partienda. aut enim candidato, aut adulto præponitur: hoc est (ut planius loquar) aut rudi, & uix initiato, nec dum satis confirmato: aut erudito, & probe in literis uersato: (neque enim cum tardis & conclamatis est sanè nobis laborandum.) Ergo si rudes, & candidatos, dociles tamen, ad imitationem uoces, multo optima mihi Bembi præceptio uidetur. Idque etiam eò usque faciendum censeo, antequam quicquam aliud eruditionis & disciplinarum attingant, donec non tantum animus imbutus ipse, sed eo etiam aures tritæ ita occalluerint, ut ferre nequeant, imò etiam aspernentur, quicquid suæ fuerit dissonum imitationi, iam uero si doctos & eruditos ad imitationem prouocare uelis, nostri Pici,

&

& Cœliana sententia idonea magis uidetur, ad eam
 præstandam. Nā utriusq; ratio ab eodem fine non ualde
 declinare uidetur, si modo utramque recte perpendas.
 Tum illud quoq; diligenti cautione curandum est, ne
 quid inuita (quod aiunt) Minerva; & repugnante natu-
 ra hominem, ut cæteris in rebus, ita in imitatione ag-
 gredi præcipias, quando diuersæ ut facies, ita sunt spe-
 cies, & imitationum idææ: sed suam quemq; iubeto na-
 turam, & (ut dicitur) Geniū sequi. Nam si me diuinam
 illam Platonis amplitudinem, & Isocratis myrothecia
 imitatione consequi iubeas, frustra id cupias. humi e-
 nim (ut uides) serpens, uix ego queo flosculos collige-
 re. Illud etiā non mediocri cauendum cura, ne dum imi-
 tatores esse cupimus, in uitium incurramus quod Græ-
 ci ab inepta imitatione κακοζηλία uocāt: uel quod Lu-
 cianus cuidam Thucydidem imitanti obijcit. Atq; hæc
 pauca tibi ea ratione duntaxat sint à me perscripta, ne
 aspernari uidear, quam tantopere concupieram, obla-
 tam mihi beneuolentiæ & necessitudinis nostræ com-
 plectendæ occasionem. Vale, & si me si
 mutuo facere cupis, ama.

FINIS.

ERRATA INTER EXCV-
dendum commissa sic
emenda.

P Ag. 24. uers. 16. lege, placidissima 25. 19. caſſide
27. ult. deſigis 29. 14. Ipſe ſibi 30. 23.
Erga 32. 7. latosq; 33. 1. Dux 39. 5. perpetue
42. 13. monilia 49. 14. appulerim 84. 1. omnia.
88. 10. Virgineumq; 102. 6. gelu Ead. 19. cui gila-
ta. 104. 3. lecti Ead. 7. ſtirpis Ead. 11. Alpheſibœi
107. 19. uerſicoloribus 117. 20. DVLCISS.
191. 11. glacies 207. 20. ipſe mei
208. 18. rationem

~~BASILEAE~~ IN OFFICINA ~~RO-~~
~~BERTI~~ VINTER ANNO A NA
tali Christi M. D. XXXX.
Mense Martio.





ANTONII GERALDINI POETAE

LAVREATI BVCOLICA,
antehac paucis uisa.

Bibliotheca. Ser. Coll. Rom

Sec.

Refu



~~PER ROBERTVM VVINTER,~~
~~BASILEAE,~~ ANNO
M. D. XLIIII.

AVCTOR CARMINIS
De Seipſo

TRes mihi dant nomen terræ, treis laudibus orno.
Oenotriam, Hesperiam, Trinacriamq; plagas.
Ulla tulit, fouet hæc retinendo, tertia pascit.
Sicq; genus, sic ars, sic mihi fluxit bonos.
Stirpe Geraldina ducens Antonius ortum,
Temporibus lucem Principibusq; dedi.
Nam lustraui orbem Regum Legatus, & horum
Descripsi uarijs gesta decusq; modis,
Hæc mihi ter denos intra fors contigit annos,
Mox sacer ad sacras res mea uota tuli.
Namque elego Fastos, lyricis sed uersibus Hymnos,
Heroico cecini Mystica Sacra pede.
Fernando fœlix uixi sub Principe, sub quo
Maurorum Europæ cessit ab orbe genus.

HIERONYMVS GVNTIVS,
IOANNI VVILHELMO
Reifensteino, Adolescenti disciplinis
liberalioribus æquè ac Maiorum in-
ginibus undecunq; clarissimo,
Domino & Amico
suo Salutem.



QVum nuper admodum Gilbertus Cognatus uir clarissimus Roberto nostro Chemerino cõmuni Amico Bucolica ista exhibuisset adenda, non sine graui ipsius iudicio id factũ cognoui planissime. Apparebant enim cultu neglecto, si quis obiter solũ inspexisset, uelut tinea & blattis ab oscitantioribus quidem illis obijcienda, & quondam inter ipsas sordes (malum) sordidos libellos abiecta, interq; euulgandũ à principio negligenter culta & tractata, adeo in his plurima deprauata, manca, inuersa que extabant uicio certe eorum, qui pri

mo & aliquam multis retro annis excu-
serant. Postquam igitur ad meas manus
peruenerunt, coepi & ego cum Gil-
berto homine facile doctissimo admirari
ter maximam sanctimoniam, doctrinam
que summam, coelestem dico, quibus undi-
quaq; ad coelum usque haec referta sunt
Bucolica. Quod genus poematis de in-
dustria suo proposito Antonius Ge-
raldinus Vir, si quisquam alius, immorta-
li gloria dignissimus accommodauit dex-
terrime simul ac felicissime, ut iudicabis
ipse etiam, sat scio. Sed hoc super omnia
animum meum subito gaudio totum per-
fudit, quod intellexi aliqua à Græcis
Vatibus & Theologis in sua transtu-
lisse cum maxima laude. Nam quis non
ex Nonni Vatis Græci proœmio, qui
Diui Ioannis Euangelium carmine ue-
re heroico & augusto $\omega\alpha\gamma\alpha\phi\epsilon\alpha\varsigma\iota\chi\omega\varsigma$ red-
didit, haec tria saltē carmina in Aeglo-
gam

gam secundam optime translata deprehendat ac agnoscat?

Nam Puer in cœlo genitus, sine Matre, micanti,
Immensus, consorsq; Patris, Patriq; coævus,
Hic Genitore carens, in terra natus agresti,

*Etcætera. Ne itaq; liber hic tanquam
ab ingratis, sine commendatione & studio
diligenti aliquo etiã nostro prodiret,
Roberti iussu, inter media negocia in-
sanissima, hæc ad te quasi præfari licuit.
Accipies autem hoc, quicquid est, pro
strena, qua initio quolibet noui aduen-
tantis anni, Amici se mutuo exhilarare
solent. Cuius quidem et nunc ego tibi fe-
lix initium simul hoc, simul illud, tum fe-
liciozem successum, felicissimumq; exi-
tum precor et opto, atq; nuncupatione
ista ex animo bene ominor. Vale.*

*Basileæ, XII Decembris,
Anno M. D. XLIII.*

ANTONII GERALDINI

POETAE LAVREATI, IN BV-
colica sua, ad illustrem Dominum Alfon-
sum, Regis Hispanorum Filium, Præsu-
lemq; Cæsaraugustanum Procemium.



I omnis humanæ philosophiæ
ratio hoc in primis iubet, ut
quod quisq; profitetur, id præ-
stet, nescio profectò illustris
& amplissime Alfonse, Hispanorum Re-
gum scboles, quid meo muneri cōuenien-
tius rear, quàm res sacras scribere, qui sa-
cris iam pridē initiatus, Protonotarij apo-
stolici titulo sum insignitus. Cuius quidem
muneris ea prima fuit institutio, Clemen-
tis, Antheri Fabianiq; maximorum Pon-
tificum decretis, ut gesta Martyrū, Sacra-
rumq; rerum mysteria literis commenda-
rem. Quod profectò eo libentius sum ag-
gressus, quod te Cæsaraugustanum Pon-
tificem ad religionem cœlestemq; illam sa-
pientiam, quæ ex ueri Dei cultu manat, ea
ætate, qua nunc es, tenera scilicet, & uix
pubescenti, procliuiorem, quàm reliquos
maturos nostri seculi Viros cōperi. Cuius
castis

cāstis & sanctissimis auribus illa tantū digna iudicari, quæ & sancta essent & Diuina, existimans etiam me non nihil luminis allaturū his, qui res Christianas Latine aut discere aut docere alios uoluerint. Quod secus ab alijs factitari audio, qui poeticam magis imitatione, quàm arte sectantes, ad gentilia relabuntur, nec quicquā nisi ethnicum, aut profanum potius, canere consueverūt. Quod si probari sensero, statim Hymnos nostrorum Heroum, & Fastos, quos paulo ante incepti, absoluam. Vale interim, & ingenijs, ut soles, faue.

ÆGLOGA PRIMA DE
SALVATORIS NOSTRI NATI-
uitate. Interlocutores Mopsus &
Lycidas, hoc est ipse Præsul Cæsar,
augustinus, & Auctor carminis.

MOPSVS.



Vid gelidi uitrea dum sic recubamus
in herba,

Non placidum bifori modularis arm-
ine carmen,

O Lycida? Resonant quo curuo margine rupes,
Proximus, & labens per culta resultet Hiberus,
Defluat ac placidis applaudens Gallegus undis.
Quis te torpor habet? Dudum mulcere solebas
Pastorum tetricas blandis modulatibus aures.

Ly. Cur me Mopse iubes calamos tentare repostos,
Cum frenat fluuios glacies, cum lamina ferri
Disilit, & cæli durescunt uina rigore?
Non melius liquido celebrabimus ocia mulso,
Dum congesta focis crepitant mala robora trunci,
Et festum Geniale monet, ritusq; Parentum,
Insomnes uario noctes deducere ludo?

Mo. Id uulgi, uanaeq; solent seruare puellæ
Et pueri, quibus est damnosi cura fritilli,

Tempora

Tempora quos pingui, mos est, onerare Lyæo.
 Nos alios operum ludos decet edere, nostra
 Quin age dudum aliquid dignum meditare Minerva.
 Frontis honos, studij grauitas, ætasq; uirilis,
 Nil fluidum, nil turpe sinunt, uel inane uel excors.

Ly. O decus ætatis nostræ, qui moribus annos
 Anteis, exuperasq; Senes uirtute uerendos,
 Spem ne tuæ cantare iubes Puer indolis, an quæ
 Iam dudum ipse parens armenti diues Hiberi
 Ampla repurgatis patefecit pascua syluis,
 Affixitq; lupos crucibus leo, strinxit & ursos,
 Serpentesq; truces, dirarum & monstra ferarum?
 Mo. Non cupio ista mihi narrari, non etenim ipsi
 Præbemus faciles ultro assentantibus ansas.

Sed quæ de Puero potius solennia nato,
 Vnde salus orta est, unde hæc tam clara uidemus
 Lumina, dic sodes, & mystica sacra referto.

Ly. Me miserum, quis me uasti iubet æquoris undas
 In scrobis exiguæ puteum conferre pedalem?
 An nescis subita Theopompi lumina nocte
 Obriguisse, Dei dum se temerarius index
 Ingerit arcanis, & uerbis sacra prophanat?

Mo. Nil timeas. Animos Deus inspicit. Et tibi candelæ
 Si modo consultrix assistat in aure columba,
 Non Lycidas, sed Homerus eris, porrectus in altum;

Serpere nuper humi consuetus homuncio. Posthac
Has totas celsa superabis fronte cupressos.

Ly. Vellem equidem, sed me nimius pavor occupat. Et
Pressa mihi, fuerat similis hastilibus, horret (quæ,
Cæsaries, torpetq; hyemali frigore corpus.

Et noctem referens nocturnum agit Hesperus agmen,
Qui lato diffusa polo mox sidera pascet.

Mo. Improbe quid damnas hyemē, quid Vesperis horas?
Bruma fuit, tardas & habebant tempora noctes,

Cum petijt teneram parituræ Virginis aluum.

Vesper erat, cum se nostris Sator intulit oris
Iusta laboriferis dispensans dona Colonis.

Ly. Vera refers, atq; omnis idem Vicinia cantans
Afferit, alternisq; emulcet cantibus aures,

Fatidici in primis Vates, quorum inclyta primo
Cornibus, ut celeri Fauno, frons fulsit eburnis,

Isq; his prædixit Diuinum ambagibus ortum.

Ecce rubum uideo flammis crepitare coruscis,

Non tamen ipsa ullo fruticis fastigia damno

Comminui, quamuis ignis uagus omnia carpat.

Accedam. Deus ecce, Deus, qui cuncta nouando

Permutat rerum facies, & secula lustrat.

Arentem uirgam Frater dum ponit in ara,

Corticibus subitis emittere germina uidit,

Et florem & uirides producere phyllida ramos.

Ast alius

Ast alius quatiens ferrata casside uultus,
 Rector ait Superum, certæ da signa salutis.
 Si tam tota nouis madeant hæc uellera nymbis,
 Dum circum æstiuo torrentur cuncta calore,
 Et rursum dum terra fluet conspersa sub undis,
 Si tantum hæc fusos pellis non senserit imbres,
 Huius ero populi defensor. Nec mora, lanæ
 Intumuerè undis, tellus stetit arida circum,
 Mox maduit uiridis non sparso tergo campus.
 Hinc quidam occurrit, quem sic annosa Vetustas
 Præfatum quondam non leto prodidit ore,
 Aspicio portam, Solis conuersus ad ortus,
 Clausa fuit semper, claudetur & omnibus horis.
 Hac Deus ingrediens, hinc est egressus, & idem
 Hinc residens puri libauit crustula panis,
 Atq; ideo calcare nefas hæc limina cuiquam,
 Nec licet humanis temerari passibus aulam,
 Quam formans Deus, æterno sibi uecte dicauit.
 Nec mihi tu prima signans lanugine malas,
 Prætereundus eris sacer Heros, ipse tremendam
 Prospectas statuam, cuius fuit aurea clari
 Effigies capitis, pectusq; & brachia cadent
 Argento, femora & uenter stant ære sonanti,
 Ferrea crura pedum, uisa est pars ultima partim
 Ex ferro, partim è terra concreta tenaci.

Hinc

Hinc lapis, haud ullis manibus de uertice montis
Abscissus, molem inuasit, signumq; repente
A pedibus, pulsum horribili cecidisse fragore
Et testam & ferrum, simul æs reliquumq; metallum,
Omnia trita, uelut tenues uoluisse fauillas,
Nec mansisse uides operis uestigia tanti,
Quin lapidem summa collis de parte reuulsum,
Hinc saxum, hinc rupem, tumulū dehinc deniq; factū.
Paulatim in montis dorsum creuisse supremi.
Verum longa mora est, Vatum prædicta referre,
Omnia nec tenues tanta ad molimina uires
Sufficiunt, nec fert tam magnos fistula cantus.
Hunc sacri Patres, & quas dixere Sibyllas,
Fœminei sexus Vates, & numina gentis,
Venturum uarijs præmonstrauere figuris.
Ac uelut optatum designat Lucifer ortum,
Nascentem nitido præcurrens lumine Solem,
Sic hunc terga gerens setosi hirsuta cameli,
Præuius extenso populis procul indice Cursor
Crimina tollentis specie monstrauerat agni,
Quem prius intra uterum Matris ueneratus anhelæ,
Prægnantis subito concussit uiscera motu.
Hunc Puerum tellus oriturum sensit & æther.
Omnes esse Deum simul asseruere, Virumq;
Progenitum, ut fragilis deleret crimina mundi,

Non

Non læsiffe aluum, castæ nec membra Parentis,
 Qui uenit è cœli regione salutifer orbi,
 Non demum, ut reliqui, mortali semine cretum,
 Sed genitum ex uerbo moderantis cuncta Tonantis,
 Flaminis æterni insertum Diuinitus arce.
 Sed cur tam lento passu procedimus? Ecce
 Aliger è supera descendit Nuncius arce,
 Gaudia læta ferens Pastoribus. His quoq; si uis,
 Cum boue, cumq; asino, gelida ad præsepia iuncti,
 Diuinum Infantem proni ueneremur. Vterq;
 Pergamus, nam pone greges deducet ad undas,
 Cui modo commisi, pecorum doctissimus Alcon.

AEGLOGA SECVNDA

*De Regum adoratione ad infantem Ie-
 sum. Collocutores ipsi Reges, Ca-
 spar, Baltasar, & Melchior, sub no-
 mine Granici, Batti & Myconis, Pa-
 storum.*

Signa noui partus primos orientis in unum
 Excierant Reges, & toto fulgida cœlo,
 Nulli nota unquam, aut alio sub tempore uisa.
 Præsignabat iter iam tractu stella corusco,
 Deducens longos flammæ lumine sulcos.
 Est locus, Agricolæ quem tum coluere Sabæi,

Totus

Totus odoratis exhalans undiq; syluis,
Cinnama qui costumq; ferat, qui diues amomi,
Balsamaq; & myrrham occiduas transmittat in oras,
Passim ubi virga sacris consurgit thurea guttis.
Hic quoq; fœlices nardi nascuntur aristæ,
Et quodcunq; omni in patria mercantur aroma,
Seu radice valent, seu trunco & germine, siue
Vtile corticibus sudore aut glutine lignum,
Seu lachrymis opus est, aut flore aut frondibus usquã,
Siue uoluptatis cuiquam est, seu cura salutis.
Nec caret aut geminis, aut fului dotibus auri.
Cui vicinus Arabs, sinus & quem Persicus ambit,
Distat Erythræi nec multum à gurgite Ponti.
Hinc tres ex tantis opibus tria mystica sumunt.
Aurum, thus, myrrham, Puero munuscula nato.
Sic olim Salomon, folio sublimis eburno,
Splendida suscepit magnorum munera Regum,
Imprimisq; Sabaë Reginaë ingentia dona,
Cynameas messes, gemmas, aurig; talenta,
Quot nunquam sacram congesta feruntur in urbem.
Atq; ita, qui multo languebat Granicus æuo,
Vix sua membra ferens, & curuo uertice nutans,
Albior, & uetulo sub mento hirsutior hirco
Eloquitur, mulcens promissam in pectora barbam.
Gra. Bate, Senes inter nondum numerande, nec ori
Accedens

Accedens luenum, medio sub limite uitæ
 Curris adhuc victor, tuq; ô, cui prima iuuentæ
 Tempora cœperunt flauis pubescere uillis,
 Clare Mycon, pleno captatus pectore somnos;
 Nec pudet in tanta radiorum stertere luce?
 Hoc inbar, hoc nitidum speciosa lampade fidus,
 Credite, non nostris nequicquam apparuit aruis.
 Nam Puer in cœlo genitus, sine Matre, micanti,
 Immensus, consorsq; Patris, Patriq; coæuus,
 Hic genitore carens, in terra natus agresti,
 Prodit ab angusta non tactæ Virginis aluo,
 Lactis opem sumens, qui condidit omnia nutu,
 Nec quas pauit oues, pariter cum stirpe peremit.
 Et Deus humano uisens sub corpore terras
 Ad præsepe iacet, quod nunc præfertur Olympo.
 Hic tegitur laceris uix membra infantia pannis,
 Ut doceat Proceres, nimios contemnere luxus.
 Venit enim, ut renouet perituri secula mundi,
 Mersurus summos, humiles ducturus in altum.
 At Genitrix teneris immulgens ubera labris
 Aspectat, qualem pictis per templa tabellis
 Aligerum Veteres Puerum coluere figura,
 Non face, sed uultu atq; oculis qui spiret amorem,
 Huic igitur nostri cultus monumenta feramus.
 Bat. Battus ad hæc. Dudū mihi mēs præsaga mouebat
 Sopito

Sopito miras somni sub imagine formas.
 Nam uisum est moto referari cardine cœlum,
 Diuinoq; agros omnis lustrarier imbri,
 Nec mihi tam placidam nox attulit ulla quietem,
 Huic igitur nostri cultus monumenta feramus.
 My. Excepitq; Mycon. Et nunc sic uisa secundet,
 Qui tener in duris uagit præsepibus Infans,
 Vt nunquam tanta cepi dulcedine somnum.
 Nam modo sublata in nubes ceruice, uidebam
 In terras cœlum ferri, labentibus astris,
 Rursus humum cœlos miro transcendere motu,
 Atq; Dei atq; hominum commercia fœdere certo
 Sanciri, ut regnent æterna in pace per æuum,
 Huic igitur nostri cultus monumenta feramus.
 Arripiamus iter, nec nos uia terreat. At uos
 Quos usus docuit, monuit quos grandior ætas,
 Dicite, digna satis Puero quæ dona paremus?
 Gra. Granicus hæc. Haud ulla satis mihi digna uidem
 Sed cum uenturi sit nota potentia regni, (tur.
 Cum uideam turmas, uictriciaq; agmina, circum
 Ardenti studio innumeros paritura triumphos.
 Laurigerosq; Duces, oneratos brachia palmis,
 Purpura quos roseo uestit decocta cruore,
 Cum celebrem augusta cernam grauitate Senatum,
 Scribasq; & niueæ suffragia publica plebis,

Huic

Huic ego non frustra fuluum dabo cernuus aurum.
 Bat. Ast ego, Battus ait, quoniam laturus in orbem
 Est alios mores, mira pietate Sacerdos,
 Tollet & antiquos ritus, & sacra nouabit,
 Vitalem instituens sanctis altaribus escam,
 Postremæ ut celebrent populi mysteria cœnæ.
 Huic offerre paro preciosi thuris acervum.
 My. Deinde Mycō fatur. Ne illuc sine munere pergā,
 Ipse feram Puero lachrymosæ uascula myrrhæ.
 Nam cum sit gelidi subiturus claustra sepulchri,
 Manibus ut uacuet sanctorum Tartara Patrum,
 Et spolijs redeat rediuius Victor opimis,
 Tertia cum trepido noua lux effulserit orbi,
 Cum pompa nitidum leuis ascensurus Olympum,
 Nil tali reperire queam opportunius æcto.
 Sed modo cur pandos cessant onerare camelos?
 Cur iumenta tenent? Quis nos remoratur? Eamus.
 Et iam præcedit, quod ituros prouocet astrum
 Grande, suo illustrans montes & plana nitore.
 Liuidus Herodes Puerum ne lædere possit,
 Cum cædet teneros gladijs immitibus agnos,
 Post alio in nostras redeamus tramite ualles.

*AEGLOGA TERTIA,
De Ioseph & Maria. Sub nomine Io
sephi ac Mariæ questus de Filio amis-
so, eorumque ac Iesus Filij, tandem re-
perti collocutio.*

• IOSEPHVS.

HEu, spes ampla domus, nostræ lux unica uitæ,
Et Superis dilecte Puer, placabilis imis,
Candidior niuibus, cœli rutilantior ast is,
Qui nunc solus abes nobis regione relictis,
Quo sine iam præceps inuitus demoror æuum.
Certe ego credideram, dum magna ex æde redimus,
Festa luce sacra lustrantes mœnia terræ,
Inde Mares, atq; hinc Mulierum maximus ordo,
Tecum fœmineos cœtus celebrasse Maria.
Ma. Immo ego iuncta sequi tecum uestigia rebar,
Et Puerum potius lateri accessisse paterno.
Sed tritum relegamus iter, quæramus & unâ,
Quem modo seiuncti Puerum dimisimus ambo.
Iosephe quid cessas? Nodosum sume bacillum,
Quo melius possis plantas fulcire tremantes,
Nam timeo, ne quid casus occurrat acerbi
Interea. Huic gentes pridem insidiantur iniquæ,
Et sensi, & nostræ est pignus Puer ille salutis.

l præ,

I prænanq; sequar, pergas quocunq; licebit.
 Io. Sanguine iuncta mihi, atq; eadē sanctiſſima Cōiunx,
 Sed lachrymis uincor, nec quicquam cerno profuſis.
 Nec timui, tibi teſtor enim, tum deniq; tantum,
 Cum te prægnantem noſtro non ſemine uidi,
 Virgineum quemquam ueritus libaſſe pudorem,
 Nec dum cœleſtis firmatus uoce Miniſtri,
 Te uolui in patriam externam migrare relictā,
 Quantum laſſa nouus mihi concutit ilia terror.
 Ma. Ipſa quoq; extimeo, non nunc ſecus excita, q̃ cum
 Monſtriferam Aegyptum, Niloticāq; arua ſecuti,
 Infantem intrepidum timidis portauimus ulnis,
 Ne ferus Herodes crudeli occideret enſe.
 Sed quis me miſeram tantum tolerare docebit,
 Quæ uix ferre queam præludia prima doloris?
 Senſi quando recens cruor eſt effuſus ad aras,
 Aſſumptæq; dedit carnis libamina prima,
 Dum Puer antiquo poſuit præputia ritu.
 Senſi etiam, ſacram quando eſt oblatus ad ædem,
 Cum Simeon, ſæuus penetrabit ad intima, dixit,
 Enſis, & immenſo feriet tua corda dolore.
 Non fruſtra Salomon noſtræ lamenta querelæ
 Edidit, accedam dicens, quæramq; per urbem,
 Si forte inueniam, quem mens mea diligit, uſquam.
 Io. Hic potius quæramus eum, uicina noſtra eſt,

Forte latens inter socios charos ue propinquos,
Vt Phœbus tandem, depulsa nube, nitentes
Ostendat uultus nobis, orbemq; serenet.
At cur hic tantum studio exercemur inani?
Iam lux exacta est, nec uico apparet in omni,
Cras melius celeres urbem templumq; petamus.
Ma. Vt suades uenerande Senex, comisq; Marite,
Cui mea uirginitas tuto commissa fideli.
Sed rogo, nunc lassos artus compone cubili,
Et paulum tacitæ concedens lumina nocti,
Deposita tenues grauitate recollige uires.
Interea æternum supplex orabo Parentem,
Vt nostram, utq; suam sobolem tueatur ubiq;
Io. Iam luces abiere duæ, & nunc tertia fulget,
Perlustrans orbem croceis Aurora capillis.
Nescio quid, Coniunx, lætum mens nunciat. Ecce,
Nonne uides, celebris cum templi tecta subimus,
Bissenos Puerum qui uix dum compleat annos,
Mutua cum doctis Senibus conferre disertum
Eloquia, & tantam sapiendo euincere turbam?
Ma. Cur ita sollicitos fecisti Nate Parentes?
Dum simul ignaros rerum, uitæq; tuæq;
Meq; patremq; tuum non læta mente relinquis,
Perq; uias, plateas, perq; omnia compita lassas
Quærendo. Nempe ipse tua pietate priores
Exuperas,

Exuperas, meliusq; sapis, quàm quicquid ubiq;
 Est hominum, fucrit ne unquam, aut deinde futurũ est.
 Ies. Pone, precor, tristes Genitrix pulcherrima curas.
 Quoq; magis castæ tu pignus diligis alui,
 Hoc magis amissi fœtus solare laborem.
 Et quem rite colis, proprio sine munere fungi.
 Nam superi mandata Patris faciamus, oportet,
 Ipsius ut uerbo genitum me sentiat orbis.
 Quemq; olim ad pugnam egressum Betelemica tellus
 Prima tulit, paulum nunc Nazaræa tenebit,
 Vltima post solum cernent certamina muri.

*AEGLOGA QUARTA,
 de Baptismate & tentatione Saluatoris.
 Collocutores, Iesus & Diabolus,
 sub nominibus Iollæ & Charonis.*

SEtigeri Vatis manibus lustratus in unda,
 Fluminis ad ripam Iordanis, Pastor Iollas,
 Non sibi, sed septis operosa piacula captans,
 Deserti secreta petit, tentandus an esset,
 Quem uox alma Patris superi, labensq; columba
 Non uano auspicio, cœlis uulgarat apertis.
 Inde quater denæ peragit ieiunia lucis,
 Mosæ Patris, atq; Helicæ exempla secutus,
 Quando nouis studuit ueteres adiungere ritus.

Ut paries geminus saxo conneſtitur uno,
 Vnus ſæpe duo committit ouilia murus.
 Nec quicquam interea Cereris, nec mitis lacchi,
 Non lac commixtum fragis, non flumina libans
 Vlla, nec euulſis paſtus radicibus, aut quo
 Rore poli ſubito, morientia culta reſurgunt,
 Eſuriſt tandem, moroſam paſſus orexim.
 Quem ſator ut uidit tribuli ſegetisq; malignæ,
 Non cœli aut terræ nimijs feruoribus uſtum,
 Sed uicio geſtans infecti pectoris ora
 Aethiopum, uiridisq; intorquens lumina flammæ,
 Aggreditur tali cunctantem callidus arte.
 Cha. Agnoſco, uideoq; tuum formoſe nitorem,
 Supra hominemq; infraq; Deum potes ipſe uideri,
 Sed quo te ſummi natum rear eſſe Tonantis,
 Effice, quos ſterili lapides calcamus in agro,
 Frugales uerſi extemplo mutantur in eſcas.
 Iol. At non humanis menſis alimenta miniſtrat
 Sola Ceres, ſimplexq; hominum cibus explicat artus,
 Sed uerbo producta Dei quæ multa creantur.
 Deinde ſenex luuenem ſacratæ ad mœnia terræ
 Elicit, & templi ſublimis in arce locatum,
 Aetherea ut perhibet genitum ſe ſturpe, precatur,
 Præcipitem pinna ſeſe demittat ab alta.
 Cha. Nam ueterum teſtantur, ait, monumenta Virorū
 Nulla

Nulla Dei quondam nocitura pericula proli.
 Cœlesti mandauit enim Pater ipse cateruæ,
 Vt Genitum mundi lustrantem littora seruet,
 Efferat inq; ulnis, ne pes offensus eundo,
 Cæspitibus duris, aut saxo occurrat iniquo.
 Cui Diuina Puer sic rursus labra resoluit.
 Ioi. Hoc quoq; priscorum sanxere uolumina Patrum;
 Quod scelus infandum est, Dominum tentare, De-
 umque,

Et se lædentes non lenta ulciscitur ira.
 Hinc tandem in summi porrecta cacumina montis,
 Vnde patens fuerat terras prospectus in omnes,
 Perducens luuenem, tenebroso pectoris index,
 Index, qui primos fœlici in ualle Parentes
 Aggressus, quondam diro deceperat astu,
 Innumeras ostentat opes, uarijsq; fluentes
 Diuitijs urbes, & uasti maxima mundi
 Imperia, & populos Dominis seruire paratos.
 Atq; ait, hæc nostri cultus tibi præmia sunt,
 Simodo pronus humi ueneraberis omnia dantem.
 Tum facie rutila, uelut acrem incensus in iram,
 Vltima tentantis sic Pastor uerba repressit.
 Hinc scelerate Charon, procul hinc uæ sane facisse,
 Teq; meo mendax quàm primum subtrahere uultu.
 An malus ignoras Diuino in codice pictum,

Tu Dominum atq; Deum tantum subiectus adora,
 Hunc precibus uenerare pijs, huic sedulus omni
 Assistas cultu, supplexq; hunc excipe uotis.
 Protinus his dictis senior conterritus, aufert
 Ex oculis sese, dirum stridensq; gemensq;
 Atq; abiens tetris uiciauit odoribus auras,
 Nec tulit ulterius speciem fulgentis. At illi
 Alati lætas epulas posuere Ministri,
 Qui mox dulcisono complerunt æthera cantu.

*AEGLOGA QUINTA,
 De Christi miraculis. Collocutores,
 Lynceus & Athys, hoc est Auctor
 carminis, & Cælius sub Iudice Par-
 thenio.*

Candida uere nouo cœli nitet aura sereni,
 Florea uernat humus, lucent sata, germinat ar-
 Et uolucres varijs agros concentibus implent. (bos,
 Nos quoq; dum carpunt gemmantia pabula fœta,
 Mihi Athys, fœlix inuitet ad ocia tempus,
 Læticia ad cantus, alternaq; uerba ferentes,
 Parthenio, si uis, certemus Iudice. Namq;
 Proposuit geminos uincenti præmia tauros;
 Ripa saginatos aluit quos dulcis Hiberi,
 Et bonus ingenijs Pastor fauet. Euge relictis,

Rasilis

Rafilis ad numeros infletur tibia, curis,
 Quæq; salutiferi celebres miracula Christi,
 Quatuor in templi Pastores fronte notarunt
 Falcibus, effigie diuerfa membra tegentes,
 Hic hominis, bouis hic, aquilæ ille, atq; ille leonis,
 Materiam nostris sumamus uersibus æquam.
 Ath. Tu potius cantes, quæ Nymphæ blanda canenti
 Linceu, quem Fauni celebres, Panesq; sequuntur,
 Nam neq; me resonis mulserunt flamina cannis,
 Nec Syringa melos fundit, nec spirat Apollo.
 Nec si Musa roget, tecum temerarius ausum
 Certare, aut precium tauros sperare torosos.
 Verum age sic potius (nostrum experiere laborem)
 Parthenio ut festi dentur libamina lusus,
 Ipse legam flores, teretes tu finge corollas.
 Lyn. Ne fuge, ne uulgi cantorum more rogatus,
 Incipias ægre, desistas ægrius, atq;
 Prædura ut Proteus expectas uincula Vates.
 Nanq; ego te nuper latebrofa in rupe sedentem,
 Virgea dum saturas deduco ad septa capellas,
 Dulcisona sensi modulantem carmen auena.
 Incipe, sitq; tuis & primus & ultimus idem
 In numeris, nutu qui temperat omnia lesus.
 Dic primum, ut bibulo residens in littore, linis
 Ad se piscantes iussit transire relictis,

Atq; hominum melius piscari corda sequendo,
Ut mox nubentis tendens ad festa Mariti
Prandia, quando hilarans deerat conuiuia Bacchus,
Oppletis subito lymphis albetibus urnis,
Lusserit inclusos latices mutare colorem,
Inq; merum liquidas conuerti protinus undas:
Ath, Quin illum memini uomicas curasse putrentes
Quorundam, lacero cum corpore tabidus humor
Serperet, & traheret labes elephantia pulsam,
Nec minus hunc alijs cum morbus frigidus artus,
Ut rigidis tenues flabris agitantur arista.
Concuteret membris, solutum eiecisse tremorem,
Et solido tremulos nervos fulcisse uigore.
Sic aliquem rursus, consumpta ætate, morantem
Piscinæ incassum motus, defessa grabato
Tollere membra iubens, patrias dimisit ad ædes.
Lyn. At miseram Petri Socrum, cum febris in imis
Ossibus hæsisset, totas haustura medullas,
Lætali & fibras vitales ureret æstu,
Incolumem tantum dextra tangente reliquit.
Idem aliam eluie corrupti sanguinis atras
Fœdantem uestes, siccato uulnere, sanam
Reddidit, extremæ cum uestis tangeret oras.
Arentem alterius dextram reuirescere mandans,
Flexibilem ad cunctos mulcendo præstitit ætus.

Strumo-

Strumosam, atq; caput procuruam erexit ab imo
Ipse solo, & stellas iussit spectare micantes.

Ath. Ast alium, cui labe cutis laxata tumeret,
Luteus & clausis uenter turgesceret undis,
Depulso exeruit morbo, lymphaticus alter
Illius attractu subito curatus abiuit.

Mutorum linguas, nodataq; labra resoluit.

Atq; oculos cæcis, surdis reserauit & aures,
Dans sputum atq; lutum, læsis collyria membris.

Spiritibus multos immundis liberat, olim
Obsessos. Testis, cui mutum eiecit ab ore
Spiritalum. Testis, cui septem fœmina sæuos
Dæmonas expulerat. Testis, Cananæa iacenti

Anxia pro Nata, Christo sub Iudice, cuius
Est laudata fides, rauca dum uoce precatur,
Nate Dauid miserere mei, miserere dolentis.

Lyn. Sed quid sanatos repetis? Nonne ipse feretro
Elatum, matris spem solam, & luce carentem,
Compositamq; thoro, mox Natam Antistitis, uno
Admonitu, è gelido fecit consurgere lecto,
Et numen laudare suum? Nonne ipse sepulchro

LaZaron exciuit, quarta iam luce fluenti
Corpore fætentem, decursaq; tempora uitæ
Instaurans, uiuis defunctum accumbere iussu?

Ath. Verum id non tanti, tamen est mirabile, nanq;

Lyncæus

Lyncens occultum mentis motum ipse uidebat,
Et quod quisq; tegens secretum fecerat absens,
Sensit, & hinc uerbi sub ficus stipite dicti
Nathanael cœtum sibi conscius iuit in alnum.
Hinc Mulier, ueteris cognoscens crimina culpæ,
Indicioq; euiçta sui rea ludicis, olim
Ad puteum, huic lymphæ præbens potabilis haustus,
Expleta est, propriamq; sitim ipsiusq; leuauit.
Sed numero uincor signorum, nempe repressa
Tempestate maris, Socij cum fluctibus acti.
Huc illuc iamiam, summersa puppe natarent,
Imperio frenans tumidum compefcuit æquor,
Quod mox non madidis calcauit gressibus idem,
In nauim ad Socios sera iam nocte reuertens.
Lyn. Nunc repeto, fuit hoc, celfo cum è monte rediret,
Exactis precibus, cum Nazaræa coisset
Turba ferox, illum ut scopulo detruderet alto
Præcipitem, quando ex oculis euauit ipse,
Per medias uadens turmas, nec uisus ab ullo,
Cum prius ille, fame turba languente per agros,
Milia quinq; hominum dapibus saturasset egenis.
Nam pisce ex gemino, quinoq; ex pane receptis
Reliquijs, cophinos bis sex impleſſe feruntur.
Sic alias septem non magnis panibus, atq;
Pisciculis paucis uiuentum milia farſit

Quatuor

Quatuor, exceptis Pueris, ac Matribus horum,
 Et reliquum in septem sportas legere minuta.
 Ath. Hoc autem nulla credam ratione silendum,
 Clarus enim, Patrum cœtu assistente duorum,
 Et tribus excitis in montem Fratribus altum,
 Humanam egressus formam, stetit ore micanti.
 Ut Sol discussis effulget nubibus, ut quæ
 Nix modo fusa albet, sic candens luxit amictus.
 Et vox è niuea descendens inclyta nube
 Est audita Patris, Hic est dilectus in ævum
 Omne mihi natus, placuit mihi semper, & illi
 Quem genui vobis, Populi parete redempti.
 Huic ideo meritos cantu reddamus honores.
 Lyn. Hæc bonus in terris pro nostris gessit Iesus
 Vsis, exemplum præbens unaq; salutem,
 Quando Deo atq; homini medium se feruidus offert.
 Sed maiora prius pariter cum Patre potenti
 Præstitit, ex nihilo cœlos, molemq; profundam,
 Et genus omne virum formans, genus omne ferarum.
 Huic ideo meritos cantu reddamus honores.
 Ath. Quid generasse fuit nullo de semine cuncta?
 Ni quæ condiderat, tueretur providus Auctor,
 Semper & antiquis addens nova munera donis,
 Arentem viridi repararet germine mundum,
 Adderet & genitis species ac nomina rebus,

Egregium

Egregium ut tanta se proderet arte Magistrum.

Huic ideo meritos cantu reddamus honores.

Lyn. Summa quidem memoras, illud tamen ipse supre-
Esse reor, quod se messor pro messe rescidit, (mum

Et Sator exposuit proprium pro semine corpus.

Pro seruo Dominus misero se uendidit orbi.

Occubuit Medicus, uitam dum contulit ægro;

Et fragili æternus iacuit pro stirpe Creator.

Huic ideo meritos cantu reddamus honores,

Parth. Quò ruitis Pueri? Præceps hic proxima rupes

Mon finit ulterius longos uos tendere cursus,

Et nox prona cadit. Sed uos pro talibus ausis

Victores ambo, tauris cum pinguibus hircos

Accipite, & ueteris laudem sperate cothurni.

AEGLOGA SEXTA,

De Institutione sacramenti Eucharistiæ. Collocutores Iesus & Cephas, hoc est Princeps Apostolorum.

Finierat prisce uetus obseruantia seculi,

Cædibus austeris mitem placare Tonantem,

Effusumq; rubris iugulis libare cruorem,

Et celebrare sacras pecorum nidoribus aras.

Hinc subeunte alio, reuolutis orbibus, æuo,

lam noua progenies, sacra lex, pia uenerat ætas,

Et iam

Etiam tempus erat, quo magni Pastor ouilis,
Immensiq; Patris Genitus, spesq; unica, Christus,
Iam dudum ad festas epulas, & flumina læta
Ipse suosq; greges, suaq; hæc armenta uocabat.
Ergo ubi seruantes recutitæ sabbata turbæ,
Æzuma festa focis priscoq; ex more pararent,
Cædere lustrales dapibus paschalibus agnos,
Ille etiam cupiens duodenam pascere turmam,
Et mox his ducibus, reliquas explere cohortes,
Imperat ætutum conuiuii sancta parari
Hic, ubi dulcis aquæ portantem fortè lagenam
Compererint, nec multum illos subit inde Penates.
Ac postquam ad cœnam bisseuos rite Ministros
Conuenisse uidet, cunctis discumbere iussis,
In medio perhibent dixisse hæc uerba sedentem.
Ies. Nulla mora est, tradar manibus iamiã ipse nocentiũ,
Et me Fata uocant, quando hæc celebrata uetusto
Præsignant ritu nostram solennia mortem,
Nam si sacra Deus fieri sibi talia iussit,
Quo populum è duro libatis duceret agnis
Seruitio Aegypti, senior si guttura Nati
Olim iussus erat sæuo distringere ferro,
Vt pietas euietæ Deo pietate placeret,
Me quoq; clade mea mundi peccata piare
Conuenit, & captam tenebris euoluere plebem,

Cæde

Cæde salutiferi, quem uos nunc cernitis, agni.
Et pietas pietate mea uincenda, fidesq;
Exuperanda fide est, pellatur ut eminus hostis
Pestifer, & barathri lateat sub gurgite mersus
Ille lupus, uariuſq; draco, qui septa pererrans,
Milia multa onium latebroſa condidit aluo.
Imperioq; mori ſummi Genitoris oportet,
Vt coeant Superis coniunctæ hoc ſcædere gentes.
Vltro epulas igitur cuncti libate paratas,
Tuq; incumbere meo femori Puer inclyte, quondam
Vt reſeres generi præcordia noſtra futuro.
Quod ſi ſcire cupis, qui me male prodere pergit,
E numero eſt, ſpecta, cui tinctam porrigo quadram.
His dictis, menſa tollit ſe protinus ipſe,
Præcinctumq; gerens uillis mantile reciſis,
Incipit à primo Sociorum crura lauare,
Abſtergitq; pedes niueo uelamine lotos.
Atq; ita dura Cephæ loturus crura præhendit,
In peluim exponens, quæ plena hos ſtabat ad uſus,
Atq; hunc audiuit tali ſibi uoce loquentem.
Ceph. Haud equidem patiar, nec fas eſt, ſumme Ma-
giſter,
Discipulum ipſe laues monitor, Dominus quoq; ſeruū.
Cui ruſum hæc Chriſtus Diuino reddidit ore.
Ieſ. Hæc tibi nempe Cepha certo, niſi laueris, inquam,
Cœleſtis

Cælestis fies regni non dignus & experts.

Ceph. Atq; huic deinde Cephas, Non tantum crura
pedesq;

Sed caput atq; manus, totumq; hoc ablue corpus,

Si libet, ipse nihil cunctatus iussa subibo.

Ies. Laetitæ tanta non est opus, inquit, habenti

Cor mundum, nitidosq; reor uos, non tamen omnes,

Quandoquidem infecto quidam se pectore tollit.

Verum hæc nunc uacua mea dicta capeßite mente,

Ipse quidem uestri quamuis Dux agminis essem,

Et Dominus, iustaq; data ditioe potirer,

Non tamen interea uobis persæpe minister

(Cum res ipsa tulit) dici fieri ue recuso,

Exemplo ut nostro, Maiores deinde minorum

Non pudeat sese uigiles præbere ministros.

Sed stratis panes ac uina reponite mensis,

Atq; hæc, quæ tradam, uestre monumenta salutis,

Accipite extremum legatum, & pignus amoris,

Verbigena id uerbo moriturus rite sacraui.

Hanc ego sanctificans sacro lustramine quadram,

Do uobis, corpusq; meum est hoc, sumite læti,

Et celebrate pñ deinceps mysteria sacri,

Hacq; mei turmæ sub relligione pientur

Perpetuò memores. Similiq; hæc uina dicata

Ordine uerborum, nostri sint sanguinis haustus.

c

Namq;

Namq; calix, legisq; nouæ fundamen habendum hoc,
 Pro uoto effertur uiuorum, & luce carentum.
 Sic igitur gemina iungens conuiuia cœna,
 Cultibus antiquis das finem, exordia ponis
 Inde nouis, legisq; excipis mandata uetustæ,
 Inceptasq; aliam, diuersaq; fœdera iungis
 Tu medius Pastor seclorum, & summe Sacerdos.
 Melchisedech primus Cerealia munera templis
 Obtulit atq; merum, Similisq; uiatica crusti
 Helix rexere pedes. Frugumq; refectus
 Est ope, quando Dauid defessus ab hoste rediret,
 Quam dedit Abimelech sacratam è limine sumptam.
 Hæc sunt cœlestis pluuiaria munera roris,
 Quæ pauere pias tam longo tempore gentes,
 Per deserta suos loca dum petiere Penates,
 Et patriam antiquam, & promissæ iugera terræ.
 Hac ope sacra tibi nunc pascis ouilia Christe,
 Cœlestiq; cibo recreas mortalia præsens
 Corpora, nosq; beas, pura si mente litemus.

*ÆGLOGA SEPTIMA,
 De Passione Saluatoris. Auctor so-
 lus loquitur.*

Olim luor edax duros armauit agrestes,
 Concurritq; frequens, fumosis concita tectis,
 Turba

Turbanocens, properans in fontem extinguere Daph-
nim,

Cum uidet huius oues niueum producere uellus,
Fœturaq; nouæ recipi uix caulibus agnos,
Et ferri totam lac non uenale per urbem.
Hunc ego, iamdudum curam hanc dimittite, uobis,
Vnus ait comitum, dentur modo præmia, tradam,
Ne uos effigies Fratris uicina figuræ
Decipiat, cui ficta ferens ipse oscula figam,
Vos illum ætutum manibus uinctisq; tenete.
Non aliter quondam bis sex è Fratribus unus
Venditur, ut mitis ter deno uictima nummo.
Ergo ubi dira fero gens est impulsæ furore,
Vultibus obscenis, & sæuo turbine fertur.
Huc, ubi odorifero moriturus Daphnis in horto
Sæpe preces Patrem ueniens fundebat ad altum.
Nec mirum, locus est herbisq; & arbore cultus,
Lectus ad insidias. Simili insidiatus in heruo,
Per teretes coluber truncos & brachia serpens,
Iam primum antiquam seduxit murmure Matrem,
Compulit & uetitis fauces corrumpere pomis.
Vnde Virum inuasit contracta à Coniuge labes,
Quæ repens, genus & totum fœdauit ouile.
Vnde igitur mors cœpta, greges hinc uita manebat.
Nec mora, fatifera progressa è mœnibus urbis,

Proruit, ut rapidum præcepta captura latronem,
Terribiles uultus nigro suffecta ueneno.
Hic torres, gerit ille fudes, hic stipite querno
Armatus, præfert erecto lamina cornu.
Sed postquam in uiridi quæsitum protinus agro
Orantem, & riguo Sociorum corpora somno
Procubuisse uident, non tendere cominus ausi,
Subsistunt, proniq; cadunt, terramq; maligno
Ore premunt, nec rursus eos attollere contra
Corpora fert terror gelidos diffusus in artus,
Donec ductorem scelerum, timidosq; ministros,
Qui mactandus erat, uerbis confirmat amicis.
Nimirum dilexit oues, quas pauerat, ausus
Pro grege, quæ coluit, bonus idem occumbere Pastor.
Et caput unius pro multis fata petebant.
En adsum. Quid Amice uenis? Quod uoluis ab atro
Pectore, fac propere expedias, & perfice munus.
At uos quid tantos mouit concire tumultus,
Vt tanquam pecoris raptorem, & lactis opimi,
Fustibus infestis peteretis, & undiq; signis?
Non ego terrarum & naturæ fœdera monstrans,
Vobiscum in pago & campis spaciabar apertis?
Turbidus, his dictis, propius se proditor offert,
Audet & os ori tetrum miscere nitenti,
Atq; ita signa ferens pando dedit oscula rictu.

Hic

Hic subito Daphnim inuadens ignobile uulgus,
Dat post terga manus, dat fortia uincula collo,
Utq; reum raptans, pulsat, pellitq;, trahitq;,
Ast alij cædunt alapis, & iurgia iactant,
Effunduntq; graueis immundo ex ore saliuas:
Nec tamen interea oblitus præbere salutem,
Quamuis sæpe labans turba premeretur ab omni,
Auriculam Malcho abscissam sine labe reponit,
Et monuit, ne quis uagina educeret enses,
Quum gladio feriens mox sit feriendus & idem.
Sic ueterem obscura rapitur dum nocte per urbem,
Nunc est ad Cayphan, nunc est traductus ad Annā.
Rursus ad Herodis crudelis limina fertur,
Pilati demum prætoria Præsidis intrat.
Dum quærunt, quo se tucantur Iudice fontes,
Lactatus, multisq; probris affectus ubiq; est.
Dum silet, aut qui sit, timida non uoce fatetur,
Acrius insultant, laudemq; in crimina uertunt.
At Socij fugiunt, quæ terror perpulit acer,
Hoc tamen excepto, in mensa qui fortior antè
Prodentem ad pœnam furiata mente poposcit,
Mox Malchum inuasit gladio, deiecit & aurem.
Tum solo ancillæ admonitu stupefactus, ad ignem
Abiit Herum, uerbis bis terq; negando,
Nec potuit galli cantum expectare secundum.

At qui prodiderat, sceleris sibi conscius acti,
Abiecit nummos, desperataq; salute,
Infelix nodum ficu suspendit ab atra,
Et postquam è ramis, elisa fauce, pependit,
Protinus huic rupto fluxerunt viscera uentre.
Postquam igitur Præses culpa damnare uacantem
Erubuit, monitisq; & uisis Coniugis hæret,
His dictis tentat populum placare furentem.
Proxima lux festa est, soliti dimittere fontem,
Hunc solui, an Barabam præfertis? Dicite cuncti.
Exclamabant Barabam, atq; cruci te affigere Daphnim,
Poscimus, haud huius (tulerint modo fata) timemus,
Et nos & nostros perfundi sanguine Natos.
Hinc alia stolidos si forsan mitiget arte
Expertus, duræ nitidissima membra columnæ
Applicat, ac nudum manibus post terga reuinctis,
Carnificum denso contundens uerbere cædit.
Atq; ita liuentem plagis, sparsumq; cruore,
Ad sæuæ ducens iterum spectacula plebis,
En ait, en uestrum placidi iam cernite Regem.
Persistunt, Regemq; negant, certoq; frementes
Supplicio exposcunt, ut ab arbore pendeat alta.
Ergo ubi nulla datur iustum seruare facultas,
Immitis, lotis manibus, sententia fertur.
Damnatoq; ferox gens circumfusa repente,

In folio ut Regem uestitum murice sistit
 Illudens, capitiq; grauem premit usq; coronam,
 Lætificis spinis, & acerbo germine textam.
 Interea haud lentè patulis crux ardua ramis,
 Insignis titulo, & membris decoranda supinis,
 Quatuor ad mundi partes conuersa paratur.
 Haud secus illa olim fluctus super enatat altos
 Arca, Senem portans, seruataq; semina rerum.
 Sic fuit è ramis suspensus æneus anguis,
 Efficiens tutum genus à serpentibus atris,
 Intutusq; leuans languentia corda potenti.
 Hic tum terga leuans, ulnis extensus apertis,
 Inter latrones, potuq; affectus amaro,
 Amplexus genus omne uirum, referensq; salutem,
 Vulneribus quinis alienæ crimina culpæ
 Dilux, & patriæ extorres nos reddidit altæ.
 Sed Natum cernens extinctum languida Mater,
 Dat querulos planctus, Mater teraq; utraq; luctus
 Ingeminat, Sociusq; gemens, & Amica. Duasq;
 Finditur in partes uelum altum, & uiua sepultis
 Corpora mixta ferunt intra urbem errasse, tremor-
 remque
 In terris, tristiq; orbem luxisse figura,
 Dum Phœbus nigra texit ferrugine uultus,
 Et subito exorta clauserunt cuncta tenebræ.

*ÆGLOGA OCTAVA,
De Resurrectione Saluatoris. Col-
locutores, Maria Magdalene, sub no-
mine Aegles, & Iesus, sub nomine A-
canthi.*

Concessa est tellus, tonuit polus, aeraq; ignis
Diffundens, subita tetigit formidine mentem.
Me miseram, ne quis Diuini membra Magistri
Sustulerit, gelido nuper composita sepulchro,
Atq; ideo Genitor crepitantia fulmina torquens,
Sacrilegos trifida properet consumere flamma.
O ueneranda Viri species, uultusq; beatus,
Nil mortale gerens, quamuis moriturus, & illa
Gratia, maiestasq; oculis innata serenis.
Frons risus expers, uerum mitissima cunctis
Supplicibus, rursusq; apparens sæua superbis,
Quæ solo intuitu potuit terrere nocentes,
Solariq; inopes animos, curasq; leuare,
Attactu curare greges, auraq; salubris
Oris, ab innumeris seruare armenta periclis,
Siue his obfuerant infecti pabula prati,
Seu uicium cœli, seu partes sparsa per omnes,
Tabifici læsit præceptis contagio morbi.
Quæ uerbis sæuos nouit lenire leones,

Naturæ

Naturæ variare uices, elementaq; sacra
 Voce mouens, ueterem rerum mutare tenorem.
 O me fœlicem tunc, cum mea tecta subiret
 Ad cœnam, tantus Socijs comitantibus Hospes.
 Fœlix obtutus, cum me miseratus egentem
 Consilij, conuersa oculorum luce beauit.
 Fœlices lachrymæ, pedibus fœlicia quondam
 Oscula fixa sacris, quiq; hos tersere capilli,
 Et quod sydereum corpus perfudit aroma.
 Fortunata Soror, qua componente, recepit
 Ille dapes. Verum fœlix per secula Frater
 Lazarus, è rapidi reuocatus faucibus Orci.
 Præcipue fœlix, quæ talem gessit in aluo,
 Quæ talem peperit, quæ talem sustulit ulnis,
 Et Nati demum miracula uidit adulti
 Excellens Genitrix, sed nunc miseranda uel ipsis
 Iudæis, quibus in prolem exercere nefandum
 Ius licuit, uitæq; Auctorem opponere morti.
 Inprimis stupeo, placida quàm mente peregit
 Iussa Patris superi, quàm clemens iuit ad aras
 Hostia, pro gregis electi mantanda salute.
 Crudelisq; sibi, nobis pius, obtulit ultro
 Carnificum manibus pro nostra candida culpa
 Pectora, nosq; sui puro lauat amne cruoris.
 Ulla mihi ante omnes uenerabilis hæret imago,
c 5
Visceraq;

Visceraq; euoluit, cum clavis fixus iniquis,
 Hinc atq; inde manus, & duro in stipite plantas,
 Spinarumq; graui traiectus tempora ferro,
 Perfossusq; latus lætalis cuspidis hasta,
 Vltima demisit morienti uerba palato,
 Aeternum humano generi testatus amorem.
 Nam Sitio, dixit, Iuuenumq; Senumq; salutem,
 Discipulum hinc Matri, Genitricem tradidit illi,
 Huic dicens Mater, tuq; ipse Filius esto.
 Seq; piè fassum transscripsit in astra latronem.
 Hinc mox exclamat, Quid me Deus alte relinquis?
 Hanc tibi trado animā, manibus Pater excipe Natum,
 Subdidit. Hocq; sacro postremum effudit ab ore,
 Consummata mei iam sunt mysteria cursus.
 Sed quid nunc uideo? Quis duri saxa sepulchri
 Euoluit, Iuuenes? Texit quos candida uestis,
 Formosæq; decent alæ. Quis sustulit alium
 Corpus? Et egregiæ custos ô uillice terræ,
 Dic, ubi, quæso, mei Domini pia membra locatis.
 Me miseram, quid agam, lachrymis quis finis acerbis?
 Acanth. Quid ploras Mulier? Viridi quem quæris in
 horto?
 Non deinde hic quæras, surrexit ad æthera Christus.
 Ecce uides uacuum, quò nuper conditus, antrum.
 Aeg. Tunc ipse es, nuper uita perfunctus Acanthus,

Qui crucis aeræ fueras sublatuſ in aram,
Quæ modo condidimus gelidi ſub fornice ſaxi,
Pulchrior, euictis tenebris, poſt fata reſurgens?
Proh quàm læta meam peruadunt gaudia mentem,
Accedam, amplectarq; pedes uenerande Magiſter.
Acanth. Quin procul hinc faxiſ, iubeo, & me tange-
re noli,

Nondum etenim ad ſummum conſcendi Victor O-
lympum.

Sed pete Diſcipuloſ, dic illiſ, quod leuiſ alta
Aſtra peto, omnifici manſurus in arce Tonantiſ.
Ad dextramq; Patriſ redeo, unde antè profectuſ.
Aeg. O quàm fauſta dieſ populuſ apparuit imiſ
Et ſuperiſ, micuit quàm læto Lucifer aſtro,
Cum moſ morte perit, luxq; omniſ luce redempta eſt.
Hoc quoq; non multum eſt, cum moſti proximuſ eſſet,
Veridica genti prædixit uoce prophanae,
Euertam hanc dicent imiſ à ſedibuſ ædem,
Et triduo euerſam mox ruruſ ad ſydera tollam.
Hoc etiam lonæ caſuſ portenderat olim,
Quem mariſ abſorptuſ ſeruantiſ ſub gurgite cete,
Illæſuſ euomuit, ſuperuſq; efflauit ad auræſ,
Tertiæ cum terris Aurora reduceret orbem.

AEGLO-

AEGLOGA NONA,

De Ascensione Saluatoris. Collocutores, Athanatus, hoc est Christus iam immortalis, & Chorus Pastorum atque Agricolarum, id est Discipulorum congregatio.

NUnquid adhuc duræ geritis præcordia mentis,
Torpetisq; gelu? Nam quæ uos tanta moratur
Segnicies, quid adhuc animis dubitantibus obstat?
Num manifesta fides operum, & spectata meorum
Gloria, uos ueteri potuit depellere sensu?
Ecce quater denis per terras rite diebus
Dum moror, euerſi poſt uincula rupta ſepulchri,
Poſt Erebum euictum, ſpoliataq; Tartara ſanctis
Manibus, occluſo bis iam uos limine adiui,
Oſtendiq; ſacrum quino cum uulnere corpus,
Singula quæ Didymus digitis tractauit adaëtis,
Pro ſe, proq; alijs tenebras ut demere poſſit
Mentibus, æternamq; pijs inducere lucem.
Quin etiam apparens piſcoſo in littore rurfus,
Cum mare ſeruaffent per noctem retia fruſtra,
Mane plagas multis oneraui piſcibus amplas.
Vobiſcum ipſe fauo lætis epulatus in herbis,
Tumq; petens bis terq; Cepha, me an prorſus amares,
Te

Te caput armentis statui gregibusq; Magistrum,
Et iussi, in terris tu Pastor maximus esses.
Quod si uerus amor stimulis urgeret acutis,
Non resides, non uos fieri pateretur inertes.
Ite igitur, meaq; alma bonis diffundite campis
Semina, spemq; gregis syluas mox inde per omnes
Tendite, Pastores pariter pariterq; Coloni.
Nam quicumq; meis iunget se caulibus usq;
Credulus, ac nostro lustratum tinxerit unda
Nomine, sacrata tollens aspergine labem,
Letiferi hunc fugient morbi, pestesq; malignæ,
Nec fera, nec diris comprehendet faucibus Orcus,
Expositus pœnis quibus est incredulus omnis.
Protinus & fidos certissima signa sequentur,
Nempe mea Furias pellent uirtute nocentes,
Effundent uarijs diuersa in murmura linguas,
Monstriferos uerbis extrudent eminus angues,
Toxica non illos, poterit non lædere uirus,
Diffusum ue olim per pocula nigra uenenum.
Languiore quoq; luctificos agitabit ab ægris,
Ostendet quisquis nostro se numine dignum.
Interea quoniam superas feror altus in oras,
Cum pompa ad Patremq; meum uestrumq; reuertens,
Meq; triumphantem excipiet mox regia cœli,
Cœlicolũ & præmissus adest mihi flammeus ordo,
Obuius

Obuius occurrens rutilus pulcherrimus alis,
Expectate, meus ueniat dum Spiritus, ut uos
Promisso illustret perfusos lumine cunctos.
Cho. I felix ô uere Deus, Sobolesq; Tonantis,
Athanate, & nostri quondam reminiscere cœtus.
Accipimus uocem, cœlo quæ lapsa sereno,
Purpureoq; fluens fulgentis ab ore Ministri,
Nil miremur, ait, cœli per aperta tuentes,
Teq; olim simili rediturum ad prata tumultu
Asserit, ut possis extremo munere fungi,
Et iusta fœtus pecorum suspendere lance.
Id signans Enoch Deus extulit, & face raptus
Flammigeri Helias penetravit in æthera currus.
Sidereum subito contingens turbine cœlum.
Sensit idem Pastor funda torquente Giganti
Congressus, tripliciq; infringens uerbere frontem.
Dixit enim, In summos tua magna potentia cœlos
Proripuit, supraq; Deos erectus abisti.
Idem iterum ascendit Dominus, quem gaudia uocum,
Clangoresq; tubæq; ad Superos comitantur euntem;
Nube leui hæsurum, Helias prædixerat antè.
Pastor Amos, Igitur summum molitur Olympum;
Vaticinatus ait, Micheas, Daniel, reliquiq;
Pastores, etiam hoc concordi uoce tulerunt.
Ergo hilares festo feriamus pectora plausu;

Grataq;

Grataq; multifonis modulemur carmina cannis.
 Gloria mittenti, redeunti Gloria uelox,
 Gloria sit sacro, qui iam mittendus in igne est,
 Quorum ternus honos trunco prorumpit ab uito.

*AEGLOGA DECIMA;
 De Emissione sancti Spiritus. Collo-
 cutores, Duodecim Apostoli, symbol-
 um Christianæ Religionis, singulorū
 traditione, inter se componentes.*

EXcipit egregio uiduatū præside cœtum
 Clauiger, extremūq; locum, qui fortè uacabat.
 Inter bisfenos remouens sine nomine Fratres,
 Illius, oppressa qui nuper fauce pependit,
 Quam primum iubet educita decernere sorte.
 Nec mora, Sorte data, uacuo prælatus honori est
 Mathias, partemq; sacri suscepit ouilis.
 Et iam Sôl radijs madidas siccauerat herbas
 Rorē poli, fluuiosq; è pastu armenta petebant,
 Extemplo subito cœlum referatur hiatu,
 Et sacro tectum omne domus confunditur igne,
 Cum tonitru labens, qui turbam inuasit in omnem,
 Nec læsit quenquam, sed frigida pectora fouit,
 Exacuens hebetes uaria in præconia linguas.
 Res haud nota unquam, cum gens diuersa coisset,

Par-

Parthusq; & Mædus, Proceres quoq; Persidis, & qui
 Tygris & Eufrates medius plana incolit arua,
 Nec non palmiferæ cultor Iudæus Idumes,
 Cappadoces, & quos fert Pontus, & Asia tellus,
 Dardaniq; atq; Phryges, simul & frondentis alumni
 Pampylia, & populi Libya, atq; Aegyptia pubes,
 Et Cyrenæo ueniens de littore uulgus,
 Romanus, Cretensis, Arabs, & mixta propago,
 Plurimus & properans ignoti è partibus orbis,
 Quisq; tamen patrio sensit sermone loquentes,
 Quisq; suæ audiuit consueta uocabula lingua.
 Et quoniam simili afflati sunt numine cuncti,
 Bissenas nostræ legis iecere columnas,
 Quis etiam uario priscorum ænigmate Vatum
 Signauere chori, fatorum nuncius ordo.

PETRVS I.

Principioq; Cephas surgens, sic dicere cæpit,
 Esse Deum, qui cuncta potest, qui cuncta creauit,
 Confiteor, summaq; orbem ratione regentem.
 Ergo uni ternoq; Deo sit fausta potestas.

ANDREAS II.

Post quem mox Fratrem memorant sic deinde locutū,
 Afferro, quod Patris est soboles bonus inclyta, Chri-
 stus,

Vnicus

Vnicus & mundi Dominus, Princepsq; salutis.

Ergo uni ternoq; Deo sit fausta potestas.

IOANNES III.

Scribarum hinc subito excipiens ita Signifer, inquit,

Hunc reor intacta Puerum de Virgine natum,

Atq; operante sacro conceptum Pneumate lesum.

Ergo uni ternoq; Deo sit fausta potestas.

IACOBVS MAIOR IV.

Quartus ab his Iacobus ait, Zebedeia proles,

Ipsam etiam testor Pilato Præsidente passum,

Pro nobis tolerasse crucem, subiisse sepulchrum.

Ergo uni ternoq; Deo sit fausta potestas.

THOMAS V.

At Didymus nihil addubitans hæc asserit ultro,

Solueret ut Patres, Manes descendit ad imos,

Et redijt cum se lux tertia reddidit orbi.

Ergo uni ternoq; Deo sit fausta potestas.

IACOBVS MINOR VI.

Ex hinc Alpheus confert, quæ sensit, in unum,

Ad Superos penetrans, dextræ Patris assidet alti,

Omnipotens, Victorq; Herebi cum Flamine regnat.

Ergo uni ternoq; Deo sit fausta potestas.

PHILIPPVS VII.

Moxq; Scytham hæc perhibent alijs memorasse Phi-

lippum,

d

Hinc

Hinc iterum Iudex functis uisq; redibit,
 Sontibus ut pœnas, & iustis præmia reddat.
 Ergo uni ternoq; Deo sit fausta potestas.

BARTHOLOMAEVS VIII.

Inde Lycaonia sic sanctus protulit Hospes,
 Esse Deum hunc credo, qui nos modo lumine sancto
 Lustrauit, Patris ac Nati Spiramen amorq;
 Ergo uni ternoq; Deo sit fausta potestas.

MATTHAEVS IX.

Matthæus cecinit deserta hæc deniq; mensa,
 Sunt quoq; membra Dei summo de uertice, totum
 Concilium hoc, Christi; omnes sub nomine cœtus.
 Ergo uni ternoq; Deo sit fausta potestas.

SIMON X.

In sacroq; Simon decimus sic ordine fatur,
 Cuncta, iubente Deo, fient communia Sanctis,
 Purgandisq; hominum sunt certa piacula culpis.
 Ergo uni ternoq; Deo sit fausta potestas.

INDAS THATAEVS XI

Accedens Thatæus, ad hæc est pauca locutus,
 Corpora subuersis erumpent sancta sepulchris,
 Perpetuoq; suis Animæ se fœdere iungent.
 Ergo uni ternoq; Deo sit fausta potestas.

MATHIAS XII.

Suffectusq; alij Mathias, ultimus in fit,
 Vita beata pijs, pietatis gloria. Summumq;
 Est precium, æterno intuitu spectare Tonantem.
 Ergo uni ternoq; Deo sit fausta potestas.

ÆGLOGA VNDECIMA, De Vltimo Iudicio, quo iusti ab impijs discernentur, & distinguuntur. Auclor solus loquitur.

TEmpus erat, celso cum summi è uertice montis
 Fulmineus Pastor pecuaria tota recensens,
 A niueis terros agnis secerneret hœdos,
 Inq; Urbem è latis armenta reduceret aruis.
 Nam lupus ille ferox, Pastoris nomine captas,
 Seducens pecudes, nunc ui, nunc sæuior astu,
 Deceptos laniare greges consuetus in eruis,
 Cladibus infandis signatum affecerat agmen,
 Lugubriq; plagas palatu impleuerat omnes.
 Iam fera tempestas præmiserat horrida terris
 Signa. Quater denas elatus Pontus in ulnas,
 Hinc rursus informi reuolutus ad ima recessu,
 Prodidit obscœnas, subiraeto gurgite, ualles.
 Ballenæ, phocæq; graues, scopulosq; cete,
 Vltima luctifonos misere ad littora planctus.

Torrida multifidis arserunt æquora flammis.
Omnis sanguineis sudauit roribus arbos.
Omnis auis tristes celebrauit in aere cœtus.
Corruerantq; domus, rutilis mox undiq; septa
Ignibus, aerios uastarunt fulmina tractus.
Collisi lapides, tremor & telluris hiulcæ,
Omnia terribili prostrauit corpora motu.
Vallibus æquati montes, & turbine rapti
Pulueres, planos texerunt æquore campos.
Egressi ex antris homines insana tulere
Ora, nec alternas potuerunt reddere uoces.
Inq; fores tumuli, reueratis ossa sepulchris
Constiterant solidæ reditura in corpora molis.
Proripuerunt suis delapsa è sedibus astra,
Mortiferasq; comas totum sparsere per orbem.
Inq; unum coiere feræ, lugubreq; gementes.
Postremo cecidere omnes luenesq; Senesq;
Vt rursus in superas remearent cœlitus auras.
Et ueteri exciso, flammis populantibus, orbe,
Extructoq; nouo, post tanta incendia, mundo,
Antiquos redijt surgens stirps omnis in artus,
Iudicis horridi extremum subitura tribunal,
Haud simile huic, sapiens Salomon quod prodidit olim,
Iudicio dubio Matrum inter iurgia nato.
Ergo ubi rauca dedit sonitum tuba, protinus omnes

Excitæ

Excitæ coeunt diuerso è littore gentes,
 Quas oriens Phœbus radijs afflauit Eois,
 Quasq; cadens tepido lustrauit lumine, quasq;
 Vidit uterq; Polus, Boreas quas perflat, & Austet.
 Omnis religio, lex omnis, sexus, & ætas,
 Quilibet ordo hominum, quocunq; in tempore natus,
 Quisq; gerens patula culpas in fronte notatas,
 Quisq; suis studijs, & uita nobilis acta,
 Currit in exiguam uario sufflamine uallem.
 Quos supra ostendens multo se lumine Pastor,
 Fortibus affeclis, fulgentiq; agmine septus,
 Et quino decorans plagarum stigmatibus corpus,
 Constitit ore ferox, haud exorabilis ulli.
 Hinc rectam liquido suspendit ab aere libram,
 Lancibus expendens geminis fas omne nefasq;
 Et merita & noxas, laudes & crimina septis.
 Nec mora, quos nimio curuari pondere culpæ
 Cernit humi, legat iustus ad Tartara pœnis,
 Perpetuò ut nunquam cruciatu occumbere possint
 Exhausti, sed sine carens dolor urgeat illos,
 Hic ubi tristis adest horror, stridorq; gementum,
 Et labor, & facies rerum malesana, chaosq;
 At quos in nitidum uolucres sine crimine cœlum
 Altius efferrî, sublato examine, uidit,
 Destinat æternis, cœtu plaudente, triumphis,

Hic, ubi sancta cohors, recti sibi conscia gaudet,
 Calcato felix mundo, potiturq; Tonantis
 Intutu, cunctis opibus quem prætulit unum.

*AEGLOGA DVODECI-
 ma, De Vita beata. Collocutores,
 Arinnius & Geraldinus, sub nomini-
 bus Lyci & Lyncei, Agricola &
 Pastoris.*

LYCVS.

Dic mihi, meq; doce, tanti quæ meta laboris,
 Quis fructus studijs, quæ nostri præmia cultus
 Expectanda putes, operosi carminis Auctor,
 Stirpe Geraldina, & priscis generate Sabinis.
 Nam si perpetuus labor est, mercesq; caduca,
 Pro granis paleas reddens, pro fructibus umbram,
 Mallem equidem nunquam terras coluisse malignas.
 Lyn. Hesperidū custos Lyce agrorū, & cultor Arinni,
 Felix ista tibi toga sit, foelicibus opto
 Auspicijs, fulua ista legas, quæ poma tueris.
 Hoc iubet Alcides, nostræ quo Vindice terræ
 Purgantur monstris, cui fulget purior ætas.
 Secula compositis qui gentibus aurea reddit,
 Hispaniq; docet Mauros iuga ferre Leonis.
 Sed tibi quando petis rerum me dicere cursus,
 Euentusq;

Eventusq; operum, supremaq; fata senectæ,
 Alcinoi arboribus poscis me adiungere scetus.
 Triptolemiq; satis frugales addere culmos.
 Ly. Quin rogo, tu potius, ualidas dum scindo nouales,
 Venturisq; paro Cerealia me sibus arua,
 Dumq; tuæ pascuntur oues, age confer in aurem
 Nunc aliquid, cantuq; meum solare laborem.
 Ac si forte frequens te cepit opinio Vatum,
 Quos sequeris, dic, an tantum bona summa putaris,
 Quæ spectas, nec deinde uelis optabile quicquam,
 Extinctoq; omnes finire corpore curas.
 Lyn. Non cadit in sanas fallax sententia mentes,
 Nec me Nasonis seducunt carmina, nec me
 Falsus Aristippi traducit ad auia limes.
 Nam stultum in fragili est spem certam ponere fune,
 Et plenam à canna puppim relegare palustri.
 Verum hæc uita breuis nostræ data lubrica tandem
 Area militiæ, meliora ad regna remittit,
 Hic labor est, illic sunt præmia certa laboris.
 Ly. Ergo illic non arma ferent, non bella mouebunt,
 Nullaq; terrificos emittent castra tumultus.
 Nec fora, nec leges, nec ludicis ora minacis
 Terrebut fontes. Nec inanis splendor honorum
 Sollicitos tota Procures agitabit in aula,
 Ambitio ue agitans regimen, uenalia prodet

Munera, nec metus hos, illos urgebit egestas,
Non amor, aut odium scelerata in carmina pellet,
Inueniet ue nouas artes immensa cupido,
Quæ nullo rerum partarum expletur aceruo.

Lyn. Quin etiam nullus solitus erit artibus usus,
Cessabit uomis, cessabunt rastra, ligones,
Sarculaq; & marra, falces & plaustra, trahæq;
In cœlum nimijs iam nemo palatia tollet
Sumptibus, aut operam conducet, iners ue locabit.

Ascia nil, nil serra dabit, magnæq; dolabra,
Circinus, atq; æquans iuncturas regula uaras.
Nam nec nauigijs coniunget littora quisquam,
Nec trahet inuectas ullus per flumina merces.

Lyn. Magna refers, & uera quidem, maiora tamen
sunt,

Quæ reputo. Sed iam paulisper cesset aratrum,
Quandoquidem haud facile est, mentem exercere, ma-
numque.

Hic aer, nostrum qui lustrat pendulus axem,
Non uarias sumet formas, nunc lucidus, & nunc
Turbidus, aut raras tendens in uellera nubes,
Non niue, non pluuia, non grandine, non grauis aestu,
Non uentis agitatus aget bona nostra per auras.
Nec uel nocte dies uincetur tempore brumæ,
Vel nox uicta die paucas redigetur in horas.

Non

Non erit autumnus, non uer, non bruma, nec æstas,
 Nec qui temporibus dirimit Sol quatuor annum,
 Nec altos tollet currus, nunc pressior ibit,
 Per duodena means obliqui tramitis astra.
 Lya. Ipsi immo reliqui, quos idem concitat error,
 Consistent, nec deinde polus, qui cætera torquet,
 Vertet ægens secum sepienos mobilis orbes,
 Cunctaq; composito iam tandem sine quiescent,
 Pulcraq; erit facies elementis. Splendida semper,
 Nec quicquam dehinc fecis habens. Quippe ordine
 miro,

Post ubi conciderit flammis lustralibus orbis,
 Candidior mox deinde nouo se lumine tollet,
 Ut quæ nata Indis t̄ asueſta feruntur eremis *Æolisa*
 Lina, suos uertit dum gens mortalis ad usus,
 Gausape, uel lautis texens mantilia mensis,
 Ut niteant, rapido longum torrentur in igne,
 Qui ueteres labes, maculosaq; tegmina demit.
 Sic igitur dempto reuirescet pondere mundus,
 Emergetq; acris, reparatus flore iuuentæ,
 Ut positis spolijs iuuenescit lubricus anguis.
 Fixus ab integro sic, ut nec secula possint
 Eruere, aut auida uastare uoragine tempus.
 Hinc reor, ut ueteri corrumpi nescia casu,
 Corpora nostra leuis tollet super astra uolatus,

98 ANT. GERALD. BVCOL.

Nec male suada cibi deinceps cura tenebit,

Cum nec mortali fuerint obnoxia fato.

Lyn. Nec metuent Animæ, Censoris adire tribunal,

Quando Dei iusto librata examine, noscent

Se ad festos thýasos, & gaudia certa uocari.

Ergo eius uisu secura in pace fruemur,

In commune hilares omnes, meritisq; beatus

Quisq; suis. Nec lapsus erit, nec terminus æui,

At præsens, & fine carens, ac summa uoluptas.

Ly. Rite sapis Vates, nec quicquam certius istis

Asseritur dictis, modo sensus facta sequantur,

Et manifesta fides operum ratione probetur.



